

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 3, 8 HINGGA NO. 119)**

**[SOALAN NO. 3 DIJAWAB BERSEKALI DENGAN
SOALAN NO. 48]**

NOTA : [RUJUK PENYATA RASMI HARIAN (HANSARD)]

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' MOHD. NIZAR BIN HAJI ZAKARIA
[PARIT]**

TARIKH : 26 JULAI 2022 (SELASA)

SOALAN

DATO' MOHD. NIZAR BIN HAJI ZAKARIA [PARIT] minta **MENTERI PELANCONGAN, SENI DAN BUDAYA** menyatakan: -

- (a) apakah tindakan Kerajaan terhadap pihak yang menawarkan perkhidmatan badal haji pada harga tidak munasabah dengan kebanyakannya bermotifkan penipuan; dan
- (b) bagaimanakah Kerajaan akan memastikan perkara ini dapat dibanteras secara menyeluruh.

JAWAPAN

Tuan Yang di-Pertua,

1. Saya memohon untuk menjawab soalan oleh Yang Berhormat Parit bersekali dengan soalan lisan soalan nombor 48 oleh Yang Berhormat Jerantut kerana ia menyentuh isu yang sama.

Tuan Yang di-Pertua,

2. Pertama sekali saya ingin menjelaskan bahawa urusan haji bagi jemaah dari Malaysia adalah di bawah bidang kuasa dan seliaan Lembaga Tabung Haji (LTH) serta Jabatan Wakaf, Zakat dan Haji (JAWHAR), iaitu agensi di bawah Jabatan Perdana Menteri. Manakala

SOALAN NO : 03

Kementerian Pelancongan, Seni dan Budaya (MOTAC) mempunyai kuasa kawal selia ke atas agensi pelancongan di Malaysia.

3. Sementara itu, Badal Haji ialah ibadat haji yang dilaksanakan oleh seseorang individu bagi pihak yang lain menurut syarat-syarat tertentu. Kebiasaannya, Badal Haji ini membabitkan persetujuan, perjanjian atau kontrak secara sukarela antara orang yang membayar upah dengan orang yang menerima upah untuk dilaksanakan ibadat haji untuk penama atau individu yang dipersetujui. Contohnya, seorang anak yang mengupah orang lain untuk melaksanakan ibadat haji atas nama arwah ibunya yang telah meninggal dunia.

4. Pelbagai cara pelaksanaan perkhidmatan Badal Haji yang dilakukan dan ditawarkan kepada rakyat Malaysia. Antaranya ialah:

- (i) Agensi pelancongan yang mengambil upah Badal Haji untuk dilaksanakan oleh mutawwif ataupun kakitangan sokongan yang membawa kumpulan jemaah haji dari Malaysia kelolaan agensi tersebut. Bagi cara ini, kosnya mungkin tidak terlalu tinggi kerana mutawwif dan kakitangan sokongan ini tidak perlu membayar tiket penerangan, tempat tinggal ataupun makan minum secara berasingan, kerana telahpun dibiayai oleh agensi pelancongan tempat mereka bekerja; dan
- (ii) Selain itu, ada juga Badal Haji yang ditawarkan oleh individu yang sedia ada berada atau menetap di Mekah atau Madinah. Bagi cara ini, harganya mungkin sedikit tinggi berbanding cara pertama yang disebutkan tadi, kerana individu ini mungkin memasukkan kos penginapan, pengangkutan tempatan, makan minum dan sebagainya dalam kiraan upah mereka.

5. Semua ini pula berkait rapat dan tertakluk kepada syarat-syarat semasa yang ditetapkan oleh pihak berkuasa Arab Saudi, seperti keperluan memiliki permit khas untuk memasuki Arafah, harga yang ditetapkan untuk permit tersebut dan sebagainya. Malah, ada peraturan ini yang berubah setiap tahun. Syarat-syarat ini sememangnya diambil maklum oleh pihak Tabung Haji dan JAWHAR sebagai *focal point agencies* di Malaysia bagi urusan ibadah Haji. Kerana itulah, saban

SOALAN NO : 03

tahun kita mendengar peringatan dan nasihat yang dikeluarkan oleh Tabung Haji berhubung perkara ini.

6. Ini belum lagi mengambil kira ada juga pihak yang menawarkan bersekali dengan ibadah korban, cenderamata dan banyak lagi. Justeru, terdapat banyak faktor yang menentukan kos untuk Badal Haji. Ada yang memberi justifikasi mengapa upah mereka dikenakan agak tinggi berbanding yang lain, malah ada juga yang memaklumkan sebab kos mereka dapat diminimakan.

7. Oleh sebab itulah, pada masa ini, tiada kawal selia terhadap harga untuk Badal Haji ini. Akan tetapi, peringatan dan kesedaran terhadap faktor-faktor ini sentiasa diuar-uarkan oleh agensi-agensi Kerajaan, termasuk MOTAC.

8. Secara ringkasnya, Badal Haji ini lebih berbentuk kepada penawaran perkhidmatan dan penerimaan terma yang dipersetujui oleh kedua belah pihak pembayar upah dan pihak yang diupah untuk melaksanakan amanah yang diberikan. Perjanjian atau kontrak ini boleh tercipta antara individu dengan individu, mahupun antara individu dengan agensi pelancongan.

9. Ingin saya ingatkan bahawa sesbuah agensi pelancongan yang berdaftar dan mempunyai lesen yang sah dengan MOTAC, tidak semestinya memperoleh lesen daripada Lembaga Tabung Haji untuk beroperasi sebagai Pengelola Jemaah Haji (PJH). Manakala antara syarat yang dikenakan oleh Tabung Haji untuk memohon lesen PJH ialah agensi pelancongan perlu mempunyai Lesen Perniagaan Pengendalian Pelancongan Luar Negeri bagi Umrah atau Ziarah bidang IOTU yang dikeluarkan MOTAC.

10. Untuk pakej umrah, MOTAC ada mengeluarkan harga rujukan berdasarkan ciri-ciri tertentu pakej yang ditawarkan oleh agensi pelancongan seperti tempoh perjalanan, jarak hotel dengan masjid, taraf hotel, kelas penerangan dan sebagainya. Ini kerana pakej yang ditawarkan oleh agensi pelancongan ini adalah bagi perkhidmatan di bawah seliaan MOTAC.

SOALAN NO : 03

11. Contohnya, MOTAC pada tahun lalu (2021) telah mengeluarkan harga rujukan atau indikatif bernilai RM6,900 bagi pakej umrah yang mempunyai ciri-ciri tertentu, seperti:

- (i) Tempoh pakej selama 12 hari 10 malam;
- (ii) Hotel bertaraf 3 bintang; dan
- (iii) Jarak hotel dengan masjid lebih kurang 250 meter.

Harga indikatif ini juga mengambil kira syarat dan prosedur yang dikenakan oleh pihak berkuasa Arab Saudi, seperti kapasiti dalam kenderaan, keperluan sanitasi dan sebagainya berdasarkan prosedur dan amalan *post-COVID*.

12. Tetapi, Badal Haji ini adalah berbeza. Oleh itu, harga indikatif untuk Badal Haji lebih sesuai diberi maklum balas oleh Tabung Haji dan JAWHAR kerana syarat-syarat terperinci mengenai Badal Haji adalah diketahui oleh agensi-agensi ini.

13. Mengenai tindakan yang boleh diambil kepada pihak yang tidak menjalankan apa yang telah mereka tawarkan atau janjikan, perkara ini perlu dilihat dan dinilai berdasarkan *case-by-case basis*. Ini kerana kita mempunyai beberapa peruntukan akta yang merentasi Kementerian yang boleh digunakan sekiranya berlaku penipuan.

14. Sebagai contoh, sekiranya ia melibatkan penipuan oleh agensi pelancongan di Malaysia, MOTAC boleh menggunakan kuasa yang ada padanya untuk menguatkuasakan peruntukan di bawah Akta Industri Pelancongan 1992 [Akta 482], seperti menggantung atau membatalkan lesen yang telah diberikan di bawah Seksyen 8(1)(d), Akta 482.

15. Tetapi sekiranya perkhidmatan itu ditawarkan oleh syarikat pengendalian pelancongan yang tidak berlesen dengan MOTAC, maka tindakan penguatkuasaan boleh diambil di bawah Seksyen 5(2), Akta yang sama.

16. Manakala sekiranya penipuan tersebut dilakukan oleh individu, pihak terkesan boleh membuat laporan polis agar siasatan boleh dibuat di bawah Seksyen 420 Kanun Keseksaan. Pada masa yang sama, bagi

SOALAN NO : 03

pemulangan wang, ia perlu dilaporkan kepada kepada pihak Tribunal Tuntutan Pengguna Malaysia (TTPM) di bawah Kementerian Perdagangan Dalam Negeri dan Hal Ehwal Pengguna (KPDNHEP), yang mempunyai kuasa untuk mengeluarkan ‘award’ atau bayaran ganti rugi.

17. Oleh itu, setiap kes penipuan perlu diteliti bagi membolehkan agensi berkenaan boleh mengambil tindakan menggunakan peruntukan akta yang bersesuaian. MOTAC sememangnya sentiasa bekerjasama dan telah pun mengemukakan pandangan kepada pihak Tabung Haji dan JAWHAR bagi merangka langkah-langkah boleh diambil agar penguatkuasaan yang teratur dan berkesan bagi mengelakkan penipuan dalam hal ini.

18. Di pihak pengguna pula, perlulah bijak dalam mempertimbangkan sesuatu penawaran Badal Haji itu munasabah ataupun tidak. Dapatkan perincian daripada pihak yang menawarkan perkhidmatan tersebut dan dapatkan lebih maklumat daripada Tabung Haji. Sekiranya terdapat keraguan, dinasihatkan untuk tidak meneruskan transaksi.

19. Sehubungan dengan itu, orang ramai dinasihatkan supaya merujuk kepada Tabung Haji untuk memastikan ejen atau individu yang menawarkan perkhidmatan ini mempunyai kebenaran menunaikan haji serta berkelayakan dari segi ilmu untuk melaksanakan badal haji itu dengan sempurna.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS, TAHUN 2022**

PERTANYAAN : LISAN

**DARIPADA : PUAN NOORITA BINTI SUAL
(TENOM)**

TARIKH : 26 JULAI 2022 (SELASA)

SOALAN

PUAN NOORITA BINTI SUAL (TENOM) minta MENTERI PEMBANGUNAN WANITA, KELUARGA DAN MASYARAKAT menyatakan apakah program, aktiviti dan langkah-langkah yang telah diambil oleh pihak Kementerian untuk membantu memperkasa ekonomi wanita khususnya wanita-wanita di luar bandar, di negeri Sabah.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) amat prihatin dan komited untuk menjaga kebijakan semua wanita di negara ini. Pelbagai program, aktiviti dan langkah-langkah yang telah diambil bagi memperkasakan ekonomi wanita seperti berikut:

1. Mengadakan Program Jelajah dan Karnival Wanita Bangkit@KPWKM

- Program ini memberi fokus kepada aktiviti penjanaan pendapatan dengan menghubungkan wanita kepada platform yang menawarkan peluang pekerjaan, perniagaan, keusahawanan melalui kolaborasi strategik daripada pelbagai pihak.

SOALAN NO. : 8

- Program ini akan diadakan mengikut zon, Zon Sabah dan Sarawak dijadualkan pada bulan September dengan melibatkan kerjasama dengan Jabatan Hal Ehwal Wanita Sabah (JHEWA), Majlis Penashiat Wanita Negeri Sabah (MPWS), PERKESO dan organisasi yang bersesuaian.

2. Mengadakan Program MyKasih Kapital

- Program MyKasih Kapital merupakan inisiatif yang dilaksanakan oleh Kementerian dalam usaha membantu wanita B40 untuk melaksanakan program keusahawanan.
- Pelaksanaan program ini melibatkan kolaborasi strategik dengan pelbagai pihak.
- Sejak April 2021 hingga Jun 2022, 10,300 peserta telah berjaya mengikuti kursus keusahawanan.

3. Mengadakan Program Pemerkasaan Wanita 4K (Kesaksamaan dan Kepimpinan, Kewangan, Kesimbangan dan Kemahiran)

- Sehingga 30 Jun 2022, sebanyak **857 program** telah dilaksanakan yang melibatkan **3,490,411 peserta** di seluruh negara.
- Program-program ini dilaksanakan secara hibrid iaitu melalui dalam talian dan juga fizikal.

4. Mengadakan Kolaborasi Strategik bersama Kementerian Pembangunan Usahawan dan Koperasi (KUSKOP)

- Program Jelajah Keusahawanan Bersasar bagi wanita yang ingin menceburi bidang keusahawanan atau melaksanakan perniagaan secara tidak formal mahupun yang telah memiliki perniagaan sendiri.
- Program ini telah melibatkan seramai 80 orang peserta wanita.

5. Melaksanakan Program Mamacare – Industri Penjagaan Postnatal (Ibu Selepas Bersalin)

- Program ini merupakan Program Penjagaan Ibu Selepas Bersalin Tradisional Melayu yang dipermodenkan.
- Sejak diperkenalkan pada tahun 2012, seramai **1,431 orang** wanita telah berjaya dilatih dalam kemahiran Penjagaan Ibu Selepas Bersalin.
- Sehingga Jun 2022, **jumlah pendapatan** yang berjaya dijana oleh Pengamal MamaCare ialah berjumlah **RM60 juta**.
- Manakala, daripada jumlah tersebut, 100 orang pengamal Mamacare dari Sabah berjaya menjana pendapatan sebanyak **RM1.6 juta**.

6. Melaksanakan Program 2 Years Exit Programme (2YEP)

- Program ini bertujuan membantu penerima bantuan kebajikan ke arah hidup berdikari dan keluar daripada kebergantungan kepada bantuan bulanan kebajikan.
- Sejak diperkenalkan pada tahun 2016, program 2YEP ini telah menerima seramai 6,210 orang peserta daripada seluruh Malaysia dan 260 orang penyertaan adalah daripada Sabah.
- Daripada jumlah penyertaan tersebut, seramai **1,502 orang** peserta berjaya ditamatkan bantuan.

7. Pemerkasaan Ekonomi melalui Kementerian Pembangunan Luar Bandar (KPLB)

- Pada masa yang sama, KPLB turut membantu usahawan wanita di Kawasan luar bandar melalui Program Keusahawanan MARA, Skim Pembiayaan Perniagaan Khas Wanita (DanaNITA) oleh MARA, Program pembangunan kapasiti oleh FELCRA Berhad dan Jabatan Kemajuan Masyarakat (KEMAS) dan program-program lain yang bersesuaian.

8. Melaksanakan Projek Pembangunan Ibu Tunggal dan Wanita B40 oleh Jabatan Hal Ehwal Wanita Sabah (JHEWA)

- Kerajaan Negeri Sabah melalui JHEWA turut melaksanakan program seperti Program Keusahawanan Wanita, Program Kemahiran Ibu Tunggal, Program Bantuan Peralatan Perniagaan dan pelbagai lagi aktiviti pemerkasaan wanita yang bersesuaian mengikut keperluan semasa.

9. Bantuan Khas Ibu Tunggal (BKIT)

- Selain itu, semasa pandemik COVID-19, Kerajaan juga turut melaksanakan pemberian Bantuan Khas Ibu Tunggal (BKIT) di bawah Pelan Jana Semula Ekonomi Negara (PENJANA).
- Bantuan **secara one-off** ini diberikan sebanyak RM300 kepada 150,000 ibu tunggal yang layak. Seramai **12,185 adalah penerima dari Sabah.**

Tuan Yang di-Pertua,

Kementerian menyeru kepada semua ahli dewan yang mulia ini agar terus memberikan sokongan padu kepada kaum wanita yang ingin meningkatkan produktiviti diri menerusi program keusahawanan dan mendukung agenda pemerkasaan wanita.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SYED ABU HUSSIN BIN HAFIZ SYED
ABDUL FASAL [BUKIT GANTANG]**

TARIKH : 26 JULAI 2022 (SELASA)

SOALAN

DATO' SYED ABU HUSSIN BIN HAFIZ SYED ABDUL FASAL [BUKIT GANTANG] minta **MENTERI KANAN PENDIDIKAN** menyatakan kebolehlaksanaan projek Sekolah Pendidikan Khas di tanah Pendidikan Simpang (Tanah PTP PT 280/ HSD 25368 dan Tanah PTP PT 281/ HSD 25369) dan bilakah pecah tanah projek ini boleh dijalankan.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam menyediakan infrastruktur pendidikan yang selamat dan kondusif untuk kegunaan murid dan warga sekolah di seluruh negara termasuk bagi murid berkeperluan khas.

Untuk makluman Ahli Yang Berhormat, KPM telah diluluskan projek Pembinaan Kompleks Pendidikan Khas Taiping Fasa 1 dalam Rancangan Malaysia Kedua Belas (RMKe-12), *Rolling Plan 2 (RP2)* tahun 2022 di atas tapak pendidikan PT 280 / HSD 25368 dan PT 281/ HSD 25369. Skop projek ini merangkumi pembinaan sekolah kebangsaan pendidikan khas yang mengandungi 20 bilik darjah berserta kelengkapan perabot dan peralatan serta lain-lain kemudahan. Projek ini akan dilaksanakan oleh Jabatan Kerja Raya (JKR). Berkaitan status semasa, projek adalah di peringkat susun atur konsep, manakala lantikan perunding akan dibuat pada 3 Oktober 2022. Tender untuk melantik kontraktor akan dilaksanakan pada April 2023 dan tarikh masuk tapak dijangka pada Julai 2023. Projek ini dijangka selesai pada Julai tahun 2026.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN NOOR AMIN BIN AHMAD
[KANGAR]**

TARIKH : 26 JULAI 2022 (SELASA)

SOALAN

minta **MENTERI PENGAJIAN TINGGI** menyatakan jumlah mahasiswa di Institut Pengajian Tinggi Awam (IPTA) yang berhenti atau ditamatkan pembelajaran mereka, jika ada, sejak Mac 2020 hingga Mac 2022. Berapa jumlah (dalam peratusan) mengikut sebab-sebab berhenti atau ditamatkan pembelajaran ini.

JAWAPAN

Tan Sri Yang di-Pertua,

Berdasarkan Sistem MyMoheS Kementerian Pengajian Tinggi (KPT), pada tahun 2021, seramai 17,613 pelajar (2.99%) daripada keseluruhan 589,879 pelajar sedia ada telah direkodkan sebagai tidak menamatkan pengajian di Universiti Awam (UA). Pada tahun 2020 pula, seramai 13,291 pelajar (2.27%) daripada 584,576 pelajar sedia ada telah direkodkan tidak menamatkan pengajian. Data rasmi bagi tahun 2022 hanya akan diterbitkan secara rasmi pada awal tahun 2023.

Antara faktor utama yang dikenal pasti adalah masalah kesihatan, masalah peribadi, gagal peperiksaan dan gagal mendaftar. Untuk makluman Ahli Yang Berhormat, KPT dan Institusi Pendidikan Tinggi Awam (IPTA) amat prihatin dan sentiasa berusaha membantu pelajar yang menghadapi masalah-masalah tersebut. Antara inisiatif di peringkat kementerian ialah menyediakan kemudahan biasiswa dan bantuan kewangan kepada golongan sasar yang layak termasuk pelajar golongan B40.

KPT menerusi IPTA juga turut menyediakan program intervensi akademik seperti sistem penasihat akademik atau PA, dan program intervensi bukan akademik seperti perkhidmatan kaunseling individu dan berkelompok, *buddy system*, program motivasi, program mentor-mentee, *Academic Special Program* dan pelbagai program lagi dari masa ke semasa bagi membantu pelajar-pelajar di IPTA meneruskan pengajian mereka.

Sekian, terima kasih.

SOALAN NO : 11

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' HAJI MOHD FASIAH BIN
HAJI MOHD FAKEH [SABAK BERNAM]**

TARIKH : 26 JULAI 2022 (SELASA)

SOALAN

DATO' HAJI MOHD FASIAH BIN HAJI MOHD FAKEH [SABAK BERNAM] minta **MENTERI PELANCONGAN, SENI DAN BUDAYA** menyatakan setakat manakah Kementerian telah mengenal pasti dan memajukan homestay dan inap desa di seluruh negara sesuai sebagai penyumbang penting dalam industri pelancongan negara masa kini.

JAWAPAN

Tuan Yang di-Pertua,

1. Inap desa atau dikenali sebagai Program Pengalaman Homestay Malaysia di bawah Kementerian Pelancongan, Seni dan Budaya (MOTAC) merupakan salah satu daripada produk pelancongan desa di Malaysia yang berjaya mendapat perhatian pelancong di peringkat domestik dan antarabangsa. Statistik semasa inap desa (homestay) pada tahun 2022 (sehingga 30 Jun 2022) yang direkodkan bagi pelancong domestik dan antarabangsa adalah sebanyak 201,390 pelancong dengan pendapatan kumulatif mencapai RM10.1 juta. Bagi kawasan Sabak Bernam, terdapat empat (4) buah kluster homestay dan untuk 6 bulan pertama tahun ini (1 Januari – 30 Jun 2022), homestay ini telah menjana pendapatan sebanyak RM14,562.
2. Konsep Program Pengalaman Homestay Malaysia adalah satu program pengalaman di mana di bawah program ini, perkhidmatan yang ditawarkan tidak terhad kepada perkhidmatan lojing sahaja seperti manajemen penginapan pelancongan yang lain. Melalui program ini, pelancong akan tinggal bersama keluarga tuan rumah pengusaha homestay yang telah berdaftar dengan MOTAC, dan seterusnya menjalani gaya hidup sehari-hari masyarakat Malaysia, khususnya komuniti tersebut. Selain itu, pelancong juga berpeluang untuk turut serta dalam aktiviti pelancongan berdasarkan komuniti (*community-based tourism*) seperti sukan rakyat, acara kebudayaan, merewang, perayaan, belajar tarian, memasak dan sebagainya yang terdapat di kawasan homestay berkenaan. Konsep utama yang ditekankan bagi program ini adalah *experiential tourism* dan *community-based tourism*.
3. Dalam memastikan program ini kekal maju dan berdaya saing, MOTAC telah menjalankan analisa bagi mengenalpasti keperluan semasa program ini melalui statistik penerimaan pengunjung/pelancong ke inap desa (homestay) serta penjanaan pendapatan yang menyumbang kepada industri pelancongan desa ini.

SOALAN NO : 11

4. MOTAC juga telah menambah baik dan memperluas konsep melalui Garis Panduan Program Pengalaman Homestay Malaysia mengikut keperluan semasa bagi memudahcara dan menarik minat lebih ramai pengusaha baharu inap desa untuk menyertai program ini. Antaranya seperti memperluaskan radius pendaftaran bagi mewujudkan sesbuah kluster inap desa (homestay) baru dan bilangan bilik serta bilangan pengusaha bagi setiap kluster inap desa (homestay).
5. Selain itu, penambahbaikan ini juga bertujuan untuk menarik perhatian dan minat golongan muda untuk menyertai Program Pengalaman Homestay Malaysia melalui idea-idea baharu yang lebih menarik melalui konsep budaya dan suasana kampung yang masih dikekalkan dengan mewujudkan kategori bagi Kampungstay seperti Chalet Kampungstay, Inovatif Kampungstay seperti kontena dan glamping serta Farm/Agro Kampungstay.
6. Usaha MOTAC untuk meningkatkan perkhidmatan inap desa (homestay) turut dilaksanakan melalui pelaksanaan inisiatif Geran Padanan Pembangunan Inap Desa (Homestay) di bawah Pelan Pemulihan Pelancongan berjumlah RM30 juta. Sehingga kini, Geran Padanan Pembangunan Inap Desa (Homestay) telah menerima 1,300 permohonan daripada pengusaha program ini.
7. Menerusi inisiatif ini, Kerajaan telah memberi komitmen untuk memulih dan memangkin pembaharuan beberapa sektor tumpuan seperti industri pelancongan yang merupakan antara industri yang paling terjejas teruk akibat pandemik COVID-19. Skop pembangunan/penyelenggaraan inap desa (homestay) meliputi kerja-kerja pembangunan dan penyelenggaraan fasiliti yang disediakan untuk pelancong di premis atau di kemudahan yang telah didaftarkan di bawah Program Pengalaman Homestay Malaysia dengan penekanan kepada aspek keselamatan serta keselesaan pelancong.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATUK SERI DR. HAJI DZULKEFLY BIN AHMAD [KUALA SELANGOR]
TARIKH : 26 JULAI 2022 (SELASA)

SOALAN

DATUK SERI DR. HAJI DZULKEFLY BIN AHMAD [KUALA SELANGOR] minta **MENTERI KEWANGAN** menyatakan apakah Kerajaan memantau kesan dari kenaikan Kadar Pinjaman Semalam atau OPR baru-baru ini kepada rakyat dan sektor perniagaan.

JAWAPAN

Tuan Yang di-Pertua,

Matlamat utama dasar monetari di Malaysia yang ditentukan oleh Jawatankuasa Dasar Monetari (*Monetary Policy Committee*, MPC) Bank Negara Malaysia adalah untuk mencapai kestabilan harga dan pertumbuhan ekonomi yang mampan untuk tempoh jangka masa panjang. Dalam melaksanakan mandat ini, MPC menentukan hala tuju dasar monetari berdasarkan penilaian terhadap imbangan risiko kepada prospek pertumbuhan inflasi dan ekonomi dalam negeri.

MPC juga memantau risiko keadaan kewangan yang tidak seimbang bukan hanya daripada aspek kestabilan kewangan semata-mata, tetapi juga daripada aspek bagaimana risiko keadaan kewangan ini boleh menjelaskan prospek ekonomi negara secara keseluruhan. Selain itu, MPC juga mengambil kira pelbagai aspek untuk kebaikan jangka masa panjang negara dan rakyat termasuklah prospek pasaran pekerjaan,

pertumbuhan guna tenaga serta gaji dan upah dalam melaksanakan keputusannya.

Perkara ini adalah penting kerana inflasi yang tidak terkawal berpotensi menghasilkan keadaan ekonomi yang bersifat “boom and bust” dan menimbulkan kesan negatif ke atas ekonomi negara dan kesejahteraan rakyat dan sektor perniagaan. Malah, setiap kali keadaan inflasi menjadi tidak terkawal, golongan yang paling terkesan ialah golongan berpendapatan rendah. Kadar inflasi yang tinggi disebabkan oleh permintaan yang berlebihan juga akan memberi kesan yang lebih buruk kepada ekonomi. Justeru, MPC bertanggungjawab untuk bertindak dengan mengambil langkah awalan (*pre-emptive*) bagi mengelakkan hal ini daripada berlaku dan langkah ini juga selaras dengan usaha Kerajaan untuk mengurus dan mengurangkan tekanan inflasi yang semakin meningkat.

Tuan Yang di-Pertua,

Pengalaman di seluruh dunia telah menunjukkan bahawa kadar inflasi yang tinggi boleh memberikan kesan yang buruk terhadap ekonomi dan juga taraf kehidupan rakyat. Oleh itu, kadar inflasi yang rendah dan stabil adalah merupakan aspek yang penting untuk mengekalkan pertumbuhan ekonomi. Selama enam dekad, Kerajaan menerusi BNM telah melaksanakan tanggungjawab ini dan ia terbukti dengan jelas jika dilihat daripada kadar inflasi negara yang rendah dan sektor kewangan yang kukuh. Kedua-dua faktor ini adalah penting dalam menyokong pertumbuhan ekonomi yang mampan. Apabila ekonomi Malaysia berdepan dengan krisis COVID-19, kadar OPR diturunkan daripada 3.00% kepada 1.75% pada tahun 2020, iaitu paras yang terendah dalam sejarah. Kini, ekonomi negara berada pada landasan pemulihan dan tidak lagi dalam krisis. Aktiviti perbelanjaan isi rumah, pembelian aset seperti kereta dan aktiviti pelaburan juga telah kembali rancak. Malah, kadar pertumbuhan ekonomi pada tahun 2022 dijangka mencatat antara 5.3 peratus hingga 6.3 peratus. Tambahan pula, pertumbuhan KDNK suku pertama 2022 (5.0%) telah melepassi paras pra-pandemik. Kadar inflasi

yang telah meningkat naik bukan sahaja didorong oleh tekanan daripada segi penawaran (*supply*), malah telah menunjukkan tanda-tanda tekanan permintaan, yang boleh menyumbang kepada kenaikan inflasi tarikan permintaan (*demand pull inflation*). Inflasi pula dijangka mencatat purata 2.2 peratus sehingga 3.2 peratus pada tahun 2022 dan berkemungkinan meningkat sekiranya langkah-langkah awalan tidak diambil. Sekiranya tindakan tidak diambil dengan melaraskan kadar OPR, situasi ini boleh menyebabkan pertambahan aliran dana keluar negara dan boleh menjasikan nilai ringgit dan meningkatkan lagi inflasi negara.

Berdasarkan faktor-faktor ini, MPC mengambil keputusan untuk melaraskan kadar OPR secara beransur-ansur dengan menaikkan OPR sebanyak 25 mata asas pada bulan Mei 2022 dan 25 mata asas lagi pada bulan Julai 2022. Pada paras terkini iaitu 2.25 peratus, OPR akan terus menyokong pertumbuhan ekonomi negara. Namun demikian, kadar tersebut masih jauh lebih rendah daripada paras pra-pandemik sebanyak 3.00%. Kenaikan OPR juga adalah teratur dan seiring dengan jangkaan pasaran. Pendekatan kenaikan OPR secara beransur-ansur ini adalah sangat penting untuk mengelakkan tekanan pada masa akan datang melalui peningkatan kadar OPR secara tergesa-gesa dan pada magnitud yang besar seperti yang berlaku di Amerika Syarikat (kadar inflasi: 9.1%), di Filipina (kadar inflasi: 6.1%) dan di Turki (kadar inflasi: 78.6%) yang boleh merencatkan pertumbuhan ekonomi dan menjasaskan kesejahteraan rakyat. Sebagai contoh di Amerika Syarikat, berikutnya kenaikan mendadak kadar inflasi yang berpunca daripada faktor permintaan dan penawaran, dasar monetari di negara itu terpaksa dilaksanakan secara agresif dan dalam kadar kenaikan yang tinggi (kenaikan kumulatif sebanyak 150 mata asas dari Januari sehingga Julai 2022).

Tuan Yang di-Pertua,

Mengenai impak kepada bayaran balik pinjaman pula, BNM berpandangan bahawa kenaikan kadar OPR secara beransur-ansur tidak akan memberi kesan yang ketara kepada pihak peminjam. Keadaan ini

NO SOALAN :12

adalah berikut satu pertiga pinjaman oleh golongan B40 adalah pada kadar tetap dan tidak akan terkesan dengan kenaikan OPR. Bagi peminjam pinjaman kadar terapung pula, kenaikan bayaran balik bulanan tidak akan meningkat secara ketara. Pada masa yang sama, para pendeposit juga mendapat manfaat melalui pulangan yang lebih tinggi, yang akan menggalakkan individu menambah simpanan bagi membina semula penampang kewangan mereka yang telah terjejas akibat krisis COVID-19.

Kerajaan menerusi BNM juga ingin menekankan bahawa pelbagai program bantuan masih tersedia untuk mengurangkan impak terhadap golongan peminjam mudah terjejas (*vulnerable groups*). Golongan ini termasuk kumpulan berpendapatan rendah dan sektor perniagaan yang lebih terjejas akibat pandemik COVID-19. Bantuan tersebut termasuk kemudahan di bawah Dana BNM untuk Perusahaan Kecil dan Sederhana (PKS), bantuan bayaran balik pinjaman secara bersasar oleh bank, serta khidmat nasihat dan bantuan di bawah pelbagai program AKPK untuk isi rumah dan PKS iaitu Program Pengurusan Kredit (PPK) dan Skim Penyelesaian Pinjaman Kecil (SPPK).

BNM melalui MPC juga telah menyatakan bahawa sebarang pelarasan dasar monetari pada masa hadapan akan dilaksanakan secara terkawal dan beransur-ansur supaya tidak menjelaskan pemulihan ekonomi Malaysia. Dalam menentukan masa, kadar dan tahap pelarasan OPR, keputusan MPC akan terus berpandukan maklumat dan perkembangan baharu yang boleh memberi kesan ketara terhadap prospek keseluruhan inflasi dan pertumbuhan dalam negeri. Selain itu, kesan kenaikan OPR kepada ekonomi akan terus dipantau bagi memastikan momentum pemulihan dan pertumbuhan ekonomi Malaysia tidak terjejas selepas mengharungi krisis.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN YUSUF BIN ABD. WAHAB
[TANJONG MANIS]**

TARIKH : 26 JULAI 2022 (SELASA)

SOALAN

TUAN YUSUF BIN ABD. WAHAB [TANJONG MANIS] minta **MENTERI KANAN PENDIDIKAN** menyatakan berapa peruntukan untuk membaiki sekolah daif di Parlimen Tanjong Manis pada tahun ini dan apakah senarai sekolah-sekolah tersebut. Apakah status terkini kerja-kerja pembinaan sekolah SK Penibong dan SK Serdeng. Apakah status pembaikan blok darjah yang retak dan pemberian blok asrama murid yang rosak terbakar di SK Orang Kaya Muda Pakeri Paloh.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam menyediakan infrastruktur pendidikan yang selamat dan kondusif untuk kegunaan murid dan warga sekolah di seluruh negara termasuk di Sarawak. Ini adalah penting untuk memastikan pengajaran dan pembelajaran dilaksanakan dalam keadaan selamat serta selesa di sekolah.

Untuk makluman Ahli Yang Berhormat, sejak tahun 2016 sehingga 2022, sebanyak 14 projek menaik taraf dan membangunkan semula bangunan daif sekolah telah diluluskan di Parlimen Tanjong Manis dengan kos berjumlah RM69.44 juta. Sehingga 25 Julai 2022, sebanyak enam projek

SOALAN NO : 13

telah siap, satu projek berada dalam peringkat pembinaan dan tujuh projek lagi berada dalam peringkat prabina.

Senarai 14 sekolah yang terlibat adalah:

- i. SK St. Andrew;
- ii. SK Sg Selidap;
- iii. SK Bukit Kinyau;
- iv. SK Muara Payang;
- v. SK Kg Serdeng;
- vi. SK Abang Amin;
- vii. SK Adin;
- viii. SK Kg Bruit;
- ix. SK Kg Penipah;
- x. SK Abang Buyuk;
- xi. SK Kg Serdeng;
- xii. SK Kg Betanak;
- xiii. SK Salah Kechil; dan
- xiv. SK Abang Haji Matalir.

Bagi SK Kg Penibong, projek menaik taraf dan membangunkan semula bangunan daif di sekolah ini telah diluluskan dalam Rancangan Malaysia Kesebelas (RMKe-11), *Rolling Plan 4* (RP4) tahun 2019. Status projek ini berada dalam peringkat pembinaan dengan kemajuan fizikal sebanyak 79 peratus dan dijangka siap pada 30 Oktober 2022.

Bagi SK Kg Serdeng pula, terdapat dua projek telah diluluskan pada tahun 2019 dan 2021. Bagi tahun 2019, projek yang diluluskan adalah menaik taraf dan membangunkan semula bangunan daif di sekolah yang meliputi skop roboh dan gantian empat unit rumah guru. Projek ini telah siap pada 24 April 2022. Bagi tahun 2021, projek yang diluluskan adalah meliputi skop projek pembinaan gantian enam bilik darjah, satu unit prasekolah, dua unit kuarters dan tandas pelajar dan guru. Status terkini pelaksanaan projek adalah di peringkat prabina.

Untuk makluman Ahli Yang Berhormat, bagi SK Orang Kaya Muda, Paloh, KPM melalui Pejabat Pendidikan Daerah (PPD) Daro dan Jabatan Kerja Raya (JKR) Malaysia telah mengambil tindakan segera dengan

SOALAN NO : 13

mengadakan lawatan pemeriksaan bangunan yang retak di sekolah tersebut pada 17 Februari 2022. Pasukan forensik JKR Malaysia mendapati ujian bahan perlu dilaksanakan pada bangunan yang mengalami keretakan untuk menilai tahap keselamatan serta mengesahkan *structure serviceability* bangunan yang terlibat. Lawatan tapak bersama kontraktor yang terlibat dalam pelawaan sebut harga bagi ujian bahan bersama JKR Malaysia telah dilaksanakan pada 20 Julai 2022.

Berkaitan blok asrama lelaki yang terbakar di sekolah ini, pihak sekolah telah menempatkan murid yang terlibat di blok asrama perempuan sebagai kediaman sementara. Pihak sekolah turut membuat pengasingan bagi penempatan murid lelaki di blok asrama perempuan. Murid perempuan menggunakan bilik mandi di tingkat atas dengan laluan masuk yang berasingan, manakala murid lelaki menggunakan bilik mandi sementara di tingkat bawah. Jabatan Pendidikan Negeri (JPN) Sarawak juga telah berhubung dengan Petronas berkaitan kejadian kebakaran yang berlaku dan pihak Petronas bersedia untuk membina semula atau membaik pulih bangunan asrama murid lelaki yang terbakar. Kerja-kerja membaik pulih atau penggantian blok asrama akan dilaksanakan tertakluk kepada laporan pemeriksaan dan syor yang dikeluarkan oleh JKR Sarawak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN HASSAN BIN ABDUL KARIM
[PASIR GUDANG]
TARIKH : 26 JULAI 2022 (SELASA)

SOALAN

TUAN HASSAN BIN ABDUL KARIM [PASIR GUDANG] minta **MENTERI KEWANGAN** menyatakan apakah langkah-langkah yang telah diambil oleh Kerajaan untuk memastikan Kerajaan mampu untuk menyediakan peruntukan subsidi sebanyak RM80 bilion setahun bagi memastikan kelangsungan hidup rakyat.

JAWAPAN

Tuan Yang di-Pertua,

Perbelanjaan Kerajaan Persekutuan secara keseluruhan dijangka meningkat dengan ketara berbanding anggaran Bajet 2022 sebanyak RM332.1 bilion. Senario ini disebabkan oleh peningkatan mendadak subsidi dan bantuan sosial yang diunjurkan melonjak kepada RM77.7 bilion berbanding dengan bajet sebanyak RM31 bilion ekoran kenaikan harga komoditi dunia dan usaha Kerajaan untuk membantu rakyat menghadapi cabaran peningkatan kos sara hidup.

Walaupun terdapat dakwaan Kerajaan mengurangkan bantuan dan subsidi, hakikatnya adalah Kerajaan bukan sahaja telah meneruskan pemberian subsidi kepada rakyat tetapi tanggungannya telah meningkat dengan mendadak terutamanya yang berkaitan petroleum dan minyak. Di samping itu, Kerajaan juga telah memperkenalkan subsidi baharu yang tidak termasuk dalam Bajet 2022 seperti subsidi ayam dan telur serta

elektrik bagi melindungi rakyat daripada kesan penuh kenaikan harga makanan dan komoditi dunia.

Andaian harga minyak mentah dunia yang digunakan dalam Bajet 2022 untuk anggaran hasil dan subsidi adalah pada paras USD66 setong tetapi harga minyak semasa telah meningkat melebihi USD100 setong. Bagi minyak sawit mentah (CPO) pula andaian Bajet 2022 adalah RM3,444 setan metrik tetapi purata harga minyak sawit sehingga kini telah melebihi RM6,000 setan metrik. Walaupun harga minyak mentah dan sawit yang lebih tinggi ini diunjurkan menjana hasil cukai tambahan melebihi RM10 bilion tetapi peningkatan ini jauh tidak mencukupi untuk menampung peningkatan subsidi yang melebihi RM40 bilion.

Selain hasil cukai tambahan berkaitan minyak, ekonomi negara menunjukkan momentum pemulihan ekonomi yang kukuh susulan pembukaan semula ekonomi dengan pertumbuhan KDNK pada suku pertama mencapai 5% dan dijangka lebih kukuh untuk suku kedua. Pemulihan yang lebih kukuh ini dijangka menyumbang kepada tambahan hasil cukai pendapatan syarikat dan juga peningkatan cukai tidak langsung berikutan perbelanjaan domestik. Dengan tren positif tersebut, Kementerian Kewangan menjangka peningkatan kutipan hasil cukai langsung dan tidak langsung termasuk langkah cukai Bajet 2022 yang akan menyumbang hasil tambahan melebihi RM10 bilion.

Memandangkan harga komoditi global dijangka akan kekal pada paras tinggi untuk separuh tahun kedua 2022, Kerajaan akan terus meneliti sumber hasil dan penjimatan tambahan bagi menampung keperluan tambahan subsidi bagi separuh tahun kedua 2022. Sehubungan itu, Kementerian Kewangan telah mengeluarkan Pekeliling Perbendaharaan 3.1 pada 14 Julai 2022 mengenai langkah penjimatan untuk dilaksanakan di peringkat semua Kementerian dan agensi Kerajaan untuk mengenalpasti penjimatan perbelanjaan bagi menampung sebahagian daripada keperluan subsidi tambahan. Antara langkah yang termasuk dalam Pekeliling Perbendaharaan 3.1 adalah kawalan terhadap lawatan luar negara, barangang import serta menangguhkan perbelanjaan yang belum komited dan tidak mengimpakkan rakyat. Ini juga bermakna projek yang disasarkan untuk tahun 2022 akan dikaji

NO SOALAN :14

semula untuk memastikan hanya projek yang benar-benar perlu dimulakan dalam tahun ini dan yang selainnya akan ditangguhkan dahulu.

Untuk makluman Yang Berhormat, pendekatan subsidi semasa yang melibatkan harga bersubsidi diberi secara pukal kepada semua penduduk di Malaysia tidak dapat ditampung selamanya (*unsustainable*). Pada masa ini, harga yang dibayar oleh semua di peringkat runcit untuk petrol RON95, diesel, LPG dan minyak masak adalah kurang daripada setengah harga sebenar tanpa subsidi. Sebagai contoh, Kerajaan telah mengekalkan harga pam RON95 pada RM2.05 seliter sementara harga jika tiada subsidi telah mencapai RM4.70 seliter pada bulan Jun 2022.

Tuan Yang di-Pertua,

Dengan itu, Kerajaan sedang menyemak dan menilai semula keberkesanan setiap program subsidi dan insentif yang dilaksanakan bagi memastikan peruntukan yang optimum disediakan untuk setiap program dan membolehkan penjimatan yang diperoleh disalurkan kepada mereka yang lebih memerlukan. Sehubungan itu, Kementerian Kewangan sedang memperincikan kaedah pelaksanaan subsidi secara bersasar bagi barang bersubsidi seperti produk petroleum untuk mengkaji kaedah terbaik untuk melaksanakan subsidi tersebut dari segi keterimaan rakyat dan kebolehlaksanaan kaedah. Pada masa yang sama, Kerajaan juga mengkaji mekanisme untuk merasionalisasikan subsidi yang diberikan secara pukal serta turut memperkuuhkan bantuan langsung kepada golongan berpendapatan rendah dan yang memerlukan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK HAJAH RUBIAH BINTI
HAJI WANG (KOTA SAMARAHAN)**

TARIKH : 26 JULAI 2022 (SELASA)

SOALAN

DATUK HAJAH RUBIAH BINTI HAJI WANG (KOTA SAMARAHAN)
minta **MENTERI TENAGA DAN SUMBER ASLI** menyatakan jumlah
pencapaian mengenai Agenda Hijau dan Kelestarian Tenaga Negara.

JAWAPAN

Tuan Yang di-Pertua,

1. Untuk makluman Ahli Yang Berhormat, selaras dengan aspirasi negara untuk mencapai negara neutral karbon menjelang tahun 2050, Kementerian Tenaga dan Sumber Asli sebagai Kementerian yang bertanggungjawab terhadap industri pembekalan elektrik negara, telah menetapkan sasaran untuk melestarikan sumber penjanaan elektrik negara melalui peningkatan kapasiti Tenaga Boleh Baharu (TBB) kepada 31% pada tahun 2025 dan 40% pada tahun 2035.
2. Sehingga bulan Mac 2022, jumlah kapasiti terpasang TBB telah mencapai 9,381MW atau 23% daripada keseluruhan kapasiti terpasang bekalan elektrik negara. Jumlah kapasiti terpasang TBB ini telah menyumbang kira-kira 70% daripada jumlah kapasiti TBB yang perlu dicapai pada tahun 2025. KeTSA akan meneruskan usaha untuk memastikan supaya baki 30% daripada kapasiti TBB yang telah disasarkan bagi tahun 2025 akan dicapai melalui pelaksanaan program-program yang telah dirancang termasuk:

- i) Proram Solar Berskla Besar
- ii) Program Net Energy Metering
- iii) Program Feed-in Tariff

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN CHONG CHIENG JEN [STAMPIN]
TARIKH : 26 JULAI 2022 (SELASA)

SOALAN

TUAN CHONG CHIENG JEN [STAMPIN] minta **MENTERI KEWANGAN** menyatakan jumlah kerugian pendeposit-pendeposit bank yang dimangsakan oleh *scam* bank di mana wang mereka telah dipindah tanpa pengetahuan mereka dalam tahun 2021 dan 2022.

JAWAPAN

Tuan Yang di-Pertua,

Untuk makluman Yang Berhormat,

Jenayah penipuan adalah satu kesalahan yang termaktub dalam Kanun Keseksaan dan siasatannya adalah dalam bidang kuasa pihak Polis Diraja Malaysia (PDRM). Sebarang insiden jenayah penipuan haruslah dilaporkan terus kepada pihak PDRM untuk siasatan lanjut. Menurut statistik daripada PDRM, jumlah kes jenayah atas talian pada tahun 2021 hingga 30 Jun 2022 adalah 31, 169 kes. Jenayah atas talian ini merangkumi penipuan secara belian atas talian, pinjaman tidak wujud, African Scam/ Love Scam, Macau Scam, pelaburan, *Business Email Compromise* dan Tipu SMS.

BNM dan institusi-institusi kewangan telah mengadakan kerjasama dengan pelbagai agensi penguatkuasaan seperti PDRM, Suruhanjaya Pencegahan Rasuah Malaysia, Kementerian Perdagangan Dalam Negeri

NO SOALAN :16

dan Hal Ehwal Pengguna, Suruhanjaya Syarikat Malaysia dan Suruhanjaya Sekuriti yang merangkumi kegiatan pemantauan, siasatan dan pendakwaan di mahkamah. Selain itu, usaha bagi meningkatkan kesedaran orang ramai mengenai penipuan kewangan turut dilipatgandakan menerusi siri taklimat kesedaran secara dalam talian serta program orang ramai, menggunakan saluran media dan juga laman media sosial.

BNM juga turut mengeluarkan peringatan kepada pemegang akaun yang mendapati wujudnya transaksi meragukan melibatkan akaun bank mereka, untuk memaklumkan kepada pihak bank, menghubungi talian CCID Scam Response Centre (Jabatan Siasatan Jenayah Komersil, PDRM) serta boleh menghubungi BNMTELELINK dengan segera. Tindakan ini akan memudahkan pengambilan langkah-langkah segera oleh PDRM dengan kerjasama BNM dan institusi kewangan bagi membantu melindungi akaun-akaun yang terjejas.

Pihak BNM juga bekerjasama dengan pihak Suruhanjaya Komunikasi dan Multimedia Malaysia (SKMM) dan syarikat-syarikat telekomunikasi untuk mempertingkatkan keselamatan saluran komunikasi dan multimedia untuk menyekat terbitan mesej palsu dan penyebaran perisian hasad (*malware*) oleh sindiket penipuan kewangan, di samping menyeraihitamkan nombor telefon dan peranti mudah alih yang terlibat dalam kes penipuan kewangan. Bagi memulihkan keyakinan rakyat atas keselamatan wang mereka yang disimpan di institusi kewangan, Kerajaan ingin menegaskan bahawa institusi perbankan mengamalkan piawaian sistem keselamatan yang tinggi bagi melindungi akaun pelanggan mereka. Kerajaan melalui BNM juga secara berterusan memperkuuh garis panduan dan dasar keselamatan perbankan yang perlu dipatuhi oleh institusi-institusi kewangan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK HAJI AHMAD JAZLAN BIN YAAKUB
[MACHANG]**

TARIKH : 26 JULAI 2022 (SELASA)

SOALAN

DATUK HAJI AHMAD JAZLAN BIN YAAKUB [MACHANG] minta **MENTERI KANAN PENDIDIKAN** menyatakan apakah status kajian Kurikulum Standard Sekolah Rendah (KSSR) yang telah dikritik hebat oleh para guru atas dakwaan silibus Matematik Tahun 1 beraras tinggi yang membebankan guru dan para pelajar.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa berusaha untuk memastikan kurikulum yang digubal relevan dengan keadaan semasa. Dalam konteks penggubalan kurikulum, KPM akan melaksanakan semakan semula kurikulum selepas kitaran kurikulum lengkap pusingannya. Kohort pertama Kurikulum Standard Sekolah Menengah (KSSM) murid Tingkatan 1 dimulakan pada tahun 2017 dan lengkap kitarannya pada tahun 2021/2022 apabila murid tersebut tamat Tingkatan 5. Bagi Kurikulum Standard Sekolah Rendah (KSSR) pula, kohort pertama murid Tahun 1 dimulakan pada tahun 2017 dan akan lengkap kitarannya pada kalender akademik 2022/2023 apabila murid tersebut tamat Tahun 6. Sehubungan dengan itu, pada masa ini KPM sedang melaksanakan semakan semula KSSM dan KSSR, termasuk kurikulum bagi mata pelajaran Matematik Tahun 1.

Untuk makluman Ahli Yang Berhormat, antara komponen utama kurikulum persekolahan adalah kandungan (ilmu pengetahuan) dan pedagogi. Semakan KSSM and KSSR antara lain melibatkan kedua-dua komponen ini. Antara pendekatan yang digunakan untuk mendapatkan maklum balas daripada pelbagai pihak berkepentingan adalah menerusi sesi libat urus, kajian, persidangan, pemantauan serta analisis perbandingan dengan negara lain.

Dalam konteks kandungan (ilmu pengetahuan), semakan kandungan mata pelajaran dilaksana seiring dengan keperluan masa kini dan akan datang. Penilaian akan dibuat untuk menentukan tindakan susulan sama ada kandungan mata pelajaran tersebut perlu disusun semula, digugur, ditambah, dicantum, dicantas, diselaraskan atau dikekalkan. Dalam hal ini, analisis keperluan dapat dilaksana bagi menentukan perkembangan terkini bidang ilmu, kedalaman dan keluasan bidang ilmu serta keperluan bagi melaksanakan sesuatu kurikulum baharu.

Elemen pedagogi merupakan komponen penting untuk pengajaran yang berkesan dan seterusnya dapat menghasilkan pengajaran dan pembelajaran (PdP) yang bermakna. Dapatan semakan dan penilaian

SOALAN NO : 17

kurikulum akan digunakan untuk mengenal pasti kaedah pedagogi terbaik dengan mengambil kira pendekatan yang bersesuaian mengikut tahap kognitif dan gaya pembelajaran murid.

Untuk makluman Ahli Yang Berhormat, sesi libat urus bersama pihak berkepentingan sedang giat dijalankan bagi mendapatkan input dan maklumat tentang pelaksanaan kurikulum semasa. Hasil dapatan sesi libat urus tersebut akan dianalisis dengan terperinci dan laporan kajian disediakan bagi mengenal pasti serta melaksana tindakan susulan yang perlu dilakukan.

KPM yakin usaha yang dilakukan ini dapat memastikan kurikulum pendidikan sentiasa relevan dengan perkembangan pendidikan pada masa ini dan masa depan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS, TAHUN 2022**

PERTANYAAN : LISAN

**DARIPADA : PUAN RUSNAH BINTI ALUAI
(TANGGA BATU)**

TARIKH : 26 JULAI 2022

SOALAN

PUAN RUSNAH BINTI ALUAI (TANGGA BATU) minta **MENTERI PEMBANGUNAN WANITA, KELUARGA DAN MASYARAKAT** menyatakan bagaimanakah pihak Kementerian dapat menangani kes-kes gangguan seksual tidak mengira gender di tempat kerja secara efektif dan menyeluruh.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) amat prihatin dan serius dalam menangani serta menghapuskan diskriminasi berasaskan gender terutamanya dalam soal gangguan seksual.

Buat masa ini, kes gangguan seksual ditangani melalui pelbagai Akta dan peraturan seperti Kanun Keseksaan [Akta 574], Akta Komunikasi dan Multimedia 1998 [Akta 588], Akta Kerja 1955 [Akta 265] dan Kod Amalan untuk Mencegah dan Membasmi Gangguan Seksual di Tempat Kerja bagi sektor swasta, Peraturan-Peraturan Pegawai Awam (Kelakuan dan Tatatertib) (Pindaan) 2002 [P.U (A) 246/2002] dan MyPPSM (Ceraian PO.3.1.2) Garis Panduan Pengendalian Kes Gangguan Seksual Di Tempat Kerja Perkhidmatan Awam bagi sektor awam.

Pada tahun 2012, pindaan telah dibuat dalam Akta Kerja 1955 [Akta 265] di mana peruntukan berkenaan gangguan seksual telah ditambah di bawah Seksyen 81. Seksyen 2 di bawah Akta Kerja ini mendefinisikan gangguan seksual sebagai “sebarang kelakuan berunsur seksual, sama ada secara lisan, bukan lisan, visual, psikologi atau fizikal, yang ditujukan kepada pekerja di mana ia merupakan satu pencabulan maruah, atau penghinaan atau ancaman terhadap dirinya, di mana ia timbul pada dan sepanjang masa penggajiannya”.

Akta Kerja 1955 [Akta 265] juga terhad kepada sektor pekerjaan sahaja, tidak termasuk Sabah dan Sarawak dan bergantung kepada keputusan majikan untuk menjalankan siasatan ke atas aduan gangguan seksual.

Bagi sektor awam, pemakaian Peraturan dan Pekeliling pengendalian kes gangguan seksual di tempat kerja adalah terhad kepada sektor pekerjaan dan tidak mengikat daripada segi perundangan kecuali jika telah sabit kesalahan dan dikenakan tindakan tatatertib di bawah [P.U.(A)395/1993].

SOALAN NO. : 18

Menyedari wujudnya kekangan daripada sudut perundangan dan polisi sedia ada terhadap isu gangguan seksual, Kementerian telah mengambil inisiatif untuk menggubal Rang Undang-Undang Antigangguan Seksual (RUU AGS) sebagai forum alternatif untuk mendengar dan menyelesaikan aduan gangguan seksual dengan murah (mampu), mudah dan cepat.

RUU ini turut digubal sebagai satu manifestasi penting bahawa kesalahan gangguan seksual merupakan satu pelanggaran kepada hak asasi manusia, suatu bentuk keganasan berasaskan gender dan diskriminasi terhadap mangsa. RUU AGS ini telah diluluskan di Dewan Rakyat pada 20 Julai 2022. Terima kasih diucapkan kepada Yang Berhormat sekalian atas sokongan ke atas RUU AGS ini dan semoga setiap niat dan tugas kita yang menjaga kumpulan sasar ini mendapat keberkatan dan balasan baik di sisi Allah SWT.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK DR. HASAN BIN BAHROM
(TAMPIN)**

TARIKH : 26 JULAI 2022 (SELASA)

SOALAN

DATUK DR. HASAN BIN BAHROM (TAMPIN) minta **MENTERI TENAGA DAN SUMBER ASLI** menyatakan apakah tindakan Kementerian dalam menangani masalah gangguan binatang liar seperti monyet dan babi hutan, wajarkah Kementerian berhasrat untuk menggubal satu rang undang-undang yang berkaitan dengan membenarkan pengusaha kebun buah-buahan memiliki dan menggunakan Air Gun bagi mengawal kebun tanaman mereka daripada gangguan binatang liar.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian Tenaga dan Sumber Asli (KeTSA) melalui Jabatan Perlindungan Hidupan Liar dan Taman Negara (PERHILITAN) telah melaksanakan beberapa tindakan bagi menangani konflik hidupan liar terutamanya spesies kera dan babi hutan melalui kaedah-kaedah seperti berikut:
 - (a) menjalankan program penakaian hidupan liar di kawasan yang berisiko;
 - (b) menjalankan program bersepadu dengan agensi seperti Jabatan Sukarelawan Malaysia (RELA) dan penduduk kampung bagi membasmi musuh tanaman;
 - (c) menjalankan program pemasangan perangkap komuniti bagi tujuan menangkap hidupan liar konflik; dan
 - (d) menyediakan program kontrak menangkap hidupan liar konflik melalui pemasangan perangkap dengan kerjasama pihak swasta.
2. Pada masa ini, KeTSA berpandangan tiada keperluan untuk menggubal satu rang undang-undang yang berkaitan bagi membenarkan pengusaha kebun buah-buahan memiliki dan menggunakan *Air Gun* untuk mengawal kebun tanaman mereka daripada gangguan hidupan liar kerana perundangan sedia ada sudah memadai.
3. Peruntukan Seksyen 54, Akta Pemuliharaan Hidupan Liar 2010 [Akta 716] menjelaskan bahawa pemunya ladang atau penduduk tanah boleh menangkap atau membunuh hidupan liar untuk melindungi tanaman mereka. Walau bagaimanapun, kebenaran untuk menangkap dan membunuh hidupan liar konflik ini adalah tertakluk kepada beberapa syarat yang perlu dilakukan oleh pemunya ladang atau penduduk tanah seperti berikut:

SOALAN NO : 20

- (a) berusaha secara munasabah untuk menakutkan hidupan liar terlebih dahulu sebelum tindakan menangkap dan membunuh dijalankan;
- (b) jika hidupan liar berhenti membuat kerosakan, hidupan liar itu tidak boleh ditangkap atau dibunuh;
- (c) melaporkan kepada Jabatan PERHILITAN yang berhampiran tanpa kelengahan mengenai butir-butir kejadian menangkap dan membunuh hidupan liar konflik termasuk spesies hidupan liar terlibat, jenis kerosakan, jenis senjata yang digunakan dan tindakan yang telah dilakukan sama ada hidupan liar ditangkap atau dibunuh; dan
- (d) hidupan liar yang ditangkap atau dibunuh hendaklah menjadi harta Negeri dan tanpa kelengahan diserahkan kepada pegawai Jabatan PERHILITAN.

4. Selain itu, peruntukan Seksyen 9 Akta 716 menjelaskan bahawa hidupan liar yang dilindungi seperti kera dan babi hutan boleh diburu tertakluk kepada kelulusan permohonan lesen di bawah seksyen 12 dan 14 Akta 716. Dalam hal ini, pemunya ladang atau penduduk tanah boleh mengemukakan permohonan lesen bagi tujuan memburu hidupan liar tersebut.

5. Di samping itu, pegawai Jabatan PERHILITAN turut diberi kuasa di bawah peruntukan Seksyen 52 Akta 716 untuk memburu mana-mana hidupan liar yang berbahaya kepada nyawa atau harta manusia.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN MUHAMMAD BAKHTIAR BIN WAN CHIK
[BALIK PULAU]**

TARIKH : 26 JULAI 2022 (SELASA)

SOALAN

TUAN MUHAMMAD BAKHTIAR BIN WAN CHIK [BALIK PULAU]
minta **MENTERI PELANCONGAN, SENI DAN BUDAYA** menyatakan :-

- (a) strategi Kementerian untuk membantu syarikat perhotelan yang terpaksa berhadapan cabaran tidak cukup pekerja sehingga terpaksa menolak banyak tempahan khususnya para pelancong asing; dan
- (b) usaha Kerajaan dalam menggalakkan bangunan hotel sedia ada mengadaptasi bangunan hijau selain daripada insentif pengecualian cukai.

JAWAPAN

Tuan Yang di-Pertua,

1. Sektor pelancongan negara kini kembali bangkit setelah pembukaan semula sempadan negara bermula pada 1 April 2022. Walau bagaimanapun semua sektor perkhidmatan di Malaysia, termasuklah sektor pelancongan mengalami masalah kekurangan pekerja.
2. Dalam hal ini, Kementerian Pelancongan, Seni dan Budaya (MOTAC) telah bekerjasama rapat dengan Pertubuhan Keselamatan Sosial (PERKESO) bagi menangani isu kekurangan tenaga kerja dengan melaksanakan inisiatif-inisiatif seperti berikut:

SOALAN NO : 22

- (i) sesi Webinar PERKESO & MOTAC mengenai pengenalan kepada #MyFutureJobs dan Akta Sistem Insurans Pekerjaan 2017 [Akta 800] serta Program Subsidi Upah (PSU) di bawah Bajet 2022 bersama Penggiat Industri Pelancongan pada 22 Disember 2021;
- (ii) melaksanakan lima (5) Program Temu Duga Khas oleh PERKESO di Melaka, Pulau Pinang, Sarawak dan Kuala Lumpur;
- (iii) melaksanakan Temu Duga Mingguan dengan melibatkan seramai 43 majikan dan 1,200 calon pencari kerja;
- (iv) Mini Karnival Kerjaya Industri Pelancongan (secara serentak) di semua Pejabat PERKESO pada 5 Julai 2022 di seluruh negara; dan
- (v) Menganjurkan *Tourism Career Fair 2022* dengan kerjasama PERKESO yang akan diadakan bersempena dengan Program *Magic of the Night 2022* pada bulan Ogos 2022 di Melaka kelak.

3. Usaha untuk terus membantu para penggiat industri pelancongan berkaitan isu kekurangan sumber tenaga manusia akan tetap diteruskan dari semasa ke semasa dengan kerjasama KSM dan PERKESO. Antara perancangan yang akan dilaksanakan termasuklah:

- (i) melaksanakan Program Temu Duga Khas bagi Industri Pelancongan secara berkala dengan kerjasama PERKESO di seluruh negara;
- (ii) pelaksanaan seminar kepada industri pelancongan terutama majikan yang memerlukan tenaga manusia melalui kerjasama MOTAC dan *Tourism Productivity Nexus*; dan
- (iii) penglibatan industri pelancongan di dalam Karnival Kerjaya anjuran Kementerian Pengajian Tinggi (KPT) sebagai platform mempromosikan peluang kerjaya bagi sektor pelancongan.

SOALAN NO : 22

4. Pada masa yang sama, MOTAC sedang meneliti peluang untuk melaksanakan padanan antara industri dan institut pengajian tinggi, khususnya membabitkan pelajar jurusan bidang pelancongan dan hospitaliti. Padanan ini dilihat berpotensi untuk membawa situasi menang-menang antara penggiat industri pelancongan dan juga generasi muda.
5. Sementara itu, MOTAC telah melaksanakan ASEAN *Green Hotel Standard* sejak tahun 2008 melalui pelaksanaan penilaian Standard Pelancongan ASEAN di bawah inisiatif Negara Anggota ASEAN dalam menggalakkan konsep pelancongan hijau. Pengusaha hotel digalakkan untuk mengadaptasi ciri-ciri bangunan hijau terutamanya dalam memupuk pelancongan yang mampan melalui penggunaan mesra alam sekitar dan pemuliharaan tenaga terutamanya dalam penjimatan tenaga, mengurangkan penggunaan air dan pengurusan dan pengurangan sisa.
6. Selain daripada itu, Garis Panduan Perancangan (GPP) Kejiranan Hijau terbitan Jabatan Perancangan Bandar dan Desa (PLANMalaysia) turut menggalakkan aplikasi bangunan hijau yang memenuhi ciri-ciri seperti berikut:
 - (i) Penggunaan tenaga secara cekap;
 - (ii) Penggunaan bahan kitar semula untuk pembinaan bangunan;
 - (iii) Perancangan dan pengurusan mampan; dan
 - (iv) Penggunaan inovasi teknologi hijau.
7. Pengusaha hotel amat digalakkan menggunakan garis panduan dan amalan hijau sebagai daya tarikan kepada pengunjung di samping dapat manfaat dari segi penggunaan tenaga.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' HAJI MOHD FASIAH BIN HAJI MOHD
FAKEH [SABAK BERNAM]**

TARIKH : 26 JULAI 2022 (SELASA)

SOALAN

**DATO' HAJI MOHD FASIAH BIN HAJI MOHD FAKEH
[SABAK BERNAM]** minta **MENTERI KANAN PENDIDIKAN** menyatakan setakat manakah kualiti dan tahap pendidikan negara dari segi daya saing, kompetatif dan progresif pendidikan mengikut *world ranking* terkini dan apakah idea baru dan terbaik bagi terus meningkatkan kualiti dan tahap pendidikan negara.

JAWAPAN

Tuan Yang di-Pertua,

Kementerian Pendidikan Malaysia (KPM) terus komited memastikan sistem pendidikan negara adalah berkualiti tinggi dan setanding standard antarabangsa.

Untuk makluman Ahli Yang Berhormat, dalam konteks daya saing di peringkat antarabangsa, Malaysia telah mencatatkan pencapaian murid yang memberangsangkan dalam *Trends in International Mathematics and Science Study* (TIMSS) 2019, yang dikendalikan oleh *International Association for the Evaluation of Educational Achievement* (IEA). Bagi tahun 2019, Malaysia memperoleh skor individu melebihi 700, yang merupakan skor Aras Tertinggi bagi kedua-dua mata pelajaran Matematik dan Sains. Selain itu, pencapaian skor individu murid dalam mata pelajaran Sains adalah yang tertinggi sejak penyertaan Malaysia dalam TIMSS bermula tahun 1999.

Untuk makluman Ahli Yang Berhormat, KPM sentiasa berusaha menambah baik kualiti sistem pendidikan negara dengan memberi penekanan kepada pembangunan karakter murid secara menyeluruh. KPM telah mengurangkan penekanan kepada peperiksaan dan pentaksiran secara berpusat dengan memberi fokus kepada Pentaksiran Berasaskan Sekolah (PBS). Berikutnya pemansuhan Ujian Pencapaian Sekolah Rendah (UPSR) mulai tahun 2021 dan Pentaksiran Tingkatan Tiga (PT3) mulai tahun 2022, KPM memberi tumpuan kepada pemerkasaan PBS, melibatkan komponen Pentaksiran Bilik Darjah (PBD), Pentaksiran Aktiviti Jasmani, Sukan dan Kokurikulum (PAJSK) serta Pentaksiran Psikometrik (PPsi).

Dalam konteks PBD, guru memantau perkembangan, kemajuan dan penguasaan setiap murid dalam proses pembelajaran mereka termasuk kemahiran asas membaca, menulis dan mengira (3M). Dengan ini, guru boleh merancang dan mengubah suai kaedah Pengajaran dan Pembelajaran (PdP) bagi membantu setiap murid meningkatkan tahap penguasaan pembelajaran mereka. Pelaksanaan PBD secara berterusan dapat mempersiapkan murid dengan pengetahuan, kemahiran dan nilai

SOALAN NO : 23

sebagai asas yang kukuh untuk mengikuti pembelajaran di peringkat seterusnya.

Kejayaan dan kemenjadian murid haruslah dilihat secara holistik dan bukan semata-mata berdasarkan prestasi dalam bidang akademik sahaja. Justeru, pentaksiran melalui PAJSK dan PPsi juga diperkuuh bagi menilai perkembangan murid dalam aspek sukan, kokurikulum, nilai murni, minat dan kecenderungan serta pembentukan sahsiah.

Selain daripada itu, KPM juga akan menambah baik dan memantapkan kaedah pelaporan PBD. Melalui kaedah ini, pencapaian murid dilaporkan secara menyeluruh dua kali setahun iaitu pada pertengahan sesi akademik dan akhir sesi akademik menggunakan deskriptor tahap penguasaan yang komprehensif dan jelas. Pelaporan ini juga menilai tahap usaha murid dalam pembelajaran. Di samping itu, guru kelas dan guru mata pelajaran akan memberi ulasan dan cadangan intervensi bagi mengoptimumkan potensi murid.

Selain daripada pelaporan PBD, laporan akhir sesi akademik akan turut disertakan dengan pelaporan PAJSK dan PPsi. Secara keseluruhan, penambahbaikan pelaporan PBS dapat memberi gambaran mengenai kemenjadian murid secara menyeluruh, komprehensif dan bermakna. Pemerkasaan PBS merupakan antara pendekatan KPM untuk beralih daripada pembelajaran berorientasi peperiksaan kepada pembelajaran yang lebih menyeronokkan untuk murid.

KPM juga memberi tumpuan dalam aspek pengukuhan kualiti latihan guru dengan menyediakan pembangunan profesionalisme berterusan kepada guru bagi memastikan guru sentiasa bersedia serta bermotivasi dalam menjalankan tugas dan berusaha meningkatkan kualiti perkhidmatan masing-masing. Guru juga sentiasa diberi latihan dan bimbingan bagi mendukung pelaksanaan dasar pendidikan, termasuk melengkapkan guru dengan kemahiran dalam aspek pendigitalan pendidikan bagi mendepani pendidikan abad ke-21. Di samping itu, KPM juga menyediakan latihan dalam meningkatkan kesejahteraan psikologi untuk memberikan kemahiran pengurusan emosi, kawalan diri dan amalan harian yang positif berdasarkan

SOALAN NO : 23

tahap kesejahteraan psikologi yang dinilai melalui Inventori Kesejahteraan Psikologi (IKPsi).

Untuk makluman Ahli Yang Berhormat, KPM juga sedang di peringkat akhir penyediaan dasar pendidikan digital. Tumpuan utama dasar ini adalah untuk melahirkan generasi fasih digital dan berdaya saing. Dasar dirangka bagi memupuk bakat digital yang berpengetahuan, berkemahiran dan beretika dalam penggunaan teknologi digital.

Di bawah kerangka dasar ini, antara tumpuan yang diberikan adalah meningkatkan penguasaan murid dalam teknologi digital, memperkayakan kandungan digital yang berkualiti dan memperkasakan kompetensi guru serta mengupayakan infostruktur dan infrastruktur digital institusi di bawah KPM.

KPM yakin usaha berterusan ini mampu meningkatkan kualiti dan tahap pendidikan negara.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SRI ABDUL AZEEZ BIN ABDUL RAHIM
[BALING]**

TARIKH : 26 JULAI 2022 (SELASA)

SOALAN

DATO' SRI ABDUL AZEEZ BIN ABDUL RAHIM [BALING] minta **MENTERI KANAN PENDIDIKAN** menyatakan adakah Kementerian mempunyai hasrat untuk mengkaji semula pemansuhan Ujian Pencapaian Sekolah Rendah (UPSR) memandangkan UPSR masih lagi penting untuk menilai kemampuan dan kebolehan murid sepanjang enam tahun menuntut di sekolah rendah terutama dalam kemahiran 3M (Membaca, Menulis, Mengira).

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa melaksanakan penambahbaikan kepada sistem pentaksiran dan penilaian murid seiring dengan keperluan semasa. Dalam Sistem Pentaksiran Pendidikan Kebangsaan, murid ditaksir melalui Pentaksiran Berasaskan Sekolah (PBS) dan Peperiksaan Pusat.

Berikutnya pemansuhan Ujian Pencapaian Sekolah Rendah (UPSR) mulai tahun 2021, KPM memberi tumpuan kepada pemerkasaan PBS, melibatkan komponen Pentaksiran Bilik Darjah (PBD), Pentaksiran Aktiviti Jasmani, Sukan dan Kokurikulum (PAJSK) serta Pentaksiran Psikometrik (PPsi).

SOALAN NO : 24

Untuk makluman Ahli Yang Berhormat, PBS telah diperkenalkan lebih 10 tahun yang lalu, iaitu mulai tahun 2011 di peringkat sekolah rendah. Pentaksiran ini bertujuan untuk menilai aspek intelek, emosi, rohani, jasmani dan sosial selaras dengan Falsafah Pendidikan Kebangsaan.

Dalam konteks PBD, guru memantau perkembangan, kemajuan dan penguasaan setiap murid dalam proses pembelajaran mereka termasuk kemahiran asas membaca, menulis dan mengira (3M). Dengan ini, guru boleh merancang dan mengubah suai kaedah Pengajaran dan Pembelajaran (PdP) bagi membantu setiap murid meningkatkan tahap penguasaan pembelajaran mereka. Pelaksanaan PBD secara berterusan dapat mempersiapkan murid dengan pengetahuan, kemahiran dan nilai sebagai asas yang kukuh untuk mengikuti pembelajaran di peringkat seterusnya.

Antara pendekatan dalam pengukuhan PBD bagi murid Tahun 4 hingga Tingkatan 3 mulai tahun 2022 adalah dengan menambah baik pengurusan ujian akhir sesi akademik melalui penyediaan soalan yang setara standardnya oleh KPM. Soalan tersebut disediakan oleh guru yang berkepakaran dalam pembinaan item dan disimpan dalam sistem bank soalan yang dibangunkan oleh KPM.

Untuk tujuan pelaksanaan ujian akhir sesi akademik, pihak sekolah akan menjana set soalan daripada sistem tersebut dan ditadbir di sekolah seperti mana ujian akhir tahun sebelum ini. Panduan penskoran juga akan disediakan untuk kemudahan guru.

Penambahbaikan kepada ujian akhir sesi akademik ini bagi membolehkan guru dan ibu bapa bersama-sama membantu membangunkan potensi murid bermula daripada peringkat sekolah rendah. Dalam mencapai hasrat ini, pelaporan ujian akhir sesi akademik akan digunakan untuk membolehkan intervensi awal dilakukan bagi mengoptimumkan potensi murid. Pelaporan ini bukan untuk tujuan perbandingan pencapaian antara murid atau sekolah.

SOALAN NO : 24

Untuk makluman Ahli Yang Berhormat, kejayaan dan kemenjadian murid haruslah dilihat secara holistik dan bukan semata-mata berdasarkan prestasi dalam bidang akademik sahaja. Justeru, pentaksiran melalui PAJSK dan PPsi juga diperkuuh bagi menilai perkembangan murid dalam aspek sukan, kokurikulum, nilai murni, minat dan kecenderungan serta pembentukan sahsiah.

Selain daripada itu, KPM juga akan menambah baik dan memantapkan kaedah pelaporan PBD. Melalui kaedah ini, pencapaian murid dilaporkan secara menyeluruh dua kali setahun iaitu pada pertengahan sesi akademik dan akhir sesi akademik menggunakan deskriptor tahap penguasaan yang komprehensif dan jelas. Pelaporan ini juga menilai tahap usaha murid dalam pembelajaran. Di samping itu, guru kelas dan guru mata pelajaran akan memberi ulasan dan cadangan intervensi bagi mengoptimumkan potensi murid.

Selain daripada pelaporan PBD, laporan akhir sesi akademik akan turut disertakan dengan pelaporan PAJSK dan PPsi. Secara keseluruhan, penambahbaikan pelaporan PBS dapat memberi gambaran mengenai kemenjadian murid secara menyeluruh, komprehensif dan bermakna. Pemerkasaan PBS merupakan antara pendekatan KPM untuk beralih daripada pembelajaran berorientasi peperiksaan kepada pembelajaran yang lebihmenyeronokkan untuk murid.

Selain itu, KPM juga mempergiatkan program latihan untuk pentadbir dan guru bagi meningkatkan kemahiran serta memantapkan pelaksanaan pentaksiran berterusan di sekolah. Guru juga akan terus dilatih untuk meningkatkan inovasi dan kreativiti dalam pengajaran dan pembelajaran termasuk penggunaan teknologi digital.

KPM yakin bahawa pentaksiran yang bersifat holistik dan berterusan melalui PBS merupakan pendekatan terbaik bagi mengoptimumkan potensi murid secara menyeluruh dan bersepadu. Oleh itu, KPM tidak bercadang untuk mengkaji semula pemansuhan UPSR atau mewujudkan peperiksaan baharu bagi menggantikan UPSR.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN CHOW KON YEOW [TANJONG]
TARIKH : 26 JULAI 2022 (SELASA)

SOALAN

TUAN CHOW KON YEOW [TANJONG] minta **MENTERI KEWANGAN** menyatakan nyatakan jumlah peruntukan tahunan yang disalurkan kepada Pulau Pinang dan juga jumlah sumbangan negeri ini dalam bentuk hasil cukai serta hasil bukan cukai kepada Kerajaan Persekutuan sejak tahun 2018 hingga kini.

JAWAPAN

Tuan Yang di-Pertua,

Untuk makluman Yang Berhormat, antara peruntukan tahunan yang disediakan oleh Kerajaan Persekutuan kepada Kerajaan Negeri Pulau Pinang terdiri daripada Pemberian Geran dan peruntukan Belanja Pembangunan. Pemberian Geran Tahunan adalah berdasarkan kepada peruntukan yang termaktub di dalam Perlembagaan Persekutuan, undang-undang serta Akta, keputusan Mesyuarat Jemaah Menteri dan juga keputusan Mesyuarat Majlis Kewangan Negara dan Pemberian ini disalurkan terus kepada Kerajaan Negeri Pulau Pinang. Manakala, peruntukan Belanja Pembangunan pula disediakan oleh Kerajaan Persekutuan setiap tahun di bawah siling pembangunan Rancangan Malaysia Ke-12 (RMKe-12) bagi membiayai projek pembangunan di Negeri Pulau Pinang.

Jumlah peruntukan tahunan pemberian yang disalurkan kepada Kerajaan Negeri Pulau Pinang serta perbelanjaan peruntukan belanja pembangunan di Pulau Pinang dari tahun 2018 hingga 2021 adalah berjumlah RM3,947.38 juta yang terdiri daripada perkara-perkara berikut:

NO SOALAN :27

Peruntukan Kerajaan Persekutuan	2018 (RM juta)	2019 (RM juta)	2020 (RM juta)	2021 (RM juta)	Jumlah (RM juta)
Pemberian Geran Kerajaan Persekutuan	239.04	313.86	311.70	320.28	1,184.88
Belanja Pembangunan	466.40	874.20	671.10	750.80	2,762.50
JUMLAH (RM juta)	705.44	1,188.06	982.80	1,071.08	3,947.38

Manakala, bagi tahun 2022 pula, anggaran peruntukan kepada Kerajaan Negeri Pulau Pinang adalah sebanyak RM1,321.14 juta yang terdiri daripada Pemberian Geran yang dijangka meningkat daripada RM320.28 juta kepada RM325.34 juta dan peruntukan Belanja Pembangunan juga meningkat daripada RM750.80 juta pada tahun 2021 kepada RM995.80 juta pada tahun 2022.

Berkenaan hasil cukai serta hasil bukan cukai kepada Kerajaan Persekutuan bagi tempoh 2018 sehingga 2021, adalah dimaklumkan bahawa kutipan hasil cukai Kerajaan Persekutuan di Pulau Pinang adalah sebanyak RM29.5 bilion. Manakala kutipan hasil bukan cukai pula adalah sebanyak RM1.5 bilion.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN AHMAD TARMIZI BIN SULAIMAN
[SIK]**

TARIKH : 26 JULAI 2022 (SELASA)

SOALAN

TUAN AHMAD TARMIZI BIN SULAIMAN [SIK] minta **MENTERI KANAN PENDIDIKAN** menyatakan isu pelarasan kurikulum sekolah rendah berteraskan Kemahiran Berfikir Aras Tinggi (KBAT) yang relevan dan bersesuaian bagi mencapai matlamat yang digariskan di dalam Falsafah Pendidikan Kebangsaan.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam memastikan sistem pendidikan, termasuk kurikulum yang disediakan kepada murid adalah relevan dan berkualiti. Usaha ini selari dengan pernyataan dalam Falsafah Pendidikan Kebangsaan (FPK) iaitu memperkembangkan potensi individu secara menyeluruh dan bersepadu untuk mewujudkan insan yang seimbang dan harmonis dari segi intelek, jasmani, emosi dan rohani.

Kemahiran berfikir adalah satu daripada enam aspirasi murid yang digariskan dalam Pelan Pembangunan Pendidikan Malaysia (PPPM) 2013-2025 dan diperlukan oleh murid untuk berupaya bersaing pada peringkat global. Justeru, penerapan dan penekanan Kemahiran Berfikir Aras Tinggi (KBAT) diberi keutamaan dalam kurikulum sejak sekolah rendah. Pelaksanaan KBAT bertujuan meningkatkan tahap pemikiran aras tinggi dalam kalangan murid melalui pengajaran dan pembelajaran (PdP) serta pentaksiran. Warganegara yang berilmu pengetahuan, kreatif dan inovatif adalah penting bagi menyumbang kepada kesejahteraan negara.

Untuk makluman Ahli Yang Berhormat, KPM sentiasa berusaha untuk memastikan kurikulum yang digubal relevan dengan keadaan semasa. Dalam konteks penggubalan kurikulum, KPM akan melaksanakan semakan semula kurikulum selepas kitaran kurikulum lengkap pusingannya. Kohort pertama Kurikulum Standard Sekolah Menengah (KSSM) murid Tingkatan 1 dimulakan pada tahun 2017 dan lengkap kitarannya pada tahun 2021/2022 apabila murid tersebut tamat Tingkatan 5. Bagi Kurikulum Standard Sekolah Rendah (KSSR) pula, kohort pertama murid Tahun 1 dimulakan pada tahun 2017 dan akan lengkap kitarannya pada kalender akademik 2022/2023 apabila murid tersebut tamat Tahun 6. Sehubungan dengan itu, pada masa ini KPM sedang melaksanakan semakan semula KSSM dan KSSR, termasuk elemen KBAT.

Untuk makluman Ahli Yang Berhormat, antara komponen utama kurikulum persekolahan adalah kandungan (ilmu pengetahuan) dan pedagogi. Semakan KSSM and KSSR antara lain melibatkan kedua-dua

komponen ini, termasuk elemen KBAT. Antara pendekatan yang digunakan untuk mendapatkan maklum balas daripada pelbagai pihak berkepentingan adalah menerusi sesi libat urus, kajian, persidangan, pemantauan serta analisis perbandingan dengan negara lain.

Dalam konteks kandungan (ilmu pengetahuan), semakan dilaksana seiring dengan keperluan masa kini dan akan datang. Penilaian akan dibuat untuk menentukan tindakan susulan sama ada kandungan mata pelajaran tersebut perlu disusun semula, digugur, ditambah, dicantum, dicantas, diselaraskan atau dikekalkan. Dalam hal ini, analisis keperluan dapat dilaksana bagi menentukan perkembangan terkini bidang ilmu, kedalaman dan keluasan bidang ilmu serta keperluan bagi melaksanakan sesuatu kurikulum baharu.

Elemen pedagogi merupakan komponen penting untuk pengajaran yang berkesan dan seterusnya dapat menghasilkan pengajaran dan pembelajaran (PdP) yang bermakna. Dapatan semakan dan penilaian kurikulum akan digunakan untuk mengenal pasti kaedah pedagogi terbaik dengan mengambil kira pendekatan yang bersesuaian mengikut tahap kognitif dan gaya pembelajaran murid.

Untuk makluman Ahli Yang Berhormat, sesi libat urus bersama pihak berkepentingan sedang giat dijalankan bagi mendapatkan input dan maklumat tentang pelaksanaan kurikulum semasa. Hasil dapatan sesi libat urus tersebut akan dianalisis dengan terperinci dan laporan kajian disediakan bagi mengenal pasti serta melaksana tindakan susulan yang perlu dilakukan.

KPM yakin usaha yang dilakukan ini dapat memastikan kurikulum pendidikan sentiasa relevan dengan perkembangan pendidikan pada masa ini dan masa depan serta sejajar dengan Falsafah Pendidikan Kebangsaan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SERI UTAMA HAJI MUKHRIZ BIN TUN
DR. MAHATHIR [JERLUN]**

TARIKH : 26 JULAI 2022 (SELASA)

SOALAN

DATO' SERI UTAMA HAJI MUKHRIZ BIN TUN DR. MAHATHIR [JERLUN] minta **MENTERI KANAN PENDIDIKAN** menyatakan apakah tindakan yang diambil bagi membendung kejadian buli di sekolah yang semakin menjadi-menjadi kebelakangan ini. Memandangkan banyak mangsa buli tidak memperoleh keadilan dan pembuli pula terlepas dari tindakan kerana undang-undang yang tidak khusus untuk menangani keskes ini, adakah Kerajaan berhasrat untuk menggubal Akta Anti Membuli bagi mencegah gejala ini terutamanya di institusi pendidikan yang sepatutnya melahirkan warga yang berperibadian mulia.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memandang serius isu buli yang melibatkan murid sekolah bawah KPM. Dalam hal ini, KPM telah melaksanakan pelbagai penambahbaikan berterusan bagi mengukuhkan pendekatan sedia ada dengan memberi tumpuan kepada empat aspek utama iaitu penyedaran, pelaporan, penghukuman dan pemantauan.

Untuk makluman Ahli Yang Berhormat, dalam konteks penyedaran, KPM telah memperkenalkan konsep Sekolahku SEJAHTERA. Pendekatan

SOALAN NO : 30

ini bertujuan memupuk dan menerapkan elemen dan nilai penting kehidupan dalam kalangan warga sekolah, termasuk murid. Elemen ini diterap dan dididik oleh guru secara langsung atau tidak langsung di dalam aktiviti kurikulum dan kokurikulum. Ini bagi memastikan murid dapat benar-benar menghayatinya seterusnya menjadi sebahagian daripada amalan dalam kehidupan mereka sama ada di sekolah atau di luar sekolah. Konsep ini memberi tumpuan kepada 14 elemen iaitu:

- S - Selamat, Seronok & Sihat
- E - Etika & Empati
- J - Jati Diri
- A - Adab Sopan
- H - Harmoni
- T - Tekun, Teliti & Terampil
- E - Eksplorasi
- R - Rasional
- A - Artikulasi

Penerapan elemen selamat, sihat, seronok, empati, jati diri, adab sopan, harmoni dan rasional dalam kalangan warga sekolah akan dapat membentuk keperibadian murid yang menyedari bahawa buli perlu dibanters sepenuhnya.

Dalam aspek pelaporan, KPM telah menyediakan saluran pelaporan bagi membolehkan pihak sekolah melaporkan kes buli kepada Kementerian. Pada masa kini KPM juga sedang merangka sistem pelaporan yang akan membolehkan warga sekolah termasuk murid dan ibu bapa mereka membuat aduan terus kepada pihak Kementerian dan maklumat yang diterima akan dilindungi. KPM akan terus menambah baik sistem pelaporan kes buli bagi memastikan pendekatan yang terbaik dapat dibangunkan.

KPM juga telah menyediakan Garis Panduan Mencegah dan Menangani Perbuatan Buli Dalam Kalangan Murid di Sekolah dan Buku Panduan Pengurusan Menangani Buli Di Sekolah sebagai panduan kepada pihak sekolah.

SOALAN NO : 30

Berhubung dengan penghukuman di peringkat sekolah, KPM telah mengeluarkan Surat Pekeliling Ikhtisas (SPI) Bil. 8/2010 yang menyentuh tentang hukuman terhadap pelaku buli di sekolah atau di asrama. KPM sedang meneliti hukuman ke atas murid yang melakukan perbuatan buli dengan membuat penambahbaikan kepada mana-mana hukuman yang tersenarai dalam SPI tersebut. Ini bagi memastikan hukuman yang dikenakan adalah setimpal dan menjadi pendekatan pencegahan yang berkesan.

Di samping itu, terdapat Peraturan-Peraturan Pendidikan (Disiplin Murid) 1959 [L.N.61] yang mengawal disiplin murid-murid sekolah. Peraturan sedia ada memperuntukkan bidang kuasa Pengetua atau Guru Besar untuk mengambil tindakan disiplin terhadap murid dan tertakluk kepada tahap keseriusan kes boleh mengakibatkan murid digantung atau dibuang sekolah sekiranya Pengetua atau Guru Besar berpuas hati perlu untuk melakukan sedemikian bagi tujuan mengawal disiplin murid di sekolah tersebut.

Untuk makluman Ahli Yang Berhormat, KPM mempunyai kuasa yang mencukupi untuk menangani kejadian buli di sekolah. Sekiranya kejadian buli berlaku, murid yang menjadi mangsa boleh melaporkan kepada pihak sekolah atau kepada pihak polis untuk siasatan lanjut. Berhubung cadangan berkenaan penggubalan Akta Anti Membuli, ianya adalah di luar bidang kuasa KPM kerana buli tidak terhad kepada murid sekolah sahaja. Setakat ini, kesalahan berkaitan buli secara lisan atau fizikal boleh mengguna pakai peruntukan sedia ada dalam Kanun Keseksaan [Akta 574] iaitu di bawah Seksyen 504, Seksyen 509, Seksyen 323, Seksyen 324, Seksyen 325 dan Seksyen 326.

Oleh itu, sekiranya perlakuan buli tersebut termasuk dalam salah satu kesalahan yang diperuntukan dalam mana-mana seksyen di atas, siasatan akan dilaksanakan oleh pihak polis.

Bagi aspek pemantauan pula, pada masa ini pemantauan di sekolah dilaksanakan oleh pentadbir, guru dan warden yang terdiri daripada kalangan guru. KPM juga sentiasa mengingatkan guru bimbingan dan

SOALAN NO : 30

kaunseling memberikan khidmat bimbingan dan kaunseling kepada pembuli dan mangsa buli serta murid yang cenderung untuk melakukan perbuatan membuli.

KPM sentiasa mengingatkan pihak sekolah agar berusaha mewujudkan persekitaran sekolah yang selamat menerusi Program Sekolah Selamat dengan kerjasama agensi kerajaan dan bukan kerajaan seperti Polis Diraja Malaysia (PDRM), Kumpulan Penggerak Ibu bapa Komuniti dan Swasta (PIBKS); *National Institute of Occupational Safety and Health* (NIOSH) serta Jabatan Sukarelawan Malaysia (RELA). KPM turut mengarahkan semua sekolah termasuk sekolah asrama untuk melaksanakan program kesedaran menangani isu buli bersama-sama Pegawai Perhubungan Sekolah (PPS) dari Polis Diraja Malaysia (PDRM) bermula Januari 2022 secara berterusan.

Terkini, KPM telah mengambil inisiatif menujuhkan Jawatankuasa Khas Bagi Meneliti dan Menambahbaik Prosedur Pengendalian Kes Gangguan Seksual dan Buli di Institusi Pendidikan pada 12 Mei 2022. Ahli jawatankuasa khas ini terdiri daripada individu yang mempunyai kepakaran dalam bidang pendidikan, pengendalian kes jenayah, gangguan seksual, penelitian sistem, prosedur kerajaan dan kriminologi. Jawatankuasa ini sedang meneliti semua dokumen, kaedah dan prosedur sedia ada serta mengesyorkan tindakan dan penambahbaikan yang boleh dilaksanakan oleh KPM.

KPM yakin dengan pendekatan menyeluruh yang dilaksanakan dapat menangani isu buli di sekolah.

Sekian, terima kasih.

SOALAN NO : 31

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI PANGLIMA HAJAH AZIZAH BINTI
DATUK SERI PANGLIMA HAJI MOHD DUN
[BEAUFORT]**

TARIKH : 26 JULAI 2022 (SELASA)

SOALAN

DATUK SERI PANGLIMA HAJAH AZIZAH BINTI DATUK SERI PANGLIMA HAJI MOHD DUN [BEAUFORT] minta MENTERI PELANCONGAN, SENI DAN BUDAYA menyatakan sejauh mana pencapaian Kementerian dalam mempromosikan masakan Malaysia di mata dunia.

JAWAPAN

Tuan Yang di-Pertua,

1. Seperti Ahli Yang Berhormat sedia maklum, Kementerian Pelancongan, Seni dan Budaya (MOTAC) sentiasa dan terus giat melaksanakan pelbagai inisiatif dalam mempromosikan masakan Malaysia ke peringkat antarabangsa. Makanan atau gastronomi boleh dijadikan sebagai salah satu daya dan produk pelancongan kerana hakikatnya menjamu selera bukan saja menyeronokkan tapi juga dianggap sebagai aktiviti budaya.
2. Pelbagai inisiatif telah diambil oleh MOTAC bukan sahaja untuk mengetengahkan makanan-makanan yang berunsur kontemporari, malah juga makanan warisan Malaysia agar ia terus dikenali dan dinikmati oleh generasi hari ini. Antaranya, Jabatan Warisan Negara (JWN) ada menerbitkan buku-buku berkaitan dengan makanan warisan seperti Buku Resipi Masakan Warisan Lenggong (2016), Buku Makanan Warisan Hampir Pupus (2016), *Food Heritage of Sabah: A Culture Perspective* (2012) dan *Food Heritage of Sarawak: A Culture Perspective* (2012).
3. Seterusnya, MOTAC menjalankan kolaborasi bersama restoran-restoran untuk menggunakan resepi-resepi dan menghidangkan makanan-makanan tersebut di premis perniagaan mereka dengan tujuan untuk mempromosi serta menaikkan semula populariti makanan warisan dan hampir pupus negara.
4. Selain itu, MOTAC turut menjalankan kerjasama dengan Kerajaan-kerajaan negeri dalam memperkenalkan keunikan masakan masing-masing sehingga ke peringkat antarabangsa. Contohnya, kerjasama MOTAC bersama pihak Kerajaan Negeri Sarawak, Pihak Berkuaasa Tempatan (PBT) serta NGO telah berjaya mengangkat Bandar Raya Kuching diisytiharkan sebagai Bandar Raya Kreatif di peringkat UNESCO di bawah kategori gastronomi pada 16 November 2021. Ini juga adalah salah satu cara meletakkan dan mempromosikan Malaysia ini di mata dunia.

5. Usaha promosi oleh MOTAC juga dijalankan melalui pejabat-pejabat Tourism Malaysia di luar negara, antaranya menerusi aktiviti-aktiviti seperti:

- (i) penyertaan Tourism Malaysia menerusi pameran-pameran dan misi pelancongan antarabangsa seperti *International Tourismus Bourse* (ITB)-Berlin, *World Travel Market* (WTM)-London, dan Vakantiebeurs-Amsterdam. Program-program ini menyediakan platform untuk mengadakan demonstrasi masakan Malaysia seperti teh tarik, kek lapis dan sebagainya;
- (ii) usaha-usaha mempromosikan masakan Malaysia tersebut juga dibuat dengan meningkatkan jaringan kerjasama dengan *Tour Operator*, wakil-wakil media cetak dan elektronik di bawah program *Mega Familiarisation Tour* dengan membawa penulis, wartawan, kru perfileman dan *social media influencer* untuk menyaksikan sendiri keunikan masakan Malaysia tersebut. Contohnya, Pejabat Tourism Malaysia London merancang untuk mengadakan kerjasama promosi bersama Chef terkemuka di UK pada bulan September 2022 dalam mempromosikan masakan Malaysia. Dianggarkan lebih 15 *Tour Operator* dari pasaran United Kingdom akan dibawa ke Malaysia selama 2 minggu khas untuk menerokai masakan Malaysia dengan dibawah nama program *Two-Week Culinary Tour to Malaysia*';
- (iii) terdapat juga usaha-usaha dalam bidang penerbitan termasuk secara digital dan penerbitan klip-klip video promosi bagi memberikan publisiti berterusan kepada masakan Malaysia. Antara program yang dilaksanakan ialah melalui pejabat Tourism Malaysia Sydney yang telah bekerjasama dengan Jackie M dan *Masters of Malaysia Cuisine* sejak tahun 2020 dalam menerbitkan video program masakan Malaysia. Sebanyak 380 video berkaitan masakan di Malaysia telah diterbitkan dan ditayangkan di platform sosial media di Australia yang mendapat tontonan lebih 1.4juta penonton, penerbitan 12 episod video untuk siaran di TV Network 10 dengan anggaran penonton seramai 4.3 juta dan 8 episod video program

SOALAN NO : 31

Malaysia Travel Series with Justine Schofield untuk siaran TV Network SBS Food. Jumlah keseluruhan nilai publisiti bagi program-program ini adalah melebih RM2.5juta.

Selain itu, Pejabat Tourism Malaysia Los Angeles telah melaksanakan program pemasaran berkaitan kulinari bagi pasaran Amerika Selatan dalam bahasa Sepanyol untuk menjangkau lebih banyak capaian di pasaran tersebut. Beberapa siri video promosi dibangunkan dengan kerjasama media di pasaran Amerika Selatan dan disebarluaskan melalui rangkaian *newsletter* media tersebut. Capaian bagi program promosi ini melebihi 80,000 pembaca dengan nilai publisiti media sebanyak RM5 juta;

- (iv) menyertai acara-acara antarabangsa yang mempromosikan masakan. Contohnya, Tourism Malaysia Istanbul bersama Konsulat Jeneral Malaysia dan Malaysia Palm Oil Council (MPOC) telah menyertai acara *International Culinary Festival* di Istanbul dari 15 hingga 19 Jun 2022 yang antara pengisian programnya ialah demonstrasi masakan Malaysia oleh Chef dari Malaysia; dan
- (v) memuatnaik risalah-risalah digital yang mempromosikan masakan Malaysia ke platform E-risalah Tourism Malaysia bagi tatapan pelancong Antarabangsa. Antara risalah yang diterbitkan adalah *Culinary Delights*. Maklumat mengenai masakan di Malaysia ini turut dipromosi oleh Tourism Malaysia kepada pelancong dalam dan luar negeri melalui kerjasama dengan tujuh (7) buah pejabat Tourism Malaysia di dalam negara dan 30 buah pejabat Tourism Malaysia di luar negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK DR. SHAHRUDDIN BIN MD. SALLEH
[SRI GADING]**

TARIKH : 26 JULAI 2022 (SELASA)

SOALAN

Minta **MENTERI PENGAJIAN TINGGI** menyatakan apakah inisiatif Kementerian dalam menyelesaikan isu peningkatan kadar pengangguran graduan Bumiputera secara berterusan beberapa tahun ini.

JAWAPAN

Tan Sri Yang di-Pertua,

Berdasarkan Kajian Pengesanan Graduan yang dilaksanakan oleh Kementerian Pengajian Tinggi (KPT), kadar kebolehpasaran bagi graduan Bumiputera telah meningkat sebanyak 0.8 peratus kepada 85.5 peratus pada tahun 2021 berbanding 84.7 peratus pada tahun 2020. Dapatan kajian ini juga menunjukkan peratusan graduan Bumiputera pada tahun 2021 yang masih belum bekerja selepas enam (6) bulan menamatkan pengajian mereka adalah pada kadar 14.5 peratus atau 31,431 orang graduan, berbanding 15.3 peratus atau 30,134 orang graduan berbanding tahun sebelumnya.

KPT sentiasa komited untuk memastikan para graduan terutamanya graduan bumiputera dapat diserap oleh industri untuk bekerja sebaik sahaja mereka menamatkan pengajian. Antara inisiatif yang dilaksanakan oleh KPT bagi menempatkan graduan di industri adalah:

1. Melaksanakan program *reskilling* dan *upskilling* PENJANA KPT.
2. Melaksanakan Program-program Intervensi Kebolehpasaran Graduan (GE).
3. Melaksanakan padanan pekerjaan melalui portal MyFUTUREJobs dengan kerjasama PERKESO.
4. Melaksanakan Program *MOHE@Intel Elite Internship*.
5. Memperkuuhkan agenda keusahawanan atau *Job Creator* di IPT menerusi Pelan Tindakan Keusahawanan IPT 2021-2025.

Selain inisiatif yang dinyatakan tadi, KPT turut meneruskan pelaksanaan program-program untuk meningkatkan kadar kebolehpasaran para graduan supaya selari dengan kehendak industri seperti **Program CEO@KPT dan Industry@University**. Inisiatif-inisiatif seperti ini berupaya menyediakan prasarana pembelajaran yang terbaik; memperkasa pembelajaran dan penyelidikan; menggarap cetusan idea inovatif; menyediakan pengalaman pembelajaran secara *hands on* serta kemahiran teknologi digital terkini yang berupaya meningkatkan kadar kebolehpasaran pelajar. KPT amat mengalu-alukan lebih banyak industri untuk terlibat dalam menjayakan program ini di masa hadapan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN HAJI WAN HASSAN BIN MOHD RAMLI
[DUNGUN]**

TARIKH : 26 JULAI 2022 (SELASA)

SOALAN

TUAN HAJI WAN HASSAN BIN MOHD RAMLI [DUNGUN] minta **MENTERI KANAN PENDIDIKAN** menyatakan pelan jangka masa panjang pihak Kementerian bagi menyediakan pengangkutan khusus kepada para pelajar yang terlibat program-program di luar sekolah berbanding menggunakan kenderaan guru pada waktu ini.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memberi keutamaan dalam aspek keselamatan murid dan guru yang terlibat dengan aktiviti di luar kawasan sekolah, termasuk penggunaan kenderaan persendirian guru untuk membawa murid bagi urusan rasmi.

Untuk makluman Ahli Yang Berhormat, pada masa ini, KPM sedang memperincikan penambahbaikan kepada pendekatan berkaitan dengan pengangkutan murid yang terlibat dalam program di luar sekolah. Dalam hal ini, penelitian secara menyeluruh dibuat oleh KPM termasuk perkara yang perlu mendapat kelulusan daripada agensi pusat dan turut tertakluk kepada kedudukan kewangan Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : TUAN LIM LIP ENG [KEPONG]

TARIKH : 26 JULAI 2022 (SELASA)

SOALAN

TUAN LIM LIP ENG [KEPONG] minta **MENTERI KEWANGAN** menyatakan sebab-sebab Suruhanjaya Sekuriti dan Bank Negara gagal mengambil tindakan terhadap syarikat-syarikat amanah, syarikat- syarikat pengurusan dana yang tidak sah dan ejen-ejen atau wakil-wakil pelaburan yang tidak berlesen untuk menipu wang orang awam dengan skim '*Cash Trust*' yang merupakan pengambilan deposit awam secara haram dan pelaburan yang palsu.

JAWAPAN

Tuan Yang di-Pertua,

Secara amnya, skim “*Cash Trust*” dipromosikan oleh syarikat-syarikat amanah (*cash trust companies*) yang ditubuhkan di bawah Akta Syarikat Amanah 1949 [Akta 100] yang ditadbir oleh Suruhanjaya Syarikat Malaysia (SSM). Dalam hal ini, Suruhanjaya Sekuriti Malaysia (SC) telah menerima aduan-aduan dan pertanyaan-pertanyaan tentang status skim “*Cash Trust*” yang ditawarkan kepada masyarakat Malaysia. Aduan serta pertanyaan yang diterima oleh SC akan dianalisis serta disiasat untuk memperoleh maklumat dan bukti terperinci bagi menentukan sama ada terdapat sebarang pelanggaran undang-undang sekuriti dan garis panduan SC. Siasatan yang dilaksanakan termasuklah temuduga dengan individu-individu yang relevan untuk memahami dan mengesahkan fakta-fakta kes tersebut.

Tindakan yang sewajarnya akan diambil oleh SC sekiranya pelanggaran dapat dibuktikan selepas siasatan serta proses sewajarnya (“*due process*”) telah dilaksanakan. Ini kebiasaannya akan mengambil masa yang lama.

Oleh kerana syarikat-syarikat amanah adalah dalam bidang kuasa SSM, SC juga telah menasihatkan pengadu dan penanya supaya turut mengemukakan aduan dan pertanyaan mereka kepada SSM. Untuk tujuan mempertingkatkan keberkesanan siasatannya, SC juga akan bekerjasama dengan pihak berkuasa lain yang berkaitan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN HAJI WAN HASSAN BIN MOHD
RAMLI [DUNGUN]
TARIKH : 26 JULAI 2022 (SELASA)

SOALAN

TUAN HAJI WAN HASSAN BIN MOHD RAMLI [DUNGUN] minta **MENTERI KEWANGAN** menyatakan sama ada Kementerian merancang untuk memperkenalkan semula *Goods and Services Tax (GST)* dengan nilai yang lebih rendah dalam masa terdekat ini bagi menambah pendapatan negara.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan masih mengkaji kesesuaian melaksanakan Cukai Barang dan Perkhidmatan (atau GST) dan model-model cukai kepenggunaan yang lain dengan mengambil kira semua aspek. Ini termasuklah kelemahan sistem cukai jualan dan cukai perkhidmatan sedia ada serta kelemahan sistem GST yang dilaksanakan pada tahun 2015. Kajian yang dijalankan turut meliputi kesan ke atas ekonomi, kos sara hidup, kesan cukai ke atas harga barang serta keupayaan menangani kegiatan ekonomi gelap. Cukai baharu tersebut, jika dilaksanakan, juga perlu bersifat mudah ditadbir dan tidak meningkatkan kos perniagaan di samping dapat mengukuhkan kedudukan fiskal negara.

Dalam menetapkan kadar GST yang bersesuaian, Kerajaan perlu menyeimbangkan di antara keperluan untuk tidak terlalu membebangkan rakyat, dengan keperluan Kerajaan untuk mempunyai ruang fiskal yang

memadai bagi memastikan kedudukan ekonomi negara terus stabil. Contohnya, Kerajaan perlu mengambil kira kadar inflasi semasa yang menggambarkan kenaikan harga barang pengguna secara umum yang sedang membebani kebanyakan rakyat. Namun, dalam masa yang sama, peningkatan harga minyak di pasaran dunia dan nilai matawang negara yang tidak menentu telah menyebabkan tanggungan perbelanjaan negara kian meningkat untuk memastikan bantuan yang bersesuaian dapat terus diberikan kepada rakyat. Kesemua faktor ini perlu diambil kira sebelum kadar yang sesuai bagi pelaksanaan GST dapat ditetapkan.

Sepertimana Ahli Yang Berhormat sedia maklum, ekonomi negara sedang dalam fasa pemulihan. Kerajaan memahami bahawa pengenalan sebarang bentuk cukai baharu dalam keadaan ekonomi sedemikian bukan sahaja akan membebankan rakyat, malah berisiko untuk merencatkan momentum pemulihan ekonomi yang sedang berlangsung. Untuk itu, pelaksanaan sebarang bentuk cukai kepenggunaan perlu mengambil kira senario semasa. Di samping itu, ia juga memberi ruang bagi persiapan dan persediaan yang rapi di kedua-dua pihak Kerajaan dan pembayar cukai.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DR. MASZLEE BIN MALIK
(SIMPANG RENGGAM)**

TARIKH : 26 JULAI 2022 (SELASA)

DR. MASZLEE BIN MALIK [SIMPANG RENGGAM] minta **MENTERI PENGAJIAN TINGGI** menyatakan status terkini penubuhan universiti Jepun di Malaysia yang pernah diusahakan semenjak tahun 2019.

JAWAPAN

Tan Sri Yang di-Pertua,

Untuk makluman Ahli Yang Berhormat, cadangan penubuhan Kampus Cawangan Universiti Tsukuba di Malaysia telah diusulkan oleh Mantan YAB Perdana Menteri Malaysia pada Jun 2018. Malaysia dan Jepun juga telah mengadakan pelbagai sesi mesyuarat, perbincangan, lawatan dan kunjungan hormat bagi merealisasikan hasrat ini.

Sehubungan dengan itu, Kementerian Pengajian Tinggi (KPT) telah mengemukakan draf Memorandum Kerjasama (MOC) Penubuhan Kampus Cawangan Universiti Tsukuba di Malaysia kepada pihak Kementerian Pendidikan, Kebudayaan, Sukan, Sains dan Teknologi Jepun (MEXT) pada November 2021. Pada masa ini, pihak Kerajaan Jepun sedang meneliti draf MOC berkenaan dan dijangka mengemukakan draf akhir kepada Malaysia dalam masa terdekat.

YAB Perdana Menteri dalam pertemuan beliau dengan TYT Perdana Menteri Jepun semasa lawatan kerja rasmi ke Jepun pada 25 hingga 28 Mei 2022 juga telah memaklumkan bahawa kelulusan pendaftaran Kampus Cawangan Universiti Tsukuba di Malaysia akan disegerakan dan pemeteraian Memorandum Kerjasama (MoC) antara Kerajaan Malaysia dan Kerajaan Jepun berhubung perkara ini dijangka dapat dimeterai pada bulan November 2022.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN AHMAD JOHNIE BIN ZAWAWI [IGAN]

TARIKH : 26 JULAI 2022 (SELASA)

SOALAN

TUAN AHMAD JOHNIE BIN ZAWAWI [IGAN] minta **MENTERI KANAN PENDIDIKAN** menyatakan apakah status pembinaan baru SMK Matu di kawasan Parlimen Igan. Bilakah projek ini akan dilaksanakan pembinaannya.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam menyediakan infrastruktur pendidikan yang selamat dan kondusif untuk kegunaan murid dan warga sekolah di seluruh negara termasuk negeri Sarawak.

Untuk makluman Ahli Yang Berhormat, di bawah Rancangan Malaysia Ke-11, *Rolling Plan* ke 2 tahun 2017, KPM telah diluluskan projek pembinaan gantian penuh Sekolah Menengah Kebangsaan Matu, Daro yang meliputi skop 28 bilik darjah dan lain-lain kemudahan dengan kos keseluruhan sebanyak RM78.27 juta. Pelaksanaan projek ini telah diserahkan kepada Jabatan Kerja Raya (JKR) Sarawak. Projek adalah dalam peringkat akhir penyediaan dokumen tender dan akan diiklankan pada bulan Julai 2022. Sebaik sahaja proses perolehan selesai dilaksanakan, kerja pembinaan dijangka dapat dimulakan selewat-lewatnya pada Disember 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN FONG KUI LUN [BUKIT BINTANG]
TARIKH : 26 JULAI 2022 (SELASA)

SOALAN

TUAN FONG KUI LUN [BUKIT BINTANG] minta **MENTERI KEWANGAN** menyatakan pelan dan kajian sumber fiskal negara bagi tahun-tahun mendatang bagi menampung kekurangan dana bagi perbelanjaan negara termasuk memperkenalkan cukai-cukai baru.

JAWAPAN

Tuan Yang di-Pertua,

Dasar fiskal Kerajaan dirangka berdasarkan dengan matlamat utama untuk memastikan kemampunan kewangan awam, kestabilan makro-ekonomi dan kesejahteraan rakyat. Dalam situasi pemulihan ekonomi global yang tidak seimbang dan tidak menentu, operasi fiskal kekal proaktif dan pantas bertindak balas terhadap persekitaran ekonomi dan keutamaan dasar yang dinamik. Usaha untuk meningkatkan keberkesanan dan kecekapan perbelanjaan akan disokong oleh langkah perbelanjaan berhemat serta mengoptimumkan sumber sedia ada selari dengan keperluan semasa.

Selain itu, dasar dan pengurusan hasil akan ditambah baik secara berperingkat tanpa menjaskan momentum pemulihan. Ini termasuk melaksanakan Strategi Hasil Jangka Sederhana (MTRS) yang memberi tumpuan untuk momedenkan struktur dan pentadbiran cukai di Malaysia melalui penggunaan dan penyesuaian amalan terbaik antarabangsa. MTRS mempunyai 3 objektif iaitu memastikan penjanaan hasil yang mampan, meningkatkan pematuhan cukai dan mengukuhkan rangka kerja perundangan cukai.

Demi kelestarian kutipan hasil cukai pada masa akan datang, inisiatif dan kajian yang berterusan sedang dijalankan oleh Kerajaan untuk menstruktur suatu sistem percukaian yang seimbang, adil, saksama supaya dapat menyokong dan meningkatkan hasil negara. Inisiatif ini adalah perlu bagi memastikan kutipan hasil cukai dapat ditingkatkan untuk menampung keperluan aktiviti atau program pemulihan khusus bagi membantu golongan sasar mendepani kesan COVID-19 serta kenaikan kos sara hidup disebabkan ketidaktentuan ekonomi dunia. Dalam masa yang sama, Kerajaan juga akan mengambil kira pandangan dan maklumbalas pelbagai pihak berkepentingan mengenai kesan sekiranya langkah-langkah cukai ini dilaksanakan. Kerajaan perlu memastikan langkah ini tidak menjaskan kedudukan ekonomi dan daya saing negara selaras dengan usaha berterusan untuk menarik pelaburan asing.

Tuan Yang Dipertua,

Kerajaan juga akan melaksanakan inisiatif pembaharuan fiskal seperti pengenalan Akta Tanggungjawab Fiskal (FRA) dan semakan semula perbelanjaan awam termasuk menambah baik program subsidi bersasar bagi memastikan kecekapan dan keberkesanan perbelanjaan Kerajaan. Semua inisiatif ini adalah penting bagi memastikan kedudukan kewangan Kerajaan kekal kukuh, seterusnya menyediakan ruang fiskal yang mencukupi bagi menghadapi sebarang krisis pada masa hadapan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DR. MASZLEE BIN MALIK
[SIMPANG RENGGAM]**

TARIKH : 26 JULAI 2022 (SELASA)

SOALAN

DR. MASZLEE BIN MALIK [SIMPANG RENGGAM] minta **MENTERI KANAN PENDIDIKAN** menyatakan progress penambahbaikan sekolah-sekolah daif di seluruh negara mengikut negeri dari April 2020 sehingga Mei 2022 dan apakah status dashboard pemantauan sekolah daif di laman web KPM yang pernah diwujudkan pada tahun 2019 agar rakyat dapat memantau lebih dekat perkembangan sekolah-sekolah daif. Apakah usaha dari KPM untuk menambah baik usaha pemantauan sekolah-sekolah daif dan apakah status usaha sama KPM dan Kerajaan Negeri Sarawak untuk memperbaiki sekolah-sekolah daif di negeri Sarawak.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam menyediakan infrastruktur pendidikan yang selamat dan kondusif untuk kegunaan murid dan warga sekolah di seluruh negara.

Untuk makluman Ahli Yang Berhormat, sejak tahun 2020 hingga 2022, terdapat sebanyak 280 projek telah diluluskan untuk dinaik taraf dan dibangunkan semula bangunan daif di sekolah seluruh negara. Pecahan projek yang diluluskan mengikut negeri adalah seperti berikut:

- i. 120 projek di Sarawak;
- ii. 108 projek di Sabah;
- iii. 13 projek di Kedah;
- iv. 7 projek di Johor;
- v. 7 projek di Perak;
- vi. 6 projek di Kelantan;
- vii. 6 projek di Selangor;
- viii. 5 projek di Terengganu;
- ix. 3 projek di Negeri Sembilan;
- x. 2 projek di Pahang;
- xi. 2 projek di Wilayah Persekutuan Kuala Lumpur; dan
- xii. 1 projek di Wilayah Persekutuan Labuan.

Sehingga 26 Julai 2022, status pelaksanaan projek adalah 25 projek siap sepenuhnya, 63 projek dalam peringkat pembinaan dan 192 projek dalam peringkat prabina.

Untuk makluman Ahli Yang Berhormat, status pelaksanaan keseluruhan projek menaik taraf dan membangunkan semula bangunan daif di sekolah boleh dilihat melalui *dashboard* yang dikemas kini secara berkala melalui pautan <https://projekdaif.moe.gov.my>.

SOALAN NO : 40

Pemantauan pelaksanaan projek ini turut dilakukan oleh KPM melalui pelbagai platform seperti Majlis Tindakan Pembangunan Kementerian, Mesyuarat Pemantauan Projek Daif Bersama Agensi Pelaksana, dan Mesyuarat Jawatankuasa Induk Peruntukan RM1 bilion Bagi Pembangunan Semula Sekolah Daif di Negeri Sarawak.

Khusus bagi negeri Sarawak, Jawatankuasa Induk Peruntukan RM1 bilion Bagi Pembangunan Semula Sekolah Daif di Negeri Sarawak berperanan membuat keputusan dan dasar utama berhubung perancangan serta mekanisme pelaksanaan projek daif di bawah peruntukan RM1 bilion di negeri Sarawak. Di samping itu, jawatankuasa ini bertanggungjawab untuk memutuskan penyelesaian terhadap pertikaian, perubahan dan isu yang timbul di peringkat pelaksanaan projek serta pengurusan kontrak. Jawatankuasa ini dipengerusikan oleh Ketua Setiausaha KPM dan dianggotai oleh wakil Kementerian Kewangan, Setiausaha Kewangan Negeri Sarawak, Pengarah Jabatan Kerja Raya Sarawak, Pengarah Jabatan Pendidikan Negeri Sarawak, Pegawai Kewangan Persekutuan Sarawak, Ketua Pengarah Unit Penyelarasan Pelaksanaan dan Ketua Pengarah Unit Perancang Ekonomi, Jabatan Perdana Menteri.

Untuk makluman Ahli Yang Berhormat, KPM juga sentiasa melaksanakan sesi libat urus bersama pelbagai agensi Kerajaan Negeri termasuk Kementerian Pendidikan, Inovasi dan Pembangunan Bakat Sarawak, Jabatan Ketua Pengarah Tanah Galian Negeri Sarawak, Jabatan Tanah dan Survei Sarawak, Pihak Berkuasa Tempatan (PBT) dan JKR Sarawak. Melalui sesi libat urus ini, isu-isu pelaksanaan projek seperti pemutihan dan ketersediaan tapak, keperluan pematuhan syarat-syarat PBT serta isu komuniti dapat dibincang dan diselesaikan.

KPM menghargai kerjasama dan komitmen yang diberikan khususnya oleh Kerajaan Negeri Sarawak dan kerajaan negeri yang lain dalam pelaksanaan projek menaik taraf dan membangunkan semula bangunan daif di sekolah seluruh negara.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK HAJI AHMAD JAZLAN BIN YAAKUB
[MACHANG]**

TARIKH : 26 JULAI 2022 (SELASA)

SOALAN

DATUK HAJI AHMAD JAZLAN BIN YAAKUB [MACHANG] minta **MENTERI KANAN PENDIDIKAN** menyatakan bagaimanakah cara pengendalian dan pemilihan kuota kekosongan jawatan guru *Contract of Service* (CoS), serta jelaskan berapa jumlah sebenar calon yang telah ditemuduga di bawah MySPP dan jumlah calon yang lulus berdasarkan data Suruhanjaya Perkhidmatan Pelajaran (SPP).

JAWAPAN

Tuan Yang di-Pertua,

Kementerian Pendidikan Malaysia (KPM) telah mengumumkan Pengambilan Khas seramai 18,702 orang Pegawai Perkhidmatan Pendidikan (PPP) Gred DG41 secara *one-off* pada 20 Jun 2021 bagi mengisi kekosongan guru di sekolah KPM seluruh negara. Ini merupakan inisiatif yang diambil oleh KPM bagi mengatasi isu kekosongan guru yang telah berlarutan sekian lama.

Untuk makluman Ahli Yang Berhormat, urusan pengambilan khas guru baharu ini, termasuk lantikan secara *Contract of Service* (CoS) telah selesai dilaksanakan sepenuhnya oleh Suruhanjaya Perkhidmatan Pendidikan (SPP). Keutamaan dalam pengambilan khas ini diberikan kepada graduan yang mempunyai ikhtisas pendidikan untuk lantikan secara tetap terlebih dahulu. Kemudian, baki kekosongan hanya akan diisi oleh graduan bukan ikhtisas pendidikan melalui kaedah lantikan CoS. Dalam hal ini, SPP tidak menetapkan sebarang kuota untuk melantik guru secara CoS dalam urusan pengambilan tersebut. Sebaliknya, jumlah calon yang dilantik secara CoS adalah bergantung kepada jumlah yang diperlukan untuk mata pelajaran tertentu selepas semua calon ikhtisas pendidikan yang layak telah dilantik.

Berdasarkan rekod KPM, seramai 18,043 calon telah ditemuduga untuk lantikan secara CoS. Daripada jumlah tersebut, seramai 2,349 orang telah dilantik sebagai guru secara lantikan CoS.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN MA'MUN BIN SULAIMAN (KALABAカン)

TARIKH : 26 JULAI 2022 (SELASA)

SOALAN

TUAN MA'MUN BIN SULAIMAN (KALABAカン) minta **MENTERI TENAGA DAN SUMBER ASLI** menyatakan kerugian yang ditanggung oleh Kerajaan akibat ketidaksambungan dan penarikan balik permit penerokaan gas geothermal daripada Tawau Green Energy Sdn Bhd di lokasi Apas Kiri, Tawau. Apakah Kementerian bersedia dengan perancangan untuk memulakan semula projek tersebut setelah penerokaan kawasan hutan simpan dengan cara menebang kayu kaya bermutu tinggi di kawasan yang dicadang sebagai tapak geothermal. Apakah alasan-alasan yang dikenal pasti sehingga projek tersebut tidak diteruskan.

JAWAPAN

Tuan Yang di-Pertua,

1. Untuk makluman Ahli Yang Berhormat, pelaksanaan projek geoterma oleh Tawau Green Energy Sdn. Bhd. di Apas Kiri, Tawau telah diluluskan pelaksanaannya di bawah mekanisme tarif galakan (*Feed-in Tariff – FiT*) pada 2 Julai 2015.
2. Walau bagaimanapun, kelulusan pelaksanaan projek ini telah dibatalkan oleh Pihak Berkuasa Pembangunan Tenaga Lestari (SEDA Malaysia) pada 6 September 2018 kerana kemajuan projek di tapak telah terhenti selepas penggerudian 1 unit *exploratory well* bagi tinjauan dan penilaian sumber geoterma. Pembatalan pelaksanaan projek ini telah ditarik balik disebabkan pihak pemaju projek telah gagal dalam :
 - a. membuktikan daya maju (*viability*) pelaksanaan projek; dan
 - b. menunjukkan kemajuan pencapaian berdasarkan *milestones* yang ditetapkan.
3. Memandangkan kelulusan projek ini adalah di bawah mekanisme FiT, pembatalannya tidak memberikan kesan tanggungan atau kerugian kepada Kerajaan. Ini kerana bayaran kepada pemaju projek hanya akan dibuat berdasarkan penjanaan tenaga elektrik yang dibekalkan kepada pihak utiliti. Sebaliknya, pembatalan projek ini telah membolehkan nilai defisit Kumpulan Wang Tenaga Baru (KWTBB) bagi negeri Sabah dapat dikurangkan.
4. Buat masa ini, mengambil kira kedudukan semasa kutipan dan dana KWTBB bagi Negeri Sabah yang tidak mencukupi untuk menampung pelaksanaan sebarang projek baharu FiT di Sabah, pihak Kerajaan tiada perancangan untuk memulakan semula pelaksanaan projek ini.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : PUAN TEO NIE CHING [KULAI]

TARIKH : 26 JULAI 2022 (SELASA)

SOALAN

PUAN TEO NIE CHING [KULAI] minta **MENTERI KANAN PENDIDIKAN** menyatakan status dan perkembangan terkini mengenai penstrukturkan semula fungsi dan gred jawatan pentadbir sekolah bagi memantapkan gred hakiki perjawatan guru besar dan penolong kanan sekolah.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam usaha menambah baik laluan kerjaya jawatan pentadbir di sekolah rendah dan sekolah menengah bawah KPM.

Untuk makluman Ahli Yang Berhormat, KPM bersama-sama agensi pusat sedang meneliti dan memperhalusi cadangan struktur organisasi sekolah yang lebih komprehensif. Cadangan tersebut akan mengambil kira penambahbaikan terhadap gred hakiki jawatan tertentu khususnya guru besar dan guru penolong kanan. Cadangan ini akan mengambil kira kesesuaian dan kompleksiti tugas jawatan-jawatan tersebut. KPM yakin penambahbaikan yang akan dilaksanakan ini akan memantapkan lagi laluan kerjaya guru besar dan guru penolong kanan di sekolah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : LISAN

DARIPADA : TUAN LIM KIT SIANG [Iskandar Puteri]

TARIKH : 26 JULAI 2022 (SELASA)

SOALAN

TUAN LIM KIT SIANG [ISKANDAR PUTERI] minta **MENTERI KANAN PENDIDIKAN** menyatakan jumlah keseluruhan pelajar sekolah di peringkat rendah dan peringkat menengah yang tercicir dari sistem pendidikan negara dalam tempoh pandemik COVID-19 dan punca utama kejadian ini.

JAWAPAN

Tuan Yang di-Pertua,

Kementerian Pendidikan Malaysia (KPM) merujuk kepada definisi keciciran iaitu murid warganegara Malaysia yang berada dalam sistem pendidikan (bersekolah) tetapi keluar daripada sistem sebelum tamat tempoh pendidikan.

Untuk makluman Ahli Yang Berhormat, kadar keciciran murid pada peringkat sekolah rendah adalah 0.10 peratus manakala pada peringkat sekolah menengah pula adalah 1.13 peratus pada tahun 2020. Pada tahun 2021, kadar keciciran murid menunjukkan trend penurunan iaitu 0.08 peratus pada peringkat rendah dan 1.11 peratus pada peringkat menengah. Antara faktor utama keciciran murid adalah kerana masalah keluarga dan tidak berminat ke sekolah.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI PANGLIMA MADIUS TANGAU
[TUARAN]**

TARIKH : 26 JULAI 2022 (SELASA)

SOALAN

DATUK SERI PANGLIMA MADIUS TANGAU [TUARAN] minta **MENTERI KANAN PENDIDIKAN** menyatakan adakah Kementerian bercadang untuk mengkaji semula kandungan dan fakta buku-buku teks sejarah yang melibatkan pembentukan Malaysia.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa berusaha untuk memastikan kurikulum yang digubal relevan dengan keadaan semasa. Dalam konteks penggubalan kurikulum, KPM akan melaksanakan semakan semula kurikulum selepas kitaran kurikulum lengkap pusingannya. Kohort pertama Kurikulum Standard Sekolah Menengah (KSSM) murid Tingkatan 1 dimulakan pada tahun 2017 dan lengkap kitarannya pada tahun 2021/2022 apabila murid tersebut tamat Tingkatan 5. Bagi Kurikulum Standard Sekolah Rendah (KSSR) pula, kohort pertama murid Tahun 1 dimulakan pada tahun 2017 dan akan lengkap kitarannya pada kalender akademik 2022/2023 apabila murid tersebut tamat Tahun 6. Sehubungan dengan itu, pada masa ini KPM sedang melaksanakan semakan semula KSSM dan KSSR, termasuk mata pelajaran Sejarah.

Untuk makluman Ahli Yang Berhormat, antara komponen utama kurikulum persekolahan adalah kandungan (ilmu pengetahuan) dan pedagogi. Semakan KSSM and KSSR antara lain melibatkan kedua-dua komponen ini. Antara pendekatan yang digunakan untuk mendapatkan maklum balas daripada pelbagai pihak berkepentingan adalah menerusi sesi libat urus, kajian, persidangan, pemantauan serta analisis perbandingan dengan negara lain.

Dalam konteks kandungan (ilmu pengetahuan), semakan kandungan mata pelajaran dilaksana seiring dengan keperluan masa kini dan akan datang. Penilaian akan dibuat untuk menentukan tindakan susulan sama ada kandungan mata pelajaran tersebut perlu disusun semula, digugur, ditambah, dicantum, dicantas, diselaraskan atau dikekalkan. Dalam hal ini, analisis keperluan dapat dilaksana bagi menentukan perkembangan terkini bidang ilmu, kedalaman dan keluasan bidang ilmu serta keperluan bagi melaksanakan sesuatu kurikulum baharu.

Elemen pedagogi merupakan komponen penting untuk pengajaran yang berkesan dan seterusnya dapat menghasilkan pengajaran dan pembelajaran (PdP) yang bermakna. Dapatan semakan dan penilaian

SOALAN NO : 50

kurikulum akan digunakan untuk mengenal pasti kaedah pedagogi terbaik dengan mengambil kira pendekatan yang bersesuaian mengikut tahap kognitif dan gaya pembelajaran murid.

Untuk makluman Ahli Yang Berhormat, sesi libat urus bersama pihak berkepentingan sedang giat dijalankan bagi mendapatkan input dan maklumat tentang pelaksanaan kurikulum semasa. Hasil dapatan sesi libat urus tersebut akan dianalisis dengan terperinci dan laporan kajian disediakan bagi mengenal pasti serta melaksana tindakan susulan yang perlu dilakukan.

KPM yakin usaha yang dilakukan ini dapat memastikan kurikulum pendidikan sentiasa relevan dengan perkembangan pendidikan pada masa ini dan masa depan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : PUAN TEO NIE CHING [KULAI]

TARIKH : 26 JULAI 2022

SOALAN

PUAN TEO NIE CHING [KULAI] minta **MENTERI KANAN PENDIDIKAN** menyatakan status Pembukaan Institusi Baharu (PIB) bagi SMJK Heng Ee 2, Pulau Pinang yang telah diluluskan oleh Jemaah Menteri Kerajaan Pakatan Harapan (PH).

JAWAPAN

Tuan Yang Di-Pertua,

Untuk makluman Ahli Yang Berhormat, Mesyuarat Jemaah Menteri pada 22 Januari 2020, di bawah agenda hal-hal lain telah meluluskan permohonan pembukaan institusi baharu bagi SMK Heng Ee, Bayan Baru, Pulau Pinang dengan pentadbiran tersendiri. Namun demikian, keputusan tersebut dibuat tanpa pembentangan khusus oleh YB Menteri Pendidikan berdasarkan perundangan yang terpakai, keperluan serta pertimbangan terperinci oleh Jemaah Menteri pada ketika itu.

Sehubungan dengan itu, dan selaras dengan pembubaran Kerajaan, Kementerian Pendidikan Malaysia (KPM) berpendirian bahawa keputusan yang telah dibuat oleh kerajaan terdahulu wajar dipertimbangkan semula oleh barisan Jemaah Menteri di bawah Kerajaan semasa.

Walau bagaimanapun, sehingga kini premis SMK Heng Ee di Bayan Baru, Pulau Pinang kekal beroperasi sebagai bangunan tambahan kepada PEB1103 SMK Heng Ee, George Town, Pulau Pinang sepetimana yang telah diluluskan oleh YB Menteri Pendidikan pada 15 Februari 2017.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SRI RICHARD RIOT ANAK JAEM
[SERIAN]**

TARIKH : 26 JULAI 2022 (SELASA)

SOALAN

DATO' SRI RICHARD RIOT ANAK JAEM [SERIAN] minta **MENTERI KANAN PENDIDIKAN** menyatakan apakah status pembinaan sekolah baru SK Sri Sadong dan SMK Serian II.

JAWAPAN

Tuan Yang di-Pertua,

Untuk makluman Ahli Yang Berhormat, dalam Rancangan Malaysia Ke-11 (RMKe-11), *Rolling Plan 1 (RP1)* tahun 2016, Kementerian Pendidikan Malaysia (KPM) telah diluluskan projek pembinaan baharu Sekolah Kebangsaan Sri Sadong, Serian yang meliputi skop 12 bilik darjah dan kemudahan lain. Projek telah diiklankan pada 21 Julai 2022. Kerja pembinaan dijangka dapat dimulakan pada Januari 2023 selepas selesai proses perolehan.

Bagi projek pembinaan baharu Sekolah Menengah Kebangsaan (SMK) Serian No. 2, projek ini telah diluluskan dalam RMKe-11 RP1, tahun 2016. Namun begitu, projek tersebut telah ditangguhkan kerana tapak pembinaan sekolah berada dalam jajaran projek Lebuhraya Pan Borneo dan tidak sesuai untuk pembinaan sekolah baharu.

KPM komited untuk memastikan projek pembinaan sekolah baharu SMK Serian No.2 ini dapat diteruskan di tapak baharu. Oleh itu, KPM telah mengenal pasti tapak baharu dan peruntukan pengambilan tapak baharu diluluskan dalam RMKe-12 RP2, tahun 2022. Proses pengambilan tapak sedang dalam pelaksanaan dan pembinaan sekolah baharu akan dimohon setelah urusan tersebut selesai.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN MA'MUN BIN SULAIMAN
[KALABAカン]**

TARIKH : 26 JULAI 2022 (SELASA)

SOALAN

Minta **MENTERI PENGAJIAN TINGGI** menyatakan perancangan dan persedian Kementerian untuk menyarankan kepada pengurusan Universiti Teknologi Mara (UiTM) agar segera dapat menawarkan kursus-kursus peringkat diploma dan ijazah sarjana muda di kampus Tawau selain dari hanya kursus-kursus Pra Perdagangan dan Pra Sains yang sedia ditawarkan sekarang walaupun kampus ini telah diwujudkan lebih 15 tahun. Dengan penawaran kursus-kursus tersebut ibu bapa pelajar dari sekitar Lahad Datu, Kunak, Semporna, Tawau dan Kalabakan dapat berjimat daripada menanggung kos tambang perjalanan anak-anak yang agak tinggi jika mereka melanjutkan pembelajaran di Semenanjung Malaysia.

JAWAPAN

Tan Sri Yang di-Pertua,

UiTM Kampus Tawau telah diisytiharkan sebagai Kampus Kota di mana ia berperanan sebagai *feeder campus* untuk kursus-kursus diploma yang ditawarkan oleh UiTM seluruh Malaysia khususnya UiTM Cawangan Sabah, Kampus Kota Kinabalu. UiTM Kampus Tawau akan menawarkan program-program berikut pada tahun 2023:

- i) Diploma Pengurusan Perladangan: Unjuran pelajar 120 orang;
- ii) Diploma Pengurusan Perniagaan (Pengangkutan): Unjuran pelajar 60 orang; dan
- iii) Diploma Keusahawan Tani: Unjuran pelajar 120 orang.

Ini adalah berdasarkan kedudukan strategik Kampus Tawau yang dikelilingi oleh sektor pertanian/ perladangan, program-program yang berteraskan pertanian/ perladangan dan juga logistik adalah amat sesuai dan mampu menjadi menyumbang utama dalam sektor tersebut. Kementerian dan UiTM yakin penawaran program-program diploma ini akan membolehkan pelajar dari sekitar Lahad Datu, Kunak, Semporna, Tawau dan Kalabakan untuk mengikuti pengajian tinggi yang berhampiran dengan rumah mereka tanpa perlu mengeluarkan perbelanjaan yang besar.

Disamping itu, berdasarkan Pelan Strategik UiTM 2020–2025, UiTM Cawangan Sabah akan memainkan peranan penting dalam memastikan UiTM mencapai sasaran menjadi *Globally Renowned University* menjelang 2025 melalui penawaran program tambahan ini. Sekian terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
**DARIPADA : DATUK SERI PANGLIMA HAJI MOHD
SHAFIE BIN HAJI APDAL [SEMPORNA]**
TARIKH : 26 JULAI 2022 (SELASA)

SOALAN

**DATUK SERI PANGLIMA HAJI MOHD SHAFIE BIN HAJI APDAL
[SEMPORNA]** minta **MENTERI KEWANGAN** menyatakan :-

- (a)senarai cukai dan hasil yang diserahkan kepada Kerajaan Persekutuan oleh Kerajaan Negeri sama ada negeri-negeri di Semenanjung, Sabah, Sarawak dan Wilayah Persekutuan; dan
- (b)adakah maklumat ini terbuka kepada orang awam.

JAWAPAN

Tuan Yang di-Pertua,

Untuk makluman Ahli Yang Berhormat, Hasil Kerajaan Persekutuan yang diserah oleh negeri-negeri di Malaysia selaras dengan Perkara 97, Perlembagaan Persekutuan terdiri daripada hasil cukai dan hasil bukan cukai. Hasil cukai terbahagi kepada dua iaitu cukai langsung dan cukai tidak langsung. Jenis cukai langsung yang dikutip oleh Lembaga Hasil Dalam Negeri Malaysia (LHDNM) adalah cukai pendapatan individu, cukai pendapatan korporat, cukai keuntungan harta tanah, cukai pendapatan (Petroleum) dan duti setem. Manakala bagi cukai tidak langsung yang dikutip oleh Jabatan Kastam Diraja Malaysia (JKDM) adalah merangkumi cukai jualan, cukai perkhidmatan, duti import, duti eksport dan duti eksais. Bagi hasil bukan cukai pula, Kerajaan Persekutuan turut mengutip hasil seperti lesen kenderaan bermotor, levi pekerja asing, bayaran perkhidmatan serta faedah dan pulangan pelaburan.

Maklumat mengenai perincian kutipan hasil Kerajaan Persekutuan boleh diperoleh di laman sesawang Kementerian Kewangan www.treasury.gov.my iaitu melalui penerbitan tahunan dokumen Tinjauan Fiskal dan Anggaran Hasil Kerajaan Persekutuan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN CHE ALIAS BIN HAMID [KEMAMAN]

TARIKH : 26 JULAI 2022 (SELASA)

SOALAN

TUAN CHE ALIAS BIN HAMID [KEMAMAN] minta **MENTERI KANAN PENDIDIKAN** menyatakan keberkesanan mekanisme yang dilaksanakan oleh pihak Kementerian dalam menangani isu buli di sekolah yang semakin membimbangkan pada waktu ini.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memandang serius isu buli yang melibatkan murid sekolah bawah KPM. Dalam hal ini, KPM telah melaksanakan pelbagai penambahbaikan berterusan bagi mengukuhkan pendekatan sedia ada dengan memberi tumpuan kepada empat aspek utama iaitu penyedaran, pelaporan, penghukuman dan pemantauan.

Untuk makluman Ahli Yang Berhormat, dalam konteks penyedaran, KPM telah memperkenalkan konsep Sekolahku SEJAHTERA. Pendekatan ini bertujuan memupuk dan menerapkan elemen dan nilai penting kehidupan dalam kalangan warga sekolah, termasuk murid. Elemen ini diterap dan dididik oleh guru secara langsung atau tidak langsung di dalam aktiviti kurikulum dan kokurikulum. Ini bagi memastikan murid dapat benar-benar menghayatinya seterusnya menjadi sebahagian daripada amalan dalam kehidupan mereka sama ada di sekolah atau di luar sekolah. Konsep ini memberi tumpuan kepada 14 elemen iaitu:

S - Selamat, Seronok & Sihat

E - Etika & Empati

J - Jati Diri

A - Adab Sopan

H - Harmoni

T - Tekun, Teliti & Terampil

E - Eksplorasi

R - Rasional

A - Artikulasi

Penerapan elemen selamat, sihat, seronok, empati, jati diri, adab sopan, harmoni dan rasional dalam kalangan warga sekolah akan dapat membentuk keperibadian murid yang menyedari bahawa buli perlu dibanteras sepenuhnya.

Dalam aspek pelaporan, KPM telah menyediakan saluran pelaporan bagi membolehkan pihak sekolah melaporkan kes buli kepada Kementerian. Pada masa kini KPM juga sedang merangka sistem pelaporan yang akan membolehkan warga sekolah termasuk murid dan ibu bapa mereka membuat aduan terus kepada pihak Kementerian dan maklumat yang diterima akan dilindungi. KPM akan terus menambah baik sistem pelaporan kes buli bagi memastikan pendekatan yang terbaik dapat dibangunkan.

KPM juga telah menyediakan Garis Panduan Mencegah dan Menangani Perbuatan Buli Dalam Kalangan Murid di Sekolah dan Buku Panduan Pengurusan Menangani Buli Di Sekolah sebagai panduan kepada pihak sekolah.

Berhubung dengan penghukuman di peringkat sekolah, KPM telah mengeluarkan Surat Pekeliling Ikhtisas (SPI) Bil. 8/2010 yang menyentuh tentang hukuman terhadap pelaku buli di sekolah atau di asrama. KPM sedang meneliti hukuman ke atas murid yang melakukan perbuatan buli dengan membuat penambahbaikan kepada mana-mana hukuman yang tersenarai dalam SPI tersebut. Ini bagi memastikan hukuman yang dikenakan adalah setimpal dan menjadi pendekatan pencegahan yang berkesan.

SOALAN NO : 56

Di samping itu, terdapat Peraturan-Peraturan Pendidikan (Disiplin Murid) 1959 [L.N.61] yang mengawal disiplin murid-murid sekolah. Peraturan sedia ada memperuntukkan bidang kuasa Pengetua atau Guru Besar untuk mengambil tindakan disiplin terhadap murid dan tertakluk kepada tahap keseriusan kes boleh mengakibatkan murid digantung atau dibuang sekolah sekiranya Pengetua atau Guru Besar berpuas hati perlu untuk melakukan sedemikian bagi tujuan mengawal disiplin murid di sekolah tersebut.

Untuk makluman Ahli Yang Berhormat, KPM mempunyai kuasa yang mencukupi untuk menangani kejadian buli di sekolah. Sekiranya kejadian buli berlaku, murid yang menjadi mangsa boleh melaporkan kepada pihak sekolah atau kepada pihak polis untuk siasatan lanjut. Berhubung cadangan berkenaan penggubalan Akta Anti Membuli, ianya adalah di luar bidang kuasa KPM kerana buli tidak terhad kepada murid sekolah sahaja. Setakat ini, kesalahan berkaitan buli secara lisan atau fizikal boleh mengguna pakai peruntukan sedia ada dalam Kanun Keseksaan [Akta 574] iaitu di bawah Seksyen 504, Seksyen 509, Seksyen 323, Seksyen 324, Seksyen 325 dan Seksyen 326.

Oleh itu, sekiranya perlakuan buli tersebut termasuk dalam salah satu kesalahan yang diperuntukan dalam mana-mana seksyen di atas, siasatan akan dilaksanakan oleh pihak polis.

Bagi aspek pemantauan pula, pada masa ini pemantauan di sekolah dilaksanakan oleh pentadbir, guru dan warden yang terdiri daripada kalangan guru. KPM juga sentiasa mengingatkan guru bimbingan dan kaunseling memberikan khidmat bimbingan dan kaunseling kepada pembuli dan mangsa buli serta murid yang cenderung untuk melakukan perbuatan membuli.

KPM sentiasa mengingatkan pihak sekolah agar berusaha mewujudkan persekitaran sekolah yang selamat menerusi Program Sekolah Selamat dengan kerjasama agensi kerajaan dan bukan kerajaan seperti Polis Diraja Malaysia (PDRM), Kumpulan Penggerak Ibu bapa Komuniti dan Swasta (PIBKS); *National Institute of Occupational Safety and Health* (NIOSH) serta Jabatan Sukarelawan Malaysia (RELA). KPM turut mengarahkan semua sekolah termasuk sekolah asrama untuk

SOALAN NO : 56

melaksanakan program kesedaran menangani isu buli bersama-sama Pegawai Perhubungan Sekolah (PPS) dari Polis Diraja Malaysia (PDRM) bermula Januari 2022 secara berterusan.

Mengambil kira bahawa masih terdapat ruang penambahbaikan bagi meningkatkan keberkesanan mekanisme sedia ada, terkini, KPM telah mengambil inisiatif menubuhkan Jawatankuasa Khas Bagi Meneliti dan Menambahbaik Prosedur Pengendalian Kes Gangguan Seksual dan Buli di Institusi Pendidikan pada 12 Mei 2022. Ahli jawatankuasa khas ini terdiri daripada individu yang mempunyai kepakaran dalam bidang pendidikan, pengendalian kes jenayah, gangguan seksual, penelitian sistem, prosedur kerajaan dan kriminologi. Jawatankuasa ini sedang meneliti semua dokumen, kaedah dan prosedur sedia ada serta mengesyorkan tindakan dan penambahbaikan yang boleh dilaksanakan oleh KPM.

KPM yakin dengan pendekatan menyeluruh yang dilaksanakan dapat menangani isu buli di sekolah.

Sekian, terima kasih.

**PEMBERITAHUAN PERTANYAAN JAWAB LISAN
DEWAN NEGARA MESYUARAT KEDUA, PENGGAL YANG KELIMA
PARLIMEN KEEMPAT BELAS , TAHUN 2022**

PERTANYAAN : LISAN

**DARIPADA : YB MARIA CHIN BINTI ABDULLAH
(PETALING JAYA)**

TARIKH : 26 JULAI 2022

SOALAN

PUAN MARIA CHIN BINTI ABDULLAH (PETALING JAYA) minta **MENTERI PEMBANGUNAN WANITA, KELUARGA DAN MASYARAKAT** menyatakan apakah pelan lima (5) tahun strategi nasional Malaysia dalam pembasmian perkahwinan kanak-kanak serta mengapa data untuk perkahwinan tidak dapat diakses.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) sedang giat melaksanakan Pelan Strategi Kebangsaan Bagi Menangani Punca Perkahwinan Bawah Umur (Pelan). Pelan ini terdiri daripada 7 objektif, 17 strategi dan 58 program yang melibatkan pelbagai agensi di peringkat Kerajaan Persekutuan, Kerajaan Negeri, pertubuhan bukan Kerajaan (NGO) dan pertubuhan antarabangsa sebagai agensi peneraju dan pelaksana. Program yang dirancang adalah terdiri daripada program jangka pendek, sederhana dan panjang mulai tahun 2020 sehingga 2025. Pelan ini juga boleh diakses menerusi laman sesawang KPWKM.

Program dan tindakan yang dirancang mencerminkan isu-isu yang merentas pelbagai sektor seperti perundangan, pendidikan, kesihatan,

keibubapaan, kesedaran, sokongan sosial serta pembasmian kemiskinan bagi menangani punca perkahwinan bawah umur sehingga di peringkat akar umbi. Ini termasuklah program yang bertujuan untuk meningkatkan kesedaran dalam kalangan masyarakat untuk mengubah persepsi dan stigma yang seringkali dikaitkan dengan isu perkahwinan bawah umur.

Bukan itu sahaja, Kementerian telah menubuhkan Jawatankuasa Pemandu yang bertujuan memantau pelaksanaan dan perkembangan program yang dirancang. Jawatankuasa ini berfungsi sebagai platform untuk agensi pelaksana yang terlibat melaporkan pelaksanaan, isu dan cabaran serta cadangan penambahbaikan terhadap setiap program yang akan dilaksanakan.

Tuan Yang Di-Pertua,

Statistik perkahwinan dan perceraian orang Islam dan bukan Islam di Malaysia termasuk kanak-kanak di bawah umur 18 tahun mengikut jantina, etnik, umur dan negeri telah disediakan oleh Jabatan Perangkaan Malaysia (DOSM). Statistik perkahwinan bawah umur yang direkodkan pada tahun 2018 adalah sebanyak 1,856 orang, diikuti oleh tahun 2019 sebanyak 1,459 orang dan tahun 2020 sebanyak 1,124 orang. Ini menunjukkan berlakunya trend penurunan bilangan perkahwinan bawah umur di Malaysia.

Statistik mengenai perkahwinan dan perceraian juga boleh diakses melalui laman sesawang eStatistik <https://newss.statistics.gov.my>.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATUK SERI SAIFUDDIN NASUTION BIN ISMAIL [KULIM-BANDAR BHARU]
TARIKH : 26 JULAI 2022 (SELASA)

SOALAN

DATUK SERI SAIFUDDIN NASUTION BIN ISMAIL [KULIM-BANDAR BHARU] minta **MENTERI KEWANGAN** menyatakan keputusan Kerajaan mengenai pelaksanaan subsidi petrol bersasar dan terangkan mekanisme pelaksanaannya, kumpulan sasaran penerima dan anggaran tanggungan Kerajaan.

JAWAPAN

Tuan Yang di-Pertua,

Kementerian Kewangan (MOF) sedang melaksanakan proses memperinci kaedah pelaksanaan subsidi secara bersasar bagi produk petroleum. Beberapa siri libat urus bersama-sama pelbagai pihak telah diadakan antaranya termasuklah agensi Kerajaan, syarikat petroleum dan lain-lain bagi memperinci kaedah-kaedah dikenal pasti sebelum dapat menentukan pilihan kaedah terbaik bagi pelaksanaan subsidi bagi produk petrol dan diesel secara bersasar.

Pelaksanaan subsidi bersasar adalah penting memandangkan subsidi secara pukal bersifat tidak adil kerana sebilangan kecil golongan berpendapatan tinggi mendapat lebih manfaat daripada subsidi pukal berbanding sebahagian besar golongan berpendapatan rendah.

Sebagai contoh, golongan T20 merupakan antara penerima manfaat yang terbesar bagi subsidi RON95. Untuk tahun 2022, golongan

NO SOALAN :60

T20 bakal memanfaatkan subsidi RON95 sebanyak RM8 bilion berbanding dengan B40 sebanyak RM6 bilion. Dengan itu, terdapat keperluan membangunkan subsidi dengan lebih bersasar agar ketirisan tersebut dapat diagihkan semula untuk manfaat golongan rentan atau digunakan untuk memajukan pembangunan negara.

Berhubung pembangunan mekanisme subsidi bersasar, Kerajaan masih di peringkat awal pengujian mekanisme pemberian subsidi petrol secara bersasar. Pengujian tersebut akan disusuli dengan pengujian yang lebih meluas dari segi beberapa kaedah lain dan juga bagi menguji kebolehlaksanaan mekanisme tersebut bukan sahaja di kawasan bandar tetapi juga di kawasan luar bandar. Pembangunan dan pengujian sistem subsidi bersasar dijangka memerlukan tempoh di antara 3 hingga 6 bulan sebelum betul-betul bersedia untuk dilaksanakan di seluruh negara.

Dalam pelaksanaan subsidi bersasar, Kerajaan akan merancangkan pelaksanaan secara berfasa bagi memastikan ianya tidak mengakibatkan inflasi secara mendadak atau menjelaskan momentum pertumbuhan ekonomi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATUK SERI MOHD REDZUAN BIN MD.
YUSOF [ALOR GAJAH]
TARIKH : 26 JULAI 2022 (SELASA)

SOALAN

DATUK SERI MOHD REDZUAN BIN MD. YUSOF [ALOR GAJAH] minta **MENTERI KEWANGAN** menyatakan secara terperinci langkah-langkah fiskal, langkah-langkah kewangan serta langkah-langkah pentadbiran bagi usaha mengawal dan seterusnya memerangi inflasi.

JAWAPAN

Tuan Yang di-Pertua,

Dasar fiskal Kerajaan dirangka berdasarkan dengan matlamat utama untuk memastikan kemampunan kewangan awam, kestabilan makro-ekonomi dan kesejahteraan rakyat. Beberapa peraturan dan prinsip utama menjadi asas dalam merangka dasar fiskal termasuk pematuhan kepada peraturan fiskal, ruang dan fleksibiliti, kecairan pasaran bagi pembiayaan Kerajaan dan kemampuan keberhutungan negara. Dasar fiskal mengembang yang dilaksanakan oleh Kerajaan membolehkan sokongan fiskal disediakan bagi menangani krisis COVID-19, menyokong ekonomi domestik, menjana pelaburan, merangsang perbelanjaan pengguna dan mewujudkan peluang pekerjaan.

Dalam situasi pemulihan ekonomi global yang tidak seimbang dan tidak menentu, operasi fiskal kekal proaktif dan pantas bertindak balas terhadap persekitaran ekonomi dan keutamaan dasar yang dinamik. Usaha untuk meningkatkan keberkesanan dan kecekapan perbelanjaan

akan disokong oleh langkah perbelanjaan berhemat serta mengoptimumkan sumber sedia ada selari dengan keperluan semasa.

Justeru, Kerajaan sedang melaksanakan langkah perbelanjaan berhemah supaya kedudukan kewangan negara kekal terkawal termasuklah menyemak dan menilai semula keberkesanan setiap program subsidi dan insentif yang dilaksanakan bagi memastikan peruntukan yang optimum disediakan untuk setiap program dan membolehkan penjimatan yang diperoleh disalurkan kepada program-program yang mengutamakan kesejahteraan rakyat.

Hal ini berikutan jumlah peningkatan hasil tidak mencukupi untuk membiayai keseluruhan keperluan perbelanjaan Kerajaan Persekutuan. Ini termasuklah melaksanakan kawalan ketat atas aliran tunai bagi mengutamakan pembayaran subsidi untuk mengelakkan gangguan bekalan. Dengan itu, Kerajaan perlu melaksanakan langkah-langkah penjimatan perbelanjaan bagi membantu membiayai sebahagian perbelanjaan tambahan berkaitan bantuan dan subsidi demi kesejahteraan rakyat.

Mengambil kira keperluan peruntukan tambahan bagi bantuan dan subsidi yang diperlukan dan defisit akaun semasa, pelaksanaan penjimatan perbelanjaan Kerajaan dengan sasaran sekurang-kurangnya 5 peratus dari baki peruntukan perbelanjaan mengurus tahun 2022 semua Kementerian merupakan langkah terbaik pada masa ini. Kementerian Kewangan telah mengeluarkan **Pekeliling Perpendaharaan PB3.1 (Pindaan 2022) mengenai Garis Panduan Penjimatan Perbelanjaan Awam** yang dikuatkuasakan dan digunakan oleh semua kementerian/jabatan/agensi bertujuan memastikan perbelanjaan awam dioptimumkan serta menyokong sasaran penjimatan yang diperlukan Kerajaan bagi mendahuluikan program-program kebijakan rakyat dan penjanaan aktiviti ekonomi.

Selain itu, dasar dan pengurusan hasil akan ditambah baik secara berperingkat tanpa menjaskan momentum pemulihan. Dalam Bajet 2022, defisit fiskal telah disasarkan pada 6% daripada KDNK. Untuk tahun 2022, ekonomi diunjurkan berkembang antara 5.3% hingga 6.3% dan

kadar inflasi dijangka mencatat 2.2% - 3.2%. Untuk suku pertama tahun 2022, ekonomi Malaysia mencatatkan pertumbuhan 5.0% dan kadar inflasi 2.2%. Mengambil kira pertumbuhan KDNK suku kedua dijangka lebih kukuh, Kerajaan yakin unjuran tahun 2022 dapat dicapai.

Sebagai sebuah ekonomi terbuka, Malaysia terdedah kepada perubahan senario ekonomi global termasuk ketegangan geopolitik, tekanan inflasi dan gangguan rantaian makanan. Justeru, bagi melindungi rakyat daripada beban kenaikan kos sara hidup, Kerajaan menjangkakan perbelanjaan subsidi akan meningkat kepada sekitar RM78 bilion pada tahun 2022 berbanding unjuran asal sebanyak RM31 bilion. Walau bagaimanapun, peningkatan perbelanjaan ini dijangka akan ditampung sebahagian oleh potensi peningkatan hasil terutamanya hasil berkaitan komoditi dan hasil tambahan lain termasuk langkah cukai yang diumumkan dalam Bajet 2022.

Kerajaan juga akan melaksanakan inisiatif pembaharuan fiskal seperti pengenalan Akta Tanggungjawab Fiskal (FRA), Strategi Hasil Jangka Sederhana (MTRS) dan semakan semula perbelanjaan awam termasuk menambah baik program subsidi bersasar bagi memastikan kecekapan dan keberkesanan perbelanjaan Kerajaan. Semua inisiatif ini adalah penting bagi memastikan kedudukan kewangan Kerajaan kekal kukuh, seterusnya menyediakan ruang fiskal yang mencukupi bagi menghadapi sebarang krisis pada masa hadapan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : DATUK ABD RAHIM BIN BAKRI [KUDAT]

TARIKH : 26 JULAI 2022 (SELASA)

SOALAN

DATUK ABD RAHIM BIN BAKRI [KUDAT] minta **MENTERI KANAN PENDIDIKAN** menyatakan bilakah projek bangunan gantian sekolah daif SK Rosob Pitas yang telah diluluskan pada tahun 2021 dapat dilaksanakan dan bila kontraktor akan dilantik serta bilakah projek ini akan dapat disiapkan memandangkan SK Rosob adalah sekolah yang daif dan usang dan apakah peruntukan bagi projek ini masih tersedia ataupun telah ditarik balik atau dibatalkan oleh Kementerian Pendidikan.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam menyediakan infrastruktur pendidikan yang selamat dan kondusif untuk kegunaan murid dan warga sekolah di seluruh negara termasuk negeri Sabah.

Untuk makluman Ahli Yang Berhormat, projek pembinaan bangunan gantian penuh di Sekolah Kebangsaan (SK) Rosob, Pitas, Sabah, telah diluluskan dalam Rancangan Malaysia Ke-12 (RMKe-12), *Rolling Plan 1* (RP1) tahun 2021. Skop projek ini meliputi meroboh dan membina semula enam bilik darjah serta kemudahan-kemudahan lain termasuk perolehan perabot. Dalam hal ini, Jabatan Kerja Raya (JKR) Sabah telah menjalankan kerja ukur terperinci termasuk siasatan tanah dan mendapati keluasan tapak sekolah seluas 1.13 ekar sahaja. Keluasan ini adalah tidak mencukupi untuk dibangunkan mengikut skop yang ditetapkan. Oleh yang demikian, Jabatan Pendidikan Negeri (JPN) Sabah telah mengenal pasti tapak baharu seluas lapan ekar di Mukim Pingan-Pingan Daerah Pitas yang jaraknya sejauh dua kilometer dari tapak asal untuk pembangunan semula SK Rosob. Pelaksanaan projek ini akan diangkat semula untuk kelulusan sebaik sahaja proses pengambilan tanah selesai dilaksanakan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN WONG KAH WOH [IPOH TIMUR]

TARIKH : 26 JULAI 2022 (SELASA)

SOALAN

TUAN WONG KAH WOH [IPOH TIMUR] minta **MENTERI KANAN PENDIDIKAN** menyatakan sama ada Kerajaan berhasrat untuk memberikan pengiktirafan kepada Sijil UEC Sekolah Persendirian Menengah Cina (SPMC) untuk tujuan kemasukan ke universiti awam. Bilakah peruntukan Kerajaan Persekutuan kepada SPMC akan disalurkan pada tahun ini.

JAWAPAN

Tuan Yang di-Pertua,

Sehingga kini Kementerian Pendidikan Malaysia (KPM) kekal untuk tidak mengiktiraf Unified Examination Certificate (UEC) yang dilaksanakan di sekolah menengah persendirian Cina (SMPC) berlandaskan peruntukan Akta Pendidikan 1996 [Akta 550]. SMPC menjalankan pendidikan peringkat menengah dengan menggunakan kurikulum yang digubal dan dibangunkan atas inisiatif Dong Zong. Selain itu, sistem pendidikan SMPC menggunakan bahasa Cina sebagai bahasa pengantar utamanya.

Untuk makluman Ahli Berhormat, Dasar Pendidikan Kebangsaan dilaksanakan melalui suatu sistem pendidikan kebangsaan yang memperuntukkan bahasa kebangsaan sebagai bahasa pengantar utama, melaksanakan kurikulum kebangsaan dan menyediakan murid bagi menduduki peperiksaan yang sama. Penetapan ini adalah bagi memenuhi aspirasi dan keperluan negara di masa hadapan serta sebagai usaha memupuk perpaduan dalam kalangan rakyat selaras dengan prinsip Rukun Negara.

Oleh yang demikian, UEC perlu mengikut Dasar Pendidikan Kebangsaan sekiranya mahu dipertimbangkan penyelesaiannya oleh kerajaan pada masa hadapan.

Untuk makluman Ahli Yang Berhormat, KPM tidak pernah menyalurkan sebarang peruntukan kewangan kepada SMPC disebabkan sistem pendidikan SMPC yang menawarkan UEC adalah tidak selari dengan Dasar Pendidikan Kebangsaan, Akta 550 dan lain-lain perundangan yang sedang berkuat kuasa.

Sekian, terima kasih.

SOALAN NO: 65

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK WILSON UGAK ANAK KUMBONG
[HULU RAJANG]**

TARIKH : 26 JULAI 2022 (SELASA)

SOALAN

Datuk Wilson Ugak Anak Kumbong [Hulu Rajang] minta **MENTERI KOMUNIKASI DAN MULTIMEDIA** menyatakan bilangan dan lokasi akses internet menggunakan satelit yang telah dipasang di rumah-rumah panjang di kawasan Parlimen P216 Hulu Rajang.

JAWAPAN

Tuan Yang Dipertua,

Bagi membolehkan ketersediaan dan kebolehcapaian liputan rangkaian internet di Malaysia berada pada tahap memberangsangkan, Kerajaan giat melipatgandakan usaha melalui inisatif jalur lebar satelit dan sebanyak 124 lokasi di Parlimen Hulu Rajang telah siap dilaksanakan setakat suku pertama 2022.

Daripada 124 lokasi yang dilaksanakan ini, sebanyak 121 lokasi adalah di kawasan rumah panjang, manakala tiga lokasi lagi adalah di kawasan sekolah iaitu di SK Nanga Telawan, SK Lusong Laku, dan SK Nanga Balang. Senarai penuh 121 lokasi jalur lebar satelit di Parlimen Hulu Rajang adalah seperti berikut:

SOALAN NO : 65

Bil	Lokasi Rumah Panjang
1	Jeti Empangan Bakun
2	Kg. Naha Nyabong
3	Kg. Sekapan Pendek
4	Long Bangan 2
5	Long Jaik, Belaga
6	Long Jawe
7	Long Malim Rh Penan, Tegulang
8	Long Singu
9	Long Unai
10	Naha Jaley
11	Punan Sama
12	Rh Agam
13	Rh Aging
14	Rh Ajai, Ng Senuang
15	Rh Ajan, Long Singot
16	Rh Aji Ng Ibun. Sg Pila
17	Rh Albert Lasah
18	Rh Alice Beda
19	Rh Ama, Nanga Metah
20	Rh Ambu
21	Rh Amit
22	Rh Anding, Menuan
23	Rh Anthony Jiram
24	RH Asan, Nanga Metah
25	Rh Awan
26	Rh Bajang
27	Rh Barang
28	Rh Boniface
29	Rh Bully
30	Rh Daro
31	Rh Ding
32	Rh Empang
33	Rh Engsong Sg. Kain
34	Rh Gare Sungai Kain
35	Rh Gendang
36	Rh Gendang Sungai Puro
37	Rh Gindal
38	Rh Gon, Ng Serian
39	Rh Goyang, Ng Ensurai
40	Rh Ibin
41	Rh Jack
42	Rh Jala, Ng pan , Sg Melinau
43	Rh James Badak
44	Rh James Saka, Ng Tiau

SOALAN NO : 65

Bil	Lokasi Rumah Panjang
45	Rh Jamit
46	Rh Jamit Ng. Latap Pilla
47	Rh Jelani
48	Rh Jeranding Ak Gunchang
49	Rh Jok Anyi
50	Rh Jos
51	Rh Kalat
52	Rh Kancin
53	Rh Kanyan Kaki Wong Mika
54	Rh Kejaman Neh
55	Rh Killau B
56	Rh Kulleh
57	Rh Lasah Mering
58	Rh Lat
59	Rh Lawan
60	Rh Majang Ak Ragan
61	Rh Manggie
62	Rh Mansai Ak Nyua
63	Rh Mathew Lajang, Long Bangan
64	Rh Mawang
65	Rh Melinggang
66	Rh Mengga Ak Ukau
67	Rh Mering Madang, Long Dapui, Pesu, Tubau
68	Rh Mero, Lubuk Dabai, Sg. Pila
69	Rh Mersam Jok
70	Rh Nading, Nanga Selentang, Gaat
71	Rh Narok
72	Rh Nawing, Ng Oyan
73	Rh Nisson
74	Rh Nyalang Tahe
75	Rh Nyamok, Ng Serau
76	Rh Nyawai
77	Rh Peter
78	Rh Pilai
79	Rh Ragai, Nanga Balang
80	Rh Rajau
81	Rh Richard Hanyie
82	Rh Saba, Ng Grugu, Sg. Oyan
83	Rh Said
84	Rh Sambop
85	Rh Sambop Batu Pilau
86	Rh Samon Nanga Entelawan
87	Rh Sampai

SOALAN NO : 65

Bil	Lokasi Rumah Panjang
88	Rh Sebuang Ng Merama
89	Rh Segiang
90	Rh Shadan
91	Rh Steward Sambang
92	Rh Sumbang Anak Singkot
93	Rh Sylvester Gerunsen
94	Rh Tajai Ng Semirah
95	Rh Talip Ak Punai
96	Rh Tangai, Bukit Kawit
97	Rh Tani
98	Rh Tg. Long Pawah
99	Rh Tungku, Ng Sebiro
100	Rh Umbang
101	Rh Umbar, Sg Tiau
102	Rh Vincent Bangau
103	Rh Wan Usin
104	Rh Wong
105	Rumah Dari Jelawing
106	Sg. Kupa
107	Uma Aging Baleng Avoon
108	Uma Apan
109	Uma Badeng Anthony Lerang Jambatan Urun
110	Uma Badeng Long Malim Kenyah, Sg Tegulang
111	Uma Ding Kun, Upa Pawa Long Aie
112	Uma Kejaman Lasah
113	Uma Mudung, Data Kakus
114	Uma Nareu, Long Lidem
115	Uma Osman Long Nanyan
116	Uma Penan Lg Watt, Tegulang
117	Uma Penan Long Abit
118	Uma Penan Long Peran
119	Uma Seping Long Koyan
120	Uma Seping, Bt. 6, Long Koyan, Belaga
121	Uma Tevok Long Buyun

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN JUGAH ANAK MUYANG @ TAMBAT
[LUBOK ANTU]**

TARIKH : 26 JULAI 2022 (SELASA)

SOALAN

TUAN JUGAH ANAK MUYANG @ TAMBAT [LUBOK ANTU] minta **MENTERI KANAN PENDIDIKAN** menyatakan mengapa pengambilan guru opsyen bahasa Iban dihentikan dan memohon pengambilan guru bahasa Iban diteruskan dan wajib di Sarawak.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited memenuhi keperluan guru di sekolah bawah KPM mengikut opsyen mata pelajaran termasuk Bahasa Iban.

Untuk makluman Ahli Yang Berhormat, bagi pengambilan guru pelatih di Institut Pendidikan Guru Malaysia, tiada ambilan guru pelatih bahasa Iban sekolah rendah dibuat bagi Program Ijazah Sarjana Muda Perguruan (PISMP) pada tahun 2022 untuk keluaran tahun 2027. Ini kerana unjuran bekalan guru Bahasa Iban sekolah rendah sehingga tahun 2027 adalah mencukupi. Graduan PISMP opsyen Bahasa Iban bagi sekolah rendah pada tahun 2022 adalah seramai 22 orang.

Bagi pengambilan Pegawai Perkhidmatan Pendidikan pula, ambilan guru opsyen Bahasa Iban sekolah menengah pada tahun 2022 masih diteruskan mengikut keperluan guru semasa iaitu seramai 31 orang.

KPM komited untuk terus memastikan keperluan guru di seluruh negara, termasuk guru Bahasa Iban adalah mencukupi supaya pelaksanaan pengajaran dan pembelajaran dapat dilaksanakan dengan berkesan.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS, TAHUN 2022**

PERTANYAAN : LISAN

**DARIPADA : YB PUAN HANNAH YEOH TSEOW SUAN
(SEGAMBUT)**

TARIKH : 26 JULAI 2022 (SELASA)

SOALAN

PUAN HANNAH YEOH TSEOW SUAN (SEGAMBUT) minta **MENTERI PEMBANGUNAN WANITA, KELUARGA DAN MASYARAKAT** menyatakan apakah fungsi dan langkah yang telah diambil oleh Jawatankuasa Khas Kabinet Melindungi Golongan Rentan (dipengerusikan oleh Perdana Menteri) selepas penubuhan, berapa kali mesyuarat dan kejayaan yang telah dicapai oleh Jawatankuasa ini.

JAWAPAN

Tuan Yang di-Pertua,

Memorandum Jemaah Menteri berhubung dengan penubuhan Jawatankuasa Kabinet Melindungi Golongan Rentan telah dibentangkan dan diluluskan dalam Mesyuarat Jemaah Menteri pada 15 Jun 2022. Jawatankuasa yang dipengerusikan oleh YAB Perdana Menteri ini bertanggungjawab meneliti secara menyeluruh isu berkaitan dengan pusat jagaan di negara ini termasuk pusat jagaan kanak-kanak, anak yatim, Orang Kurang Upaya (OKU), warga emas dan pusat tahniz. Jawatankuasa ini juga bertanggungjawab merangka pendekatan holistik bagi memastikan kebijakan golongan tersebut dilindungi daripada manipulasi, pengabaian dan penganiayaan.

Mengambil kira isu rentas sektoral, Jawatankuasa Kabinet ini melibatkan kerjasama dan komitmen daripada pelbagai kementerian dan agensi kerajaan berdasarkan fungsi dan kepakaran masing-masing, untuk memastikan semua matlamat dapat dicapai dan dilaksanakan secara menyeluruh dan komprehensif. Jawatankuasa Kabinet Melindungi Golongan Rentan ini dianggotai oleh Kementerian Pembangunan Wanita, Keluarga dan Masyarakat, Kementerian Pendidikan, Kementerian Dalam Negeri, Kementerian Perumahan dan Kerajaan Tempatan, Kementerian Kesihatan, Kementerian Komunikasi dan Multimedia serta Jabatan Kemajuan Islam Malaysia.

Bagi membendung isu manipulasi, pengabaian dan penganiayaan golongan rentan di pusat jagaan, KPWKM melalui Jabatan Kebajikan Masyarakat (JKM) sentiasa melaksanakan pemantauan terhadap pusat jagaan yang berdaftar melalui pemeriksaan secara berkala sekurang-kurangnya setiap enam (6) bulan sekali. Pada tahun 2021, sebanyak 875 pemeriksaan berkala telah dilaksanakan di semua negeri. Selain itu, JKM juga telah melaksanakan *task force* pemutihan dan tindakan penguatkuasaan terhadap pusat jagaan yang tidak berdaftar bermula bulan Januari 2022. Pusat jagaan yang tidak berdaftar ini diambil tindakan lak, pendakwaan dan kompaun. Statistik JKM menunjukkan sebanyak 1,464 tindakan penguatkuasaan telah diambil terhadap pusat jagaan yang tidak berdaftar dari bulan Januari 2015 hingga Disember 2021.

Jawatankuasa ini dijangka bermesyuarat untuk kali yang pertama dalam masa yang terdekat. Sehubungan dengan itu, diharapkan dengan platform ini, akan berupaya membantu kerajaan memastikan kesejahteraan golongan rentan khasnya di pusat jagaan atau pusat tahfiz terbela dan diberikan perhatian yang sewajarnya.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN LARRY SOON @ LARRY SNG WEI
SHIEN [JULAU]**

TARIKH : 26 JULAI 2022 (SELASA)

SOALAN

TUAN LARRY SOON @ LARRY SNG WEI SHIEN [JULAU] minta **MENTERI KANAN PENDIDIKAN** menyatakan secara terperinci berapa jumlah kekosongan perjawatan Pegawai Pendidikan di Sarawak serta tindakan Kementerian untuk segera mengisi kekosongan jawatan tersebut demi memastikan jumlah guru untuk mengajar di negeri Sarawak adalah mencukupi.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memberi perhatian terhadap perkara berkenaan pengisian guru di sekolah rendah dan menengah seluruh negara, termasuk di negeri Sarawak bagi memastikan pengajaran dan pembelajaran di sekolah dapat dilaksanakan dengan berkesan. KPM juga berusaha untuk memastikan guru kelahiran Sarawak diberikan keutamaan untuk ditempatkan di negeri kelahiran mereka berdasarkan kekosongan perjawatan dan keperluan opsyen, selaras dengan Dasar 90:10 yang telah diperkenalkan pada tahun 2015.

Pelbagai pendekatan telah dan sedang dilaksanakan oleh KPM bagi memastikan semua sekolah di seluruh negara termasuk Sarawak mendapat bekalan guru yang mencukupi. Terkini, KPM telah selesai melaksanakan pengambilan khas guru secara *one-off* pada tahun 2021. Sehingga 25 Julai 2022, seramai 16,381 guru telah ditempatkan di sekolah KPM dan daripada jumlah itu, negeri Sarawak menerima 3,144 guru.

Untuk makluman Ahli Yang Berhormat, sehingga 25 Julai 2022 jumlah perjawatan Pegawai Perkhidmatan Pendidikan (PPP) bagi sekolah di Sarawak adalah sebanyak 43,070 dan pengisian adalah sebanyak 39,888. Ini bermakna, kekosongan perjawatan PPP di Sarawak adalah sebanyak 3,182.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN KHALID BIN ABD SAMAD
[SHAH ALAM]
TARIKH : 26 JULAI 2022 (SELASA)

SOALAN

TUAN KHALID BIN ABD SAMAD [SHAH ALAM] minta **MENTERI KEWANGAN** menyatakan apakah langkah-langkah yang diambil oleh pihak Kerajaan bagi mengawal kadar pertukaran wang asing yang memberi kesan kepada barang import.

JAWAPAN

Tuan Yang di-Pertua,

Kadar pertukaran ringgit yang fleksibel akan terus memainkan peranan yang penting sebagai penyerap kejutan luaran tanpa menjelaskan aktiviti ekonomi domestik meskipun dalam keadaan pasaran kewangan dan kadar pertumbuhan global yang tidak menentu.

Oleh yang demikian, Kerajaan menerusi Bank Negara Malaysia (BNM) akan terus menguruskan risiko-risiko yang wujud dalam pasaran pertukaran asing menerusi tiga (3) langkah berikut:

- i. **Langkah Pertama: Menggunakan instrumen dasar operasi bagi memastikan keadaan yang teratur dalam pasaran pertukaran asing.**

Walaupun BNM tidak menyasarkan sebarang paras kadar pertukaran, BNM akan memastikan tiada perubahan secara drastik atau melampau dalam nilai ringgit. Tindakan ini akan

membantu perniagaan merancang dan melaksanakan keputusan dan pelaburan dengan lebih baik;

- ii. Langkah Kedua: Memastikan institusi perbankan dan syarikat korporat di Malaysia mengambil langkah-langkah kehematan dalam menghadapi risiko pertukaran asing dan melindungi ringgit daripada aktiviti spekulatif.**

Langkah ini dapat mengurangkan risiko perubahan kadar ringgit yang berlebihan. Sebagai contoh, BNM memperkenalkan instrumen pelindung nilai seperti *dynamic hedging* bagi menyediakan fleksibiliti agar peserta pasaran kewangan dan sektor perniagaan boleh melaksanakan pengurusan risiko pendedahan mata wang asing dengan lebih baik; dan

- iii. Langkah Ketiga: Melaksanakan beberapa inisiatif untuk meningkatkan akses dan menarik pelabur asing dalam pasaran bon domestik, termasuk usaha menambah baik mudah tunai bon pasaran sekunder serta memperkuuh struktur dan mudah tunai pasaran pertukaran asing.**

Inisiatif tersebut telah membantu mengekalkan Malaysia dalam senarai Indeks Bon Kerajaan Dunia (*World Government Bond Index*, WGBI) FTSE Russell.

Kementerian Kewangan juga telah mengeluarkan Pekeliling Perbendaharaaan 3.1 pada 14 Julai 2022 mengenai langkah penjimatan untuk dilaksanakan di peringkat semua Kementerian dan agensi Kerajaan. Langkah ini adalah untuk mengenal pasti penjimatan perbelanjaan bagi menampung sebahagian daripada keperluan subsidi tambahan. Antara langkah kawalan perbelanjaan yang diperkenalkan termasuk kawalan ke atas lawatan ke luar dan perolehan barang import. Di samping itu, sebarang pelaburan yang melibatkan aliran wang ke luar negara perlu mendapat kelulusan Kementerian Kewangan terlebih dahulu.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN AHMAD BIN HASSAN [PAPAR]

TARIKH : 26 JULAI 2022 (SELASA)

SOALAN

TUAN AHMAD BIN HASSAN [PAPAR] minta **MENTERI KANAN PENDIDIKAN** menyatakan sambutan program Pendidikan Teknikal dan Latihan Vokasional (TVET) di Sabah dan usaha Kementerian bagi menyediakan program berimpak tinggi yang memiliki pensijilan kemahiran tinggi yang diiktiraf di peringkat industri dan antarabangsa.

JAWAPAN

Tuan Yang di-Pertua,

Kementerian Pendidikan Malaysia (KPM) telah melaksanakan Transformasi Pendidikan Vokasional (TPV) bagi tujuan menjadikan pendidikan vokasional sebagai salah satu pilihan bidang pengajian selain daripada aliran perdana bermula tahun 2012. KPM komited dalam menyediakan akses pendidikan TVET kepada semua murid warganegara tanpa mengira latar belakang, sosio-ekonomi dan kaum di seluruh negara, termasuk di negeri Sabah.

Untuk makluman Ahli Yang Berhormat, pada masa ini terdapat tujuh buah kolej vokasional (KV) dan 43 buah sekolah menengah kebangsaan (SMK) di negeri Sabah yang menawarkan program TVET. Terdapat 103 program yang ditawarkan, antaranya adalah program Teknologi Automotif, Teknologi Kimpalan, Teknologi Pemesinan Industri dan Teknologi Elektrik.

Pada tahun 2022, seramai 7,000 orang murid mengikuti program TVET di negeri Sabah. Jumlah murid di Sabah yang mengikuti TVET di KV dan SMK pada tahun ini adalah meningkat berbanding 6,602 orang murid pada tahun 2021 dan 6,334 orang murid pada tahun 2020 orang. Ini menunjukkan program TVET kian mendapat sambutan dan penerimaan yang baik dalam kalangan murid di Sabah.

Untuk makluman Ahli Yang Berhormat, KPM sentiasa komited berusaha untuk melahirkan graduan TVET KPM yang berkualiti serta mempunyai kebolehpasaran (marketability), kebolehkerjaan (workability) dan kebolehgajian (employability) yang tinggi untuk memenuhi keperluan revolusi perindustrian. Antara program yang disediakan termasuk program Diploma Vokasional Malaysia (DVM), Sijil Vokasional Malaysia (SVM), Sijil Kemahiran Malaysia (SKM) dan sijil profesional di Kolej Vokasional KPM.

Dalam usaha untuk meningkatkan kefahaman dan penerimaan masyarakat berhubung TVET, KPM melaksanakan aktiviti jerayawara dan hebahan di seluruh negara. Selain itu, KPM juga menggiatkan program kesedaran dan jangkauan serta kempen bersama pelbagai pihak untuk

mempromosikan TVET sebagai pilihan utama untuk anak-anak melanjutkan pengajian dalam bidang kemahiran di peringkat menengah atas dan lepasan menengah.

Selain itu, KPM juga telah menubuhkan Jawatankuasa Hubungan Industri TVET (JHiTVET). Melalui JHiTVET, KPM menjalankan pelbagai kerjasama dengan pihak industri dalam menyediakan program yang berimpak tinggi dan memastikan program TVET KPM diiktiraf di peringkat industri dan antarabangsa. Antara kerjasama KPM bersama-sama pihak industri adalah seperti berikut:

- i. ProjekLINK (Latihan PerINDustrian Juru Kimpal) Shell mulai tahun 1991 dengan kerjasama Shell Bhd. Program adalah berkaitan industri kimpalan bidang minyak dan gas yang dilaksanakan di KV Miri, KV Likas dan KV Bintulu. Kemahiran teknikal dan kewangan disokong oleh Shell Bhd. Melalui program ini, murid mendapat persijilan industri dan sijil profesional setelah memenuhi keperluan dan syarat-syarat latihan praktikal. ProjekLINK ini mempunyai kesan langsung dalam mengubah masyarakat tempatan menjadi juru kimpal profesional yang mendapat permintaan tinggi di industri dan peringkat antarabangsa.
- ii. Program P-Tech IBM (*Pathways in Technology Early College High Schools*) yang dilaksanakan mulai tahun 2020 dengan kerjasama *International Business Machines Corporation* (IBM) dan *Malaysia Digital Economy Corporation* (MDEC) bagi memberi kemahiran, latihan dan pengetahuan kepada murid tentang keusahawanan dan revolusi perindustrian bagi mendepani industri digitalisasi. Murid akan mendapat sijil *Intensive P-Tech Traininng* IBM dan merupakan nilai tambah kepada murid dalam meningkatkan keupayaan kebolehpasaran dalam industri digital.

KPM yakin usaha berterusan yang dilaksanakan ini dapat memberi persepsi yang positif dan seterusnya memartabatkan pendidikan TVET di institusi pendidikan bawah KPM khususnya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN BARU BIAN
[SELANGAU]**

TARIKH : 26 JULAI 2022 (SELASA)

SOALAN

Minta **MENTERI PENGAJIAN TINGGI** menyatakan bagaimanakah proses pemilihan program biasiswa TVET Dermasiswa B40 untuk pelajar B40 yang melanjutkan pengajian dalam pendidikan dan latihan teknikal dan vokasional (TVET) akan dilaksanakan. Adakah terdapat kuota untuk Sabah dan Sarawak.

JAWAPAN

Tan Sri Yang di-Pertua,

Untuk makluman Ahli Yang Berhormat, program penajaan pendidikan merupakan satu strategi penting yang menyumbang kepada peluang pendidikan khususnya di peringkat pengajian tinggi. Sejajar dengan hasrat Kerajaan memastikan akses terbaik kepada peluang pendidikan dilaksanakan melalui RMKe-12 dan Wawasan Kemakmuran Bersama 2030, Kementerian Pengajian Tinggi (KPT) sentiasa berusaha mewujudkan program-program penajaan baharu yang dapat memberikan peluang terutamanya kepada golongan B40, untuk meneruskan pendidikan di peringkat pengajian tinggi. Dalam hal ini, Kerajaan telah bersetuju untuk melaksanakan Program Dermasiswa Kumpulan B40 Bidang Pendidikan dan Latihan Teknikal dan Vokasional (Program Dermasiswa B40 TVET) sebagaimana yang telah diumumkan oleh YAB

Perdana Menteri di Majlis Perasmian Minggu TVET Negara 2022 pada 20 Jun 2022.

Program Dermasiswa B40 TVET mensasarkan pelajar B40 yang melanjutkan pengajian di peringkat diploma dan ijazah sarjana muda dalam bidang TVET di Institusi Pengajian Tinggi Awam (IPTA) di bawah seliaan KPT yang merangkumi Universiti Awam (UA), Politeknik dan Kolej Komuniti. Menerusi program dermasiswa ini, pelajar yang terpilih akan menerima pembentangan yuran pengajian dan elaun wang saku sepanjang tempoh pengajian mereka.

Pemilihan pelajar-pelajar sebagai penerima Program Dermasiswa B40 TVET adalah dibuat berdasarkan maklumat pendapatan keluarga yang ditetapkan pada kadar RM4,850 dan ke bawah. Penetapan ini adalah berasaskan kepada had pendapatan isi rumah yang sedang berkuat kuasa sebagaimana yang dilaporkan oleh Jabatan Perangkaan Malaysia. Pemilihan pelajar yang layak ini dilaksanakan tanpa mengira faktor kaum, ras, agama, kuota negeri dan lokaliti. Selain itu, semakan silang turut dibuat berpandukan data program e-Kasih (Jabatan Perdana Menteri) dan data Bantuan Keluarga Malaysia (Lembaga Hasil Dalam Negeri) bagi memastikan kelayakan penerima.

Terkini, hebahan penawaran Program Dermasiswa B40 TVET ini bagi fasa pertama telah dilaksanakan menerusi platform UPUOnline pada 22 Julai 2022, melibatkan para pelajar yang mengikuti pengajian di peringkat diploma.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN ISNARAISAH MUNIRAH MAJILIS
[KOTA BELUD]**

TARIKH : 26 JULAI 2022 (SELASA)

SOALAN

PUAN ISNARAISAH MUNIRAH MAJILIS [KOTA BELUD] minta **MENTERI PELANCONGAN, SENI DAN** menyatakan adakah Arkib Negara Malaysia dirujuk terlebih dahulu sebelum lawatan kerja Menteri Muda di Pejabat Ketua Menteri Sarawak pada tahun 2017 dan lawatan kerja Menteri Hal Ehwal Sabah dan Sarawak pada tahun 2022 ke Jabatan Arkib London, United Kingdom bagi mendapatkan dokumen-dokumen berkaitan Perjanjian Malaysia 1963.

JAWAPAN

Tuan Yang di-Pertua,

1. Arkib Negara Malaysia tidak menerima rujukan rasmi sebelum lawatan kerja Menteri Muda di Pejabat Ketua Menteri Sarawak ke United Kingdom pada tahun 2017. Memandangkan ia merupakan isu membabitkan bidang kuasa Kerajaan Negeri, maka ia adalah tertakluk kepada perancangan dan budi bicara pihak terbabit.
2. Sementara itu, Bahagian Hal Ehwal Sabah dan Sarawak, Jabatan Perdana Menteri ada merujuk Arkib Negara Malaysia sebelum lawatan kerja Menteri di Jabatan Perdana Menteri Hal Ehwal Sabah dan Sarawak ke London dari 19 hingga 26 Jun 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD BIN HASSAN [PAPAR]

TARIKH : 26 JULAI 2022 (SELASA)

SOALAN

Minta **MENTERI PENGAJIAN TINGGI** menyatakan langkah-langkah yang diambil bagi melahirkan '*Future Proof University & Graduates*' di universiti tempatan dan universiti swasta di seluruh negara.

JAWAPAN

Tan Sri Yang di-Pertua,

Kementerian Pengajian Tinggi (KPT) sentiasa memantau kurikulum yang dibangunkan oleh Institusi Pendidikan Tinggi (IPT) agar memenuhi keperluan industri secara optimum dan memberi impak tinggi kepada masyarakat serta negara dalam usaha melahirkan *Future Proof Graduates*. Antara inisiatif utama yang telah dilaksanakan ialah melalui *Experiential Learning and Competency-Based Education Landscape* atau lebih dikenali sebagai EXCEL.

EXCEL merupakan satu kerangka transformasi program akademik yang mengintegrasikan elemen industri, komuniti, penyelidikan dan fleksibiliti (*personalised*) dalam menghasilkan graduan yang mempunyai atribut dan kemahiran. Kerangka ini memberi penekanan terhadap pembelajaran berasaskan pengalaman dan kompetensi bagi memupuk pembangunan graduan yang lebih holistik. Selain itu, EXCEL bertindak sebagai pemacu transformasi program akademik bagi menghasilkan graduan yang

mempunyai daya tahan dan keupayaan untuk menghadapi serta menerima perubahan (*Resilient and Change-Ready Talent*).

Universiti Awam (UA) kini sedang menerapkan kerangka EXCEL dalam kurikulum bagi program akademik yang baharu dan juga melalui semakan kurikulum bagi program akademik sedia ada, agar dapat menghasilkan graduan yang memperoleh kemahiran holistik sebagai pengamal pembelajaran sepanjang hayat (*lifelong learners*), usahawan inovatif (*innovative entrepreneurs*), pengamal kreatif (*creative practitioners*) dan pengaruh perubahan (*change-makers*). Pada masa yang sama, KPT juga komited untuk memastikan Institusi Pendidikan Tinggi Swasta (IPTS) bergerak ke arah industri berimpak tinggi selaras dengan pengiktirafan IPTS sebagai sebuah industri. Justeru, Kementerian telah melancarkan dokumen *Way Forward for Private Higher Education Institutions Education as an Industry (2020-2025)* yang menjadi dokumen pelan tindakan strategik pemantapan IPTS sebagai sebuah industri seterusnya menjadi universiti yang mampu melahirkan graduan kalis masa hadapan.

Pasukan Petugas Kebangsaan Pemudahcara IPTS Sebagai Industri (PEMUDAH IPTS) juga telah ditubuhkan bagi mengenal pasti isu dan cabaran yang dihadapi oleh IPTS dalam usaha untuk memacu pertumbuhan IPTS sebagai sebuah industri dan seterusnya menyumbang kepada pertumbuhan ekonomi negara. Sebanyak 37 inisiatif telah dikenal pasti melibatkan pindaan dan penambahbaikan kepada dasar, kriteria, proses, prosedur, akta, serta peraturan-peraturan sedia ada supaya kekal relevan dan seiring dengan perkembangan semasa. Ini adalah merupakan salah satu usaha Kementerian untuk menyediakan pemimpin, kakitangan, pelajar serta graduan IPTS ke arah *future proof university & graduates* di IPTS.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SYED IBRAHIM BIN SYED NOH
(LEDANG)**

TARIKH : 26 JULAI 2022 (SELASA)

TUAN SYED IBRAHIM BIN SYED NOH [LEDANG] minta **MENTERI PENGAJIAN TINGGI** menyatakan hasil dapatan dan langkah ke hadapan yang dapat dirangka sepanjang lawatan Menteri ke Turki, Amerika Syarikat, United Kingdom dan negara-negara luar lain sebelum ini.

JAWAPAN

Tan Sri Yang di-Pertua,

Secara umumnya, lawatan kerja Kementerian Pengajian Tinggi (KPT) ke luar negara adalah bertujuan untuk memastikan momentum hubungan kerjasama dua hala antara Malaysia dengan negara-negara luar dapat dipertingkat ke tahap yang lebih strategik menerusi peluang kerjasama baharu dalam bidang pendidikan tinggi. Kerjasama dua hala tersebut melibatkan universiti-universiti di Malaysia dengan rakan-rakan universiti di negara-negara yang telah dilawati. Ia merangkumi pertukaran dan mobiliti pelajar, pertukaran kepakaran dalam bidang Pendidikan dan Latihan Teknikal dan Vokasional (TVET), penyelidikan dan pembangunan kapasiti. Sebanyak 12 Memorandum Persefahaman (MoU)/Memorandum Perjanjian (MoA) telah dimeterai di peringkat institusi sepanjang lawatan kerja ke India, Qatar, United Kingdom, Romania dan Türkiye.

Dalam usaha untuk memartabatkan sektor pendidikan tinggi negara, Malaysia sentiasa mengambil peluang memperkuuh agenda pengantarabangsaan pendidikan tinggi negara. Salah satunya menerusi komitmen antara Malaysia dengan Qatar berhubung cadangan penubuhan kampus cawangan Universiti Kebangsaan Malaysia (UKM) di Qatar. Penubuhan kampus cawangan ini akan membuka prospek pasaran yang lebih meluas terhadap jenama pendidikan tinggi Malaysia yang berkualiti di Qatar dan ke pasaran Asia Barat bagi menggalakkan kemasukan pelajar antarabangsa ke Malaysia. Pembukaan cawangan UKM di Qatar akan turut meningkatkan penjanaan universiti.

KPT juga terus komited dalam memastikan Malaysia terus aktif di peringkat serantau dan antarabangsa menerusi pelbagai persidangan, seminar, bengkel dan mesyuarat. Antaranya adalah melalui penyampaian ucapan tama semasa Education World Forum (EWF) 2022 di London, United Kingdom dan EduData Summit (EDS) 2022 di New York, Amerika Syarikat. Penyertaan KPT di dalam persidangan ini dilihat menjadi pemangkin usaha bagi memantapkan lagi sistem pendidikan tinggi negara.

Selain itu, perjumpaan dengan pihak-pihak berkepentingan dalam tempoh lawatan kerja negara-negara tersebut juga turut diadakan. Antaranya termasuklah bersama Pengarah Urusan Quacquarelli Symonds (QS) bagi membincangkan pencapaian keseluruhan institusi pengajian tinggi (IPT) di Malaysia, di mana 24 buah IPT telah tersenarai dalam QS World University Ranking 2023 (QS WUR) buat pertama kalinya pada tahun ini. Pihak QS juga telah berkongsi pandangan tentang beberapa kaedah yang boleh dilaksanakan oleh pihak universiti bagi memenuhi kriteria yang ditetapkan oleh QS dengan lebih berkesan di samping membincangkan bidang-bidang yang perlu diberi fokus utama bagi membantu universiti-universiti untuk disenaraikan dalam ranking QS.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATO' SERI DR. WAN AZIZAH WAN ISMAIL [PANDAN]
TARIKH : 26 JULAI 2022 (SELASA)

SOALAN

DATO' SERI DR. WAN AZIZAH WAN ISMAIL [PANDAN] minta **MENTERI KEWANGAN** menyatakan apakah langkah-langkah strategik dan taktikal dari segi dasar fiskal dan monetari serta penguatkuasaan yang sedang dan akan diambil oleh Kerajaan bagi menangani isu kenaikan harga barang dan perkhidmatan yang menjelaskan kuasa membeli rakyat.

JAWAPAN

Tuan Yang di-Pertua,

Dasar fiskal Kerajaan dirangka berdasarkan dengan matlamat utama untuk memastikan kemampunan kewangan awam, kestabilan makro-ekonomi dan kesejahteraan rakyat. Dasar fiskal Kerajaan akan terus memberi tumpuan untuk melindungi rakyat daripada beban kenaikan kos sara hidup berikutan tekanan inflasi. Kerajaan menjangkakan perbelanjaan subsidi akan meningkat kepada sekitar RM77.7 bilion pada tahun 2022 berbanding unjuran asal sebanyak RM31 bilion. Selain itu, dari aspek pengurusan perbelanjaan, Kerajaan telah mengeluarkan Pekeliling Belanjawan (PB 3.1) mengenai Garis Panduan Penjimatan Perbelanjaan Awam kepada semua kementerian pada 14 Julai 2022 yang bertujuan antaranya bagi membantu membiayai sebahagian daripada perbelanjaan berkaitan bantuan dan subsidi demi kesejahteraan rakyat.

Dari sudut dasar monetari, Bank Negara Malaysia telah meningkatkan kadar dasar semalam atau dengan izin *Overnight Policy Rate* (OPR) sebanyak 25 mata asas lagi pada awal bulan ini kepada 2.25% berikutan prospek pertumbuhan ekonomi Malaysia yang semakin bertambah baik. Pada kadar OPR semasa, pendirian dasar monetari kekal akomodatif dan menyokong pertumbuhan ekonomi. Selain itu, pelbagai mekanisme seperti penetapan harga barang asas serta penguatkuasaan berterusan menerusi Ops Pantau dilaksanakan bagi mengawal kenaikan harga barang.

Tuan Yang di-Pertua,

Kerajaan juga akan meneruskan inisiatif pembaharuan fiskal seperti pengenalan Akta Tanggungjawab Fiskal (FRA), Strategi Hasil Jangka Sederhana (MTRS) dan semakan semula perbelanjaan awam termasuk menambah baik program subsidi bersasar bagi memastikan kecekapan dan keberkesanan perbelanjaan Kerajaan. Semua inisiatif ini adalah penting bagi memastikan kedudukan kewangan Kerajaan kekal kukuh, seterusnya menyediakan ruang fiskal yang mencukupi bagi menghadapi sebarang krisis pada masa hadapan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATUK SERI SAIFUDDIN NASUTION BIN ISMAIL [KULIM-BANDAR BHARU]
TARIKH : 26 JULAI 2022 (SELASA)

SOALAN

DATUK SERI SAIFUDDIN NASUTION BIN ISMAIL [KULIM-BANDAR BHARU] minta **MENTERI KEWANGAN** menyatakan keupayaan semasa kewangan Kerajaan menunaikan komitmen pembayaran hutang, tanggungan subsidi dan pembayaran emolumen dan pencen serta berapa nilai keseluruhan komitmen tanggungan subsidi, emolumen dan pencen dan bayaran hutang setakat suku pertama tahun 2022.

JAWAPAN

Tuan Yang di-Pertua,

Untuk makluman Ahli Yang Berhormat, pembayaran hutang, bayaran persaraan dan emolumen merupakan komponen perbelanjaan *locked-in*, dengan izin, yang diberi keutamaan terlebih dahulu berbanding komponen perbelanjaan yang lain. Sehubungan itu, Kerajaan sentiasa memastikan agar kedudukan kewangan Kerajaan adalah kukuh bagi memastikan keupayaan untuk membayar komitmen tersebut.

Sungguhpun perbelanjaan untuk subsidi meningkat secara mendadak berikutan harga komoditi global yang melonjak memberi tekanan kepada ruang fiskal, ia dapat ditampung melalui peningkatan hasil dan pelaksanaan langkah berhemah termasuk penjimatan perbelanjaan yang sedang dilaksanakan bagi memastikan kedudukan kewangan negara kekal terkawal.

Selain itu, mekanisme pemberian subsidi semasa sedang dikaji bagi melaksanakan pemberian subsidi secara bersasar. Penjimatan daripada langkah rasionalisasi subsidi ini membolehkan Kerajaan menyediakan lebih banyak peruntukan untuk program dan kemudahan yang memberi manfaat terus kepada rakyat yang memerlukan terutamanya kelompok B40.

Tuan Yang di-Pertua,

Untuk makluman Ahli Yang Berhormat, jumlah perbelanjaan Kerajaan Persekutuan direkodkan sebanyak RM86.7 bilion pada suku pertama 2022. Sebahagian besar perbelanjaan adalah untuk menampung bayaran emolumen (RM22 bilion), bayaran khidmat hutang (RM9.1 bilion) dan bayaran persaraan (RM8.4 bilion). Selain itu, sebanyak RM11.5 bilion telah dibelanjakan bagi tujuan subsidi, bantuan dan insentif termasuk subsidi petrol, diesel dan gas cecair memasak (LPG) serta bayaran Bantuan Keluarga Malaysia (BKM) fasa 1.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATO' SERI DR. WAN AZIZAH WAN ISMAIL [PANDAN]
TARIKH : 26 JULAI 2022 (SELASA)

SOALAN

DATO' SERI DR. WAN AZIZAH WAN ISMAIL [PANDAN] minta **MENTERI KEWANGAN** menyatakan apakah yang menyebabkan Ringgit Malaysia merudum ke USD 1 = RM 4.40 berbanding USD = RM 4.15 setahun yang lepas dan apakah tindakan monetari dan fiskal yang diambil bagi menangani isu ini.

JAWAPAN

Tuan Yang di-Pertua,

Penyusutan nilai ringgit pada tahun 2022 berbanding dolar Amerika Syarikat (AS) bukanlah unik kepada negara Malaysia sahaja, malah trend penyusutan ini turut dialami oleh mata wang utama dan serantau yang lain. Keadaan ini turut mencerminkan pengukuhan dolar AS.

Sehingga 15 Julai 2022, nilai ringgit telah menurun sebanyak -6.4% berbanding dolar Amerika Syarikat (AS). Jika dilihat dari segi peratusan penurunan, penurunan nilai ringgit adalah lebih sederhana berbanding penyusutan mata wang utama dan beberapa negara serantau yang lain. Perkara ini dapat dilihat bagi tempoh Januari sehingga Julai 2022 iaitu nilai matawang utama seperti euro telah menurun sebanyak -11.3% dan yen Jepun menurun sebanyak -17.0%. Di samping itu, nilai mata wang serantau yang lain termasuk rupiah Indonesia (-4.9%), peso Filipina (-9.6%), dolar Singapura (-3.7%), Won Korea (-10.3%), dan baht Thailand

(-9.3%) turut menyusut dengan kadar di antara -3.7% hingga -10.3% berbanding dolar AS.

Kelemahan mata wang utama dan serantau ini kebanyakannya disebabkan oleh faktor luaran, terutamanya peningkatan nilai dolar AS didorong oleh kenaikan kadar faedah AS yang pantas bagi membendung inflasi yang tinggi di AS. Menurut unjuran penganalisis ekonomi dan kewangan, *Federal Reserve* AS dijangka meningkatkan kadar faedah sebanyak 325 mata asas bagi keseluruhan tahun 2022 ke tahap 3.50%. Hal ini menyebabkan pengurus portfolio global mengalih semula pelaburan portfolio mereka ke dalam aset selamat (*safe haven*) yang mempunyai kadar hasil yang lebih tinggi di AS. Faktor luaran lain yang turut menyebabkan sentimen pelabur global bertambah merosot adalah konflik ketenteraan di Ukraine yang berterusan serta keimbangan terhadap unjuran pertumbuhan ekonomi global yang lebih perlahan terutamanya ekonomi negara China susulan pelaksanaan semula sekatan yang ketat kerana peningkatan semula kes COVID-19.

Namun begitu, secara purata, kadar pertukaran ringgit berbanding mata wang rakan perdagangan Malaysia tidak terlalu terkesan. Kadar pertukaran efektif ringgit secara nominal (*nominal effective exchange rate*, NEER) telah meningkat sebanyak 0.4% bagi tempoh Januari sehingga Julai tahun ini. Dalam tempoh yang sama, ringgit telah meningkat berbanding dengan yen Jepun (+13.4%), paun sterling (+7.1%), won Korea (+4.3%), baht Thailand (+3.1%) dan dolar Australia (+1.0%). Sementara itu, nilai ringgit menyusut berbanding dengan dolar Singapura (-2.5%) dan rupiah Indonesia (-1.3%).

Tuan Yang di-Pertua,

Kadar pertukaran ringgit yang fleksibel akan terus memainkan peranan yang penting sebagai penyerap kejutan luaran tanpa menjelaskan aktiviti ekonomi domestik meskipun sedang berdepan dengan keadaan pasaran kewangan dan kadar pertumbuhan ekonomi global yang tidak menentu.

Sebagai contoh, walaupun ringgit bukan pendorong utama kepada prestasi eksport, susut nilai ringgit pada tahun 2022 mempunyai kesan positif terhadap pendapatan eksport (melalui keuntungan kadar pertukaran). Adalah penting juga untuk diambil perhatian bahawa 42% daripada pendapatan pekerja di Malaysia adalah daripada sektor berorientasi eksport. Ringgit yang lebih rendah mendorong pengguna mengalih permintaan mereka kepada barang dan perkhidmatan yang dikeluarkan dalam negara, yang secara tidak langsung membantu menyokong aktiviti ekonomi tempatan. Namun begitu, harus ditekankan bahawa walaupun keadaan ini dapat membantu pengeksport dan pengeluar dalam jangka masa pendek, industri perlu bersaing berdasarkan kualiti produk yang baik serta produktiviti yang tinggi, bukan berdasarkan faktor nilai ringgit. Keutamaan hendaklah terus diberikan kepada usaha memperkuuh modal insan dan meningkatkan nilai tambah pada barang dan perkhidmatan keluaran Malaysia, bukannya memfokuskan kepada memanfaatkan nilai ringgit semata-mata.

Oleh yang demikian, walaupun pasaran kewangan global dijangka tidak menentu dalam tempoh mendatang, keadaan ini masih terkawal, disokong oleh prospek pemulihan ekonomi Malaysia yang baik dan eksport negara yang pelbagai. Harga komoditi semasa yang tinggi juga membantu mengurangkan tekanan penurunan nilai ringgit daripada faktor luaran lain.

Bagi menjawab pertanyaan berkenaan langkah-langkah Kerajaan untuk mengatasi kemerosotan nilai ringgit, Kerajaan menerusi Bank Negara Malaysia (BNM) akan terus menguruskan risiko-risiko yang wujud dalam pasaran pertukaran asing menerusi tiga (3) langkah-berikut:

- i. **Langkah Pertama: Menggunakan instrumen dasar operasi bagi memastikan keadaan yang teratur dalam pasaran pertukaran asing.**

Walaupun BNM tidak menyasarkan sebarang paras kadar pertukaran, BNM akan memastikan tiada perubahan secara drastik atau melampau dalam nilai ringgit. Tindakan ini akan

membantu perniagaan merancang dan melaksanakan keputusan dan pelaburan dengan lebih baik;

- ii. **Langkah Kedua: Memastikan institusi perbankan dan syarikat korporat di Malaysia mengambil langkah-langkah kehematan dalam menghadapi risiko pertukaran asing dan melindungi ringgit daripada aktiviti spekulatif.**

Langkah ini dapat mengurangkan risiko perubahan kadar ringgit yang berlebihan. Sebagai contoh, BNM memperkenalkan instrumen pelindung nilai seperti *dynamic hedging* bagi menyediakan fleksibiliti agar peserta pasaran kewangan dan sektor perniagaan boleh melaksanakan pengurusan risiko pendedahan mata wang asing dengan lebih baik; dan

- iii. **Langkah Ketiga: Melaksanakan beberapa inisiatif untuk meningkatkan akses dan menarik pelabur asing dalam pasaran bon domestik, termasuk usaha menambah baik mudah tunai bon pasaran sekunder serta memperkuuh struktur dan mudah tunai pasaran pertukaran asing.**

Inisiatif tersebut telah membantu mengekalkan Malaysia dalam senarai Indeks Bon Kerajaan Dunia (*World Government Bond Index*, WGBI) FTSE Russell.

Tuan Yang di-Pertua,

Berkaitan dengan dasar fiskal, Kerajaan akan memastikan dasar fiskal yang dirangka adalah berdasarkan matlamat utama untuk memastikan kemampanan kewangan awam, kestabilan makro-ekonomi dan kesejahteraan rakyat. Dasar fiskal mengembang yang dilaksanakan oleh Kerajaan membolehkan sokongan fiskal disediakan bagi menangani krisis COVID-19, menyokong ekonomi domestik, merangsang perbelanjaan pengguna, dan mewujudkan peluang pekerjaan. Kerajaan juga akan menumpukan usaha bagi menambah baik pengurusan kewangan awam melalui inisiatif pembaharuan fiskal seperti pengenalan Akta Tanggungjawab Fiskal (FRA), Strategi Hasil Jangka Sederhana (MTRS) dan semakan semula perbelanjaan awam bagi memastikan

kedudukan kewangan Kerajaan kekal kukuh serta menyokong pemulihan ekonomi.

Usaha-usaha tersebut dijangka mengukuhkan sentimen pelabur asing terhadap Malaysia menerusi pelaksanaan dasar-dasar Kerajaan yang berupaya meningkatkan daya tarikan Malaysia sebagai destinasi pelaburan yang menarik. Usaha ini diharapkan dapat meningkatkan kemasukan Pelaburan langsung asing (FDI) dan portfolio kepada Malaysia seterusnya menyumbang kepada pengukuhan ringgit.

Kementerian Kewangan juga telah mengeluarkan Pekeliling Perbendaharaan 3.1 pada 14 Julai 2022 mengenai langkah penjimatan untuk dilaksanakan di peringkat semua Kementerian dan agensi Kerajaan. Langkah ini adalah untuk mengenal pasti penjimatan perbelanjaan bagi menampung sebahagian daripada keperluan subsidi tambahan. Antara langkah kawalan perbelanjaan yang diperkenalkan termasuk kawalan ke atas lawatan ke luar dan perolehan barang import. Di samping itu, sebarang pelaburan yang melibatkan aliran wang ke luar negara perlu mendapat kelulusan Kementerian Kewangan terlebih dahulu.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN SIM CHEE KEONG
[BUKIT MERTAJAM]**

TARIKH : 26 JULAI 2022 (SELASA)

SOALAN

TUAN SIM CHEE KEONG [BUKIT MERTAJAM] minta **MENTERI KANAN PENDIDIKAN** menyatakan jumlah murid-murid yang berhenti sekolah pada sekolah rendah dan sekolah menengah mengikut pecahan gender, umur, kaum dan negeri, dan pecahan tahun bagi 2018 - 2021.

JAWAPAN

Tuan Yang di-Pertua,

Untuk makluman Ahli Yang Berhormat, jumlah keseluruhan murid yang berhenti sekolah bawah Kementerian Pendidikan Malaysia (KPM) untuk tahun 2018 adalah 49,385 orang iaitu 1.04 peratus dari jumlah keseluruhan murid dengan pecahan murid sekolah menengah 45,596 orang, murid sekolah rendah 3,789 orang, murid lelaki 30,541 orang dan murid perempuan 18,844 orang.

Bagi tahun 2019, jumlah keseluruhan murid berhenti sekolah bawah KPM adalah 45,083 orang iaitu 0.94 peratus dari jumlah keseluruhan murid dengan pecahan murid sekolah menengah 41,926 orang, murid sekolah rendah 3,157 orang, murid lelaki 27,712 orang dan murid perempuan 17,371 orang.

Jumlah murid berhenti sekolah bawah KPM pada tahun 2020 adalah 32,172 orang iaitu 0.67 peratus dari jumlah keseluruhan murid dengan pecahan murid sekolah menengah 29,798 orang, murid sekolah rendah 2,374 orang, murid lelaki 20,044 orang dan murid perempuan 12,128 orang.

Bagi tahun 2021 pula, jumlah keseluruhan murid berhenti sekolah KPM adalah 25,148 orang iaitu 0.52 peratus dari jumlah keseluruhan murid dengan pecahan murid sekolah menengah 23,338 orang, murid sekolah rendah 1,810 orang, murid lelaki 13,278 orang, dan murid perempuan 11,870 orang.

Jumlah murid yang berhenti sekolah mengikut negeri, umur dan kaum adalah seperti lampiran.

Untuk makluman Ahli Yang Berhormat, berdasarkan rekod dalam Sistem Aplikasi Pangkalan Data Murid (APDM), didapati trend murid berhenti sekolah dari tahun 2018 hingga 2021 adalah menurun. Ini menunjukkan keberkesanan pelbagai langkah dan program yang telah dilaksanakan oleh KPM bagi menangani isu murid berhenti sekolah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

DARIPADA : YB DR. KELVIN YII LEE WUEN [BANDAR KUCHING]

TARIKH : 26 JULAI 2022 (SELASA)

SOALAN:

minta **MENTERI PENGAJIAN TINGGI** menyatakan pendirian Kementerian untuk meminda AUKU untuk memberikan lebih banyak autonomi kepada persatuan-persatuan mahasiswa di setiap universiti termasuk universiti awam.

JAWAPAN

Tan Sri Yang Di-Pertua,

Dalam usaha memberdaya pelajar universiti awam (UA), pindaan Akta Universiti dan Kolej Universiti 1971 [Akta 30] atau AUKU telah dilaksanakan pada tahun 2012 dan 2019 bagi memberi lebih kebebasan kepada mahasiswa untuk bersuara dan memberi pendapat. Pindaan yang dilakukan pada tahun 2012 membolehkan mahasiswa menyertai kegiatan parti politik di luar kampus. Manakala pindaan pada tahun 2019 pula telah memberikan kebebasan kepada pelajar menyertai aktiviti parti politik di dalam kampus. Kedua-dua pindaan ini telah memberikan impak yang signifikan dalam memberi kebebasan serta menyediakan ruang untuk pelajar menyertai aktiviti parti politik.

Bagi mengenal pasti kaedah terbaik memperkasa pelajar terutamanya dalam hal pengurusan aktiviti pelajar dan pengurusan kewangan, sesi libat urus juga telah dilaksanakan dalam bulan Februari 2022 bersama Timbalan Naib Canselor (Hal Ehwal Pelajar), Penasihat Undang-Undang UA dan Bendahari UA. Pada Mac 2022 pula, satu sesi libat urus telah diadakan bersama Majlis Perwakilan Pelajar Kebangsaan (MPPK).

Selain itu, satu gerak kerja dalam membangunkan mekanisme umum berbentuk garis panduan juga telah dilaksanakan. Empat (4) buah jawatankuasa di peringkat Timbalan Naib Canselor (Hal Ehwal Pelajar dan Alumni) UA telah ditubuhkan pada Mac 2022 bagi melihat cadangan penambahbaikan oleh MPPK dan membangunkan garis panduan bersesuaian untuk digunakan oleh UA.

Garis panduan ini kini dalam peringkat pemurnian di peringkat Kementerian dan akan dibawa kepada pihak MPPK pada minggu pertama bulan Ogos 2022 bagi melihat kebolehlaksanaan sebelum ia diedarkan untuk pemakaian di setiap UA.

Kementerian sentiasa berusaha memastikan kepentingan, kebebasan dan autonomi pelajar dalam berpersatuan dan penglibatan dalam politik diimbangi dengan tadbir urus Universiti Awam yang diperkasa dalam membentuk ekosistem pengajian tinggi yang dinamik serta menyeluruh dari segi dasar dan tata kelola.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATO' NGEH KOO HAM [BERUAS]
TARIKH : 26 JULAI 2022 (SELASA)

SOALAN

DATO' NGEH KOO HAM [BERUAS] minta **MENTERI KEWANGAN** menyatakan sama ada terbitan wang ringgit Malaysia dan instrumen-instrumen kewangan lain yang diterbitkan oleh Bank Negara Malaysia perlu diberitahu kepada Federal Reserve Bank Amerika Syarikat. Nyatakan kaitan Bank Negara Malaysia dengan authoriti-authoriti kewangan negara lain berkenaan dengan kawalan wang ringgit Malaysia.

JAWAPAN

Tuan Yang di-Pertua,

Bank Negara Malaysia (BNM) merupakan pihak berkuasa tunggal yang mengeluarkan mata wang ringgit yang sah diperlakukan di Malaysia. Terbitan wang ringgit Malaysia dan instrumen-instrumen kewangan lain oleh BNM tidak perlu dirujuk atau diberitahu kepada Federal Reserve Bank Amerika Syarikat atau mana-mana autoriti kewangan negara lain.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN NIK NAZMI BIN NIK AHMAD
[SETIAWANGSA]**

TARIKH : 26 JULAI 2022 (SELASA)

SOALAN

TUAN NIK NAZMI BIN NIK AHMAD [SETIAWANGSA] minta **MENTERI KANAN PENDIDIKAN** menyatakan tentang jumlah masa setiap minggu yang diperuntukkan kepada setiap mata pelajaran di sekolah kebangsaan selaras Kurikulum Standard Sekolah Rendah dan Sekolah Menengah yang terkini.

JAWAPAN

Tuan Yang di-Pertua,

Di bawah Pelan Pembangunan Pendidikan Malaysia (PPPM) 2013-2025, Kementerian Pendidikan Malaysia (KPM) telah menetapkan peruntukan masa mata pelajaran berdasarkan jam setahun. Penetapan peruntukan masa bagi setiap mata pelajaran ini dilaksanakan bagi memberi peluang kepada pihak sekolah untuk membuat perancangan jadual pengajaran dan pembelajaran (PdP) yang lebih fleksibel.

Untuk makluman Ahli Yang Berhormat, KPM telah mengeluarkan Surat Pekeliling Ikhtisas Kementerian Pendidikan Malaysia berkaitan jumlah peruntukan masa setiap mata pelajaran bagi peringkat sekolah rendah dan menengah. Bagi peringkat sekolah rendah, KPM telah mengeluarkan Surat Pekeliling Ikhtisas Kementerian Pendidikan Malaysia Bilangan 8 Tahun 2016: Pelaksanaan Kurikulum Standard Sekolah Rendah (Semakan 2017) Secara Berperingkat-Peringkat Mulai Tahun 2017 bertarikh 2 November 2016. Manakala bagi peringkat sekolah menengah, peruntukan masa boleh dirujuk kepada Surat Pekeliling Ikhtisas Kementerian Pendidikan Malaysia Bilangan 9 Tahun 2016: Pelaksanaan Kurikulum Standard Sekolah Menengah Secara Berperingkat-Peringkat Mulai Tahun 2017 bertarikh 2 November 2016.

Maklumat terperinci mengenai peruntukan masa bagi setiap mata pelajaran peringkat rendah dan menengah telah dimaklumkan kepada Ahli Yang Berhormat melalui jawapan kepada pertanyaan bukan lisan yang sama dikemukakan dalam Mesyuarat Pertama Penggal Kelima Parlimen Ke-14 yang lalu.

Sekian, terima kasih.

SOALAN NO : 92

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TENGKU ZULPURI BIN RAJA PUJI [RAUB]

TARIKH : 26 JULAI 2022 (SELASA)

SOALAN

TENGKU ZULPURI BIN RAJA PUJI [RAUB] minta **MENTERI PELANCONGAN, SENI DAN BUDAYA** menyatakan langkah-langkah oleh Kerajaan Pusat dalam mempergiatkan sub sektor pelancongan dan jumlah dana di peruntukkan dalam mempromosikan bandar Raub sebagai Bandar Musang King.

JAWAPAN

Tuan Yang di-Pertua,

1. Kementerian Pelancongan, Seni dan Budaya (MOTAC) melalui agensinya Tourism Malaysia sentiasa proaktif mempromosikan destinasi pelancongan dan meningkatkan sosio ekonomi negara. Bagi Daerah Raub, MOTAC telah menjalankan kerjasama dengan pelbagai pihak termasuk Kerajaan Negeri Pahang, Badan-badan bukan Kerajaan (NGO) dan sektor swasta bagi merancakkan industri pelancongan khususnya bagi segmen pelancongan domestik.
2. Usaha-usaha promosi telah dan akan terus dilaksanakan untuk mempromosikan Bandar Raub. Antaranya termasuklah:
 - (i) menghasilkan video dan bahan promosi terkini untuk dipaparkan di platform digital secara optimum. Bandar Raub yang sememangnya terkenal dengan penanaman dan pengeluaran durian Musang King antara lokasi yang menjadi pilihan Unit Sosial Media, Tourism Malaysia untuk penghasilan video yang akan digunakan untuk tujuan pemasaran dan promosi;
 - (ii) bekerjasama dengan Kerajaan Negeri khususnya Tourism Pahang dalam menjayakan siri *Familiarization Trip* (Fam Trip) ke produk dan destinasi pelancongan di Negeri Pahang termasuk di Raub. Tujuan Fam Trip ini diadakan adalah bagi mempromosikan dan menggalakkan pelancongan domestik ke lokasi-lokasi yang dilawati. Siri lawatan ini melibatkan seramai pengamal-pengamal media, agensi pelancongan dan Persatuan Pemandu Pelancong dari Kuala Lumpur dan Pahang;
 - (iii) program *Media/Blogger & Agent Treasure Hunt – East Coast Discovery*, turut memilih Raub sebagai salah satu destinasi persinggahan untuk pencarian ‘harta karun’ yang mempromosikan keunikan produk yang ada di Pantai Timur;

SOALAN NO : 92

- (iv) bekerjasama dengan pihak swasta seperti agensi pelancongan dan pengusaha pelancongan bagi pembangunan pakej minat khas atau *niche product* untuk diketengahkan dan dipromosikan; dan
 - (v) terus mempromosikan produk pelancongan di kawasan Raub bagi segmen agrotourism khususnya membabitkan durian Musang King yang terkenal dikalangan penggemar buah tersebut.
3. Dalam terus membantu sektor pelancongan di Raub, MOTAC telah menyalurkan peruntukan pembangunan dan penyelenggaraan di bawah Rancangan Malaysia ke 11 dan 12. Antaranya termasuklah:
- (i) memperuntukkan RM65,000 untuk membiayai dua (2) buah projek di dalam kawasan Parlimen Raub iaitu Menaiktaraf Dewan Homestay Kampung Peruas dan Membina Balai Ketibaan Pelancong Homestay Sungai Pasu;
 - (ii) memperuntukkan RM1.3 juta bagi melaksanakan tiga (3) buah projek di daerah Raub iaitu Pembangunan Ecotourism Rafflesia di Taman Eko-Rimba Lata Jarum, Menaiktaraf Infrastruktur di Pusat Rekreasi Pulau Chekas dan Menaiktaraf Infrastruktur di Pusat Rekreasi Jeram Bangkin; dan
 - (iii) sejumlah RM400,000 diperuntukkan bagi melaksana enam (6) buah projek penyelenggaraan baharu di Negeri Pahang, dengan salah satunya adalah Menaiktaraf Infrastruktur di Pusat Rekreasi Batu Malim, Raub.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN WONG KAH WHO [IPOH TIMUR]
TARIKH : 26 JULAI 2022 (SELASA)

SOALAN

TUAN WONG KAH WOH [IPOH TIMUR] minta **MENTERI KEWANGAN** menyatakan kerugian keseluruhan Kerajaan dalam pelaksanaan projek SSER. Berapa wang yang telah dibayar berbanding dengan jumlah kemajuan kerja. Sama ada Kerajaan ada mengambil tindakan undang-undang terhadap syarikat yang terbabit.

JAWAPAN

Tuan Yang di-Pertua,

Untuk makluman Ahli Yang Berhormat, anggaran jumlah wang yang telah dibayar kepada China Petroleum Pipeline Bureau (CPPB) adalah sebanyak RM8.25 bilion berbanding kemajuan sebenar projek sebanyak 14.47% bagi Projek *Multi Product Pipeline* (MPP) dan 11.36% bagi Projek *Trans-Sabah Gas Pipeline* (TSGP). Sekiranya Kerajaan berhasrat untuk meneruskan pembatalan projek, Kerajaan perlu membayar pampasan penamatan kepada semua pihak yang terlibat sebagai kos tambahan kepada pembayaran yang telah dibuat. Oleh itu, keputusan Kerajaan untuk menyambung semula projek TSGP adalah bagi membolehkan Kerajaan memperolehi semula nilai projek yang sebelum ini telah dibayar kepada pihak kontraktor.

Bagi tujuan tersebut, Kerajaan Malaysia pada masa ini sedang dalam proses rundingan semula dengan Kerajaan Republik Rakyat China (RRC) berhubung cadangan penerusan projek TSGP dan kajian semula projek MPP bagi menentukan hala tuju yang jelas bagi projek ini. Notis Penggantungan Kerja dan Perkhidmatan telah dikeluarkan pada 3 Julai 2018 sehingga proses rundingan ini dapat dimuktamadkan

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN MUHAMMAD BAKHTIAR BIN WAN CHIK
[BALIK PULAU]**

TARIKH : 26 JULAI 2022 (SELASA)

SOALAN

TUAN MUHAMMAD BAKHTIAR BIN WAN CHIK [BALIK PULAU] minta **MENTERI PELANCONGAN, SENI DAN BUDAYA** menyatakan pelan Kementerian menangani isu kos bahan mentah yang tinggi yang terpaksa ditanggung oleh pengusaha industri batik.

JAWAPAN

Tuan Yang di-Pertua,

1. Kementerian Pelancongan, Seni dan Budaya (MOTAC) melalui Perbadanan Kemajuan Kraftangan Malaysia (Kraftangan Malaysia) sentiasa berusaha membangun dan memperkasakan industri kraf batik tempatan agar mapan dan berdaya saing. Industri batik di Malaysia terus menunjukkan perkembangan positif dengan peningkatan bilangan usahawan daripada 780 orang pada tahun 2021 kepada 804 orang pada tahun 2022. Manakala nilai jualan batik turut mencatatkan trend peningkatan, dengan RM40.4juta dijana untuk tempoh 6 bulan pertama tahun 2022, berbanding RM52.1juta untuk keseluruhan tahun 2021.

2. Sungguhpun begitu, pelbagai isu dan cabaran dihadapi dalam membangunkan industri batik di Malaysia, termasuklah dalam menangani kos bahan mentah pembuatan batik yang semakin meningkat. Kraftangan Malaysia telah melaksanakan aktiviti Kajian Bahan Penggantian kepada Penghasilan Produk Kraf bagi memastikan

SOALAN NO : 95

industri kraf batik terus lestari dan bahan mentah sentiasa mencukupi serta mampu mengatasi kos bahan mentah yang tinggi. Penggunaan bahan semula jadi tempatan mampu mengurangkan kebergantungan kepada bahan dari luar negara serta mampu mengurangkan kos pengeluaran yang memberi manfaat kepada usahawan dan komuniti kraf. Inovasi yang dibangunkan ini membantu dalam menangani kos bahan mentah yang semakin meningkat. Kajian yang dijalankan ini juga bersifat mesra alam serta selamat digunakan.

3. Selain itu, dalam usaha untuk memperkenalkan bahan alternatif daripada sumber tempatan, kajian bahan halangan warna daripada bahan linut dan *clay* sebagai gantian kepada bahan lilin bagi proses menghasilkan reka corak batik turut telah dijalankan. Kraftangan Malaysia juga telah melaksanakan kajian bahan dan teknik cetakan kreatif (*eco print*) yang tidak menggunakan sebarang bahan halangan lilin bagi mengurangkan kebergantungan terhadap bahan mentah yang semakin meningkat. Hasil kajian ini telah dikongsi bersama usahawan dalam pengeluaran produk dan dipasarkan semasa promosi-promosi anjuran Kraftangan Malaysia seperti Hari Kraf Kebangsaan, Festival Kraf Malaysia dan promosi di pusat beli-belah.
4. MOTAC serta Kraftangan Malaysia sentiasa berusaha memperkasakan usahawan kraf batik termasuk penerokaan produk-produk kraf yang lain bagi memastikan industri kraf terus kekal lestari dan mampu bertahan dalam mendepani pelbagai cabaran.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN SYED IBRAHIM BIN SYED NOH
[LEDANG]
TARIKH : 26 JULAI 2022 (SELASA)

SOALAN

TUAN SYED IBRAHIM BIN SYED NOH [LEDANG] minta **MENTERI KEWANGAN** menyatakan :-

- (a) perincian perbelanjaan infrastruktur kemudahan di lokasi-lokasi pengangkutan awam di bawah seliaan Prasarana Malaysia Berhad sepanjang suku pertama 2022; dan
- (b)unjuran perbelanjaan yang akan digunakan bagi memenuhi keperluan membaiki dan memperkasa infrastruktur di lokasi pengangkutan awam berkenaan.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan melalui syarikat Prasarana Malaysia Bhd sentiasa mengutamakan kemudahan dan keselesaan pengguna pengangkutan awam khususnya perkhidmatan tren dan bas dengan menaik taraf dan menambah baik kemudahan infrastruktur sedia ada. Bagi suku pertama tahun 2022, Kumpulan Prasarana telah membelanjakan sejumlah RM8.884 juta bagi menaik taraf infrastruktur kemudahan pengangkutan awam tersebut. Daripada jumlah ini, sebanyak RM8.5 juta adalah di bawah anak syarikat Prasarana iaitu Rapid Rail Sdn Bhd bagi perbelanjaan melibatkan kos pembelian alat ganti, membaik pulih dan menyelenggara eskalator, lif, infrastruktur, bangunan dan lain-lain. Manakala, selebihnya sebanyak RM384 ribu telah dibelanjakan oleh anak syarikatnya iaitu Rapid Bus Sdn Bhd bagi menaik taraf lif dan eskalator di sepanjang laluan BRT Sunway. Penyelenggaraan bagi hentian bas pula adalah di bawah had selenggara Pihak Berkuasa Tempatan (PBT).

Tuan Yang di-Pertua,

Kumpulan Prasarana telah memperuntukkan sebanyak RM40 juta pada tahun 2022 bagi membaiki dan memperkasa insfrastruktur kemudahan berkaitan iaitu RM38 juta di bawah kendalian Rapid Rail Sdn Bhd dan RM2 juta di bawah kendalian Rapid Bus Sdn Bhd. Unjuran perbelanjaan ini juga adalah termasuk alat ganti eskalator yang bakal diterima dan kerja-kerja baik pulih yang akan siap sepenuhnya pada akhir tahun 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DR.SHAHRUDDIN BIN MD SALLEH
[SRI GADING]
TARIKH : 26 JULAI 2022 (SELASA)

SOALAN

DR.SHAHRUDDIN BIN MD SALLEH [SRI GADING] minta **MENTERI KEWANGAN** menyatakan kos semasa subsidi petroleum dan pecahan penerima subsidi itu mengikut kategori pendapatan.

JAWAPAN

Tuan Yang di-Pertua,

Kerajaan komited untuk mengelakkan kenaikan harga barang asas yang mendadak dan melindungi rakyat daripada impak penuh peningkatan harga komoditi global. Dengan itu, Kerajaan telah bukan sahaja meneruskan subsidi barang asas tetapi telah juga menanggung subsidi yang jauh lebih besar pada tahun 2022 terutamanya berkaitan produk petroleum berikutan kenaikan harga minyak mentah mencecah USD100 setong.

Rakyat kini membayar kurang daripada setengah kos sebenar petrol, diesel, dan LPG. Kerajaan telah mengekalkan harga pam RON95 pada RM2.05 seliter dan diesel pada RM2.15 seliter sementara harga purata tanpa subsidi pada bulan Jun 2022 telah mencapai RM4.70 seliter bagi RON95 dan RM5.40 seliter bagi diesel.

Semua golongan masyarakat B40, M40 dan T20 menikmati subsidi petrol tersebut. Dianggarkan berdasarkan survei perbelanjaan isi rumah 2019 oleh Jabatan Perangkaan Malaysia (DOSM), purata perbelanjaan RON95 oleh:

- Isirumah B40 : RM165 sebulan
- Isirumah M40: RM350 sebulan
- Isirumah T20: RM480 sebulan

Secara purata, satu isirumah T20 menggunakan hampir 3 kali ganda satu isirumah B40 dan dengan itu, menikmati manfaat subsidi hampir 3 kali ganda.

Berdasarkan bilangan isirumah, pecahan penggunaan RON95 oleh golongan B40 adalah 22%, M40 adalah 46% dan T20 adalah 32%. Justeru, subsidi RON95 yang melebihi RM20 bilion akan memanfaatkan T20 lebih RM7 bilion sementara B40 hampir RM5 bilion.

Jumlah subsidi RON95 yang dinikmati oleh T20 adalah hampir sama dengan peruntukan bantuan tunai RM8 bilion melalui Bantuan Keluarga Malaysia (BKM). Sebagai perbandingan, jumlah RM7 bilion boleh digunakan untuk membina 14 buah hospital dengan kapasiti 300 katil bagi setiap hospital, atau 140 buah sekolah dengan 30 bilik darjah bagi setiap sekolah.

Tanpa ketirisan subsidi RON95 kepada golongan T20, penjimatan tersebut dapat disalurkan sebagai bantuan kepada golongan berpendapatan rendah melalui pembayaran seperti BKM atau bantuan tunai lain yang bakal digandakan. Selain golongan T20, subsidi petrol dan minyak juga telah memanfaatkan golongan bukan warganegara, di samping menyebabkan berlakunya ketirisan melalui penyeludupan barang bersubsidi ke negara jiran.

Pemberian dan pengagihan subsidi secara lebih bersasar merupakan antara matlamat Kerajaan untuk membantu golongan yang benar-benar memerlukan serta mengurangkan ketirisan yang berlaku. Kerajaan juga sedang mengkaji semula mekanisme subsidi petrol, diesel, LPG supaya dapat dilaksanakan dengan lebih bersasar dan menumpukan bantuan dan subsidi kepada golongan rentan dan mereka yang benar-benar memerlukan bantuan. Pelaksanaan subsidi secara bersasar dijangka dapat mengoptimumkan sumber kewangan Kerajaan dan penjimatan yang dicapai dapat diagihkan semula untuk program yang lebih berkesan menyumbang kepada kesejahteraan rakyat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : DATUK SERI PANGLIMA BUNG MOKTAR BIN RADIN [KINABATANGAN]

TARIKH : 26 JULAI 2022 (SELASA)

SOALAN

DATUK SERI PANGLIMA BUNG MOKTAR BIN RADIN [KINABATANGAN] minta **MENTERI PELANCONGAN, SENI DAN BUDAYA** menyatakan apakah inisiatif yang sedang dan akan dibuat oleh kerajaan dalam membantu pengusaha-pengusaha pelancongan yang terjejas akibat pandemik COVID-19 agar perniagaan mereka dapat dipulihkan.

JAWAPAN

Tuan Yang di-Pertua,

1. Kementerian Pelancongan, Seni dan Budaya (MOTAC) telah melancarkan Rangka Kerja Pemulihan Pelancongan 2.0 atau TRF 2.0 pada 21 Jun 2022. TRF 2.0 ini menggariskan rangka kerja atau inisiatif jangka pendek dan sederhana MOTAC untuk memperkuatkan pemulihan dan mengembalikan daya saing industri pelancongan menerusi strategi-strategi yang boleh meningkatkan kemampuan dan daya tahan industri dalam menghadapi ketidaktentuan masa depan.
2. Antara insentif dan inisiatif utama yang disediakan dalam menggalakkan lagi perkembangan industri pelancongan adalah:
 - (i) menyokong pemulihan perniagaan pelancongan dan kebudayaan melalui bantuan fiskal dan bukan fiskal demi meringankan beban penggiat industri dan seterusnya membolehkan mereka beroperasi secara optimum. Antaranya:
 - (a) MOTAC telah menyalurkan sejumlah RM53.67 juta bantuan kewangan kepada lebih 18,000 pengusaha pelancongan;
 - (b) menawarkan baucar untuk aktiviti berkaitan pelancongan kepada Keluarga Malaysia. Sehingga Jun 2022, sebanyak RM5.95 juta nilai baucar telah ditebus bagi pembelian produk kraf, seni visual, dan buku. Manakala sebanyak RM4.43 juta nilai baucar telah ditawarkan bagi pakej pelancongan, minat khas dan pengangkutan darat;
 - (c) telah menyalurkan RM3.73 juta bagi lebih 520 permohonan yang telah diluluskan di bawah Geran Padanan Bagi Tujuan Pembaikan Hotel Bajet dan Inap Desa (*Homestay*) bagi membantu membaik pulih hotel bajet dan inap desa supaya kemudahan yang ditawarkan sentiasa berada di tahap yang berkualiti;

SOALAN NO : 100

- (d) meluluskan peruntukan sebanyak RM23.29 juta bagi lebih 130 permohonan di bawah Geran Sepadan Sektor Pelancongan dan Kebudayaan bagi pengajuran program/acara/aktiviti berkaitan pelancongan, seni dan budaya; dan
 - (e) melanjutkan tempoh kelonggaran hal-hal berkaitan fi lesen, kompaun dan syarat lesen kepada agensi-agensi pelancongan dan pemandu-pemandu pelancong sehingga 31 Disember 2022.
- (ii) menyediakan insentif pembiayaan seperti Skim Infrastruktur Skim Infrastruktur Pelancongan (SIP) dan Pembiayaan Pelancongan PENJANA serta insentif Galakan Cukai dan Pendaftaran Projek Pelancongan; dan
- (iii) meningkatkan kualiti perkhidmatan (*service quality*) menerusi:
- (a) penyediaan kursus dan latihan yang menjadi pra-syarat kepada pengusaha-pengusaha pelancongan untuk mendapatkan lesen dengan MOTAC; dan
 - (b) pelaksanaan kursus-kursus peningkatan kemahiran (*upskilling*) dan pemahiran semula (*reskilling*) kepada pemain industri pelancongan seperti *Kursus City Guide*, *Kursus Regional Specific Tourist Guide (RSTG)*, *Kursus Travel and Tours Enhancement Course (TTEC)*, *Kursus Pemantapan dan Pengendalian Umrah (KPPU)*, *Kursus Mesra Malaysia* serta *Kursus Continuing Tourism Related Education (CTRE)*.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL YANG KELIMA
PARLIMEN KEEMPAT BELAS, TAHUN 2022**

PERTANYAAN : LISAN

**DARIPADA : PUAN NURUL IZZAH BINTI ANUAR
(PERMATANG PAUH)**

TARIKH : 26 JULAI 2022 (SELASA)

SOALAN

PUAN NURUL IZZAH BINTI ANUAR (PERMATANG PAUH) minta MENTERI PEMBANGUNAN WANITA, KELUARGA DAN MASYARAKAT menyatakan ketersediaan Kerajaan untuk mewujudkan Skim Manfaat Kanak-Kanak Sejagat seperti yang disarankan oleh KRI, memandangkan data HIS 2019 menunjukkan kadar kemiskinan yang lebih tinggi dalam kalangan isi rumah yang mempunyai anak, hampir 9% berbanding 2% untuk isi rumah tiada anak.

JAWAPAN

Tuan Yang di-Pertua,

Kerajaan mengambil maklum cadangan yang disarankan oleh *Khazanah Research Institute* (KRI) untuk mewujudkan Skim Manfaat Kanak-Kanak Sejagat (*Universal Child Benefit*) iaitu pemberian wang tunai tanpa syarat sebanyak RM100 atau RM150 sebulan kepada semua kanak-kanak, sehingga mereka mencapai umur 18 tahun.

Mengikut Jabatan Perangkaan Malaysia, dianggarkan jumlah keseluruhan kanak-kanak di Malaysia adalah seramai 9,127,300 orang pada tahun 2021. Dalam hal ini, untuk Kerajaan melaksanakan Skim Manfaat Kanak-Kanak Sejagat kepada semua kanak-kanak di Malaysia pada setiap tahun, ia akan melibatkan implikasi kewangan yang agak tinggi. Maka, pewujudan Skim Manfaat Kanak-kanak Sejagat memerlukan penelitian yang rapi bagi melihat kesesuaian dengan keadaan fiskal Kerajaan.

Pada masa ini, beberapa strategi telah dirangka bagi meningkatkan keberkesanan perlindungan sosial dan bantuan sara hidup kepada golongan isi rumah B40. Cadangan penyediaan skim perlindungan sosial *Child Grant* untuk kanak-kanak B40 di bawah umur 5 tahun telah diambil kira sebagai salah satu tindakan atau program bagi membasmi kemiskinan di bawah Pelan Strategi Kebangsaan bagi Menangani Punca Perkahwinan Bawah Umur yang diterajui oleh Unit Penyelaras Pelaksanaan, Jabatan Perdana Menteri (ICU, JPM) bagi memastikan kanak-kanak di bawah 5 tahun dalam kategori B40 mendapat sumber untuk perkembangan dalam aspek fizikal dan pendidikan.

Selain daripada itu, ICU JPM merupakan *custodian* kepada sistem eKasih yang merupakan pangkalan data kemiskinan nasional bagi mendaftarkan golongan miskin di Malaysia berdasarkan Pendapatan Garis Kemiskinan (PGK) semasa. Bagi membantu Kerajaan merangka program yang bersesuaian, data eKasih boleh dijadikan sebagai rujukan. Sehingga 30 Jun 2022, rekod dalam Sistem eKasih menunjukkan bilangan yang berumur di bawah 18 tahun adalah seramai 610,485 kanak-kanak.

Tuan Yang di-Pertua,

SOALAN NO. 101

Kanak-kanak yang tidak berasib baik akan dibantu untuk terus hidup dengan keluarga mereka dan mendapat kasih sayang, perhatian dan penjagaan yang baik dari keluarga induk. Skim Bantuan Kanak-kanak (BKK) akan diberikan berdasarkan saringan dan syarat-syarat tertentu (*means tests*) yang ditetapkan oleh Kerajaan dan bersasar bagi memastikan bantuan disampaikan kepada golongan yang benar-benar memerlukan dan menggalakkan masyarakat untuk tidak bergantung pada bantuan semata-mata dan berusaha untuk meningkatkan taraf hidup. Kaedah ini bukan sahaja kurang membebankan Kerajaan malah membantu Kerajaan lebih fokus kepada kanak-kanak yang memerlukan.

Atas keprihatinan Kerajaan untuk memastikan kanak-kanak dalam keluarga di bawah PGK mendapat perlindungan keselamatan sosial yang sewajarnya, Kerajaan telah melaksanakan skim Bantuan Kanak-kanak (BKK). Kerajaan semasa pengumuman Belanjawan Negara 2021 telah menaikkan kadar bantuan bulanan di bawah skim BKK. Bagi kanak-kanak berusia bawah 7 tahun, layak menerima RM200 seorang manakala bagi kanak-kanak berusia 7 tahun ke atas akan memperolehi bantuan sebanyak RM150 bagi seorang kanak-kanak. Untuk pertama kalinya juga kadar bantuan maksimum kanak-kanak dinaikkan daripada RM450 sekeluarga kepada RM1,000.00 sekeluarga sebagai usaha untuk meningkatkan kesejahteraan hidup rakyat.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DR. AZMAN BIN ISMAIL [KUALA KEDAH]
TARIKH : 26 JULAI 2022 (SELASA)

SOALAN

DR. AZMAN BIN ISMAIL [KUALA KEDAH] minta **MENTERI KEWANGAN** menyatakan sebab-sebab kemerosotan nilai Ringgit yang berlaku sekarang. Mohon dinyatakan langkah-langkah Kerajaan untuk mengatasi kemerosotan teruk nilai Ringgit ini.

JAWAPAN

Tuan Yang di-Pertua,

Penyusutan nilai ringgit pada tahun 2022 berbanding dolar Amerika Syarikat (AS) bukanlah unik kepada negara Malaysia sahaja, malah trend penyusutan ini turut dialami oleh mata wang utama dan serantau yang lain. Keadaan ini turut mencerminkan pengukuhan dolar AS.

Sehingga 15 Julai 2022, nilai ringgit telah menurun sebanyak -6.4% berbanding dolar Amerika Syarikat (AS). Jika dilihat dari segi peratusan penurunan, penurunan nilai ringgit adalah lebih sederhana berbanding penyusutan mata wang utama dan beberapa negara serantau yang lain. Perkara ini dapat dilihat bagi tempoh Januari sehingga Julai 2022 iaitu nilai matawang utama seperti euro telah menurun sebanyak -11.3% dan yen Jepun menurun sebanyak -17.0%. Di samping itu, nilai mata wang serantau yang lain termasuk rupiah Indonesia (-4.9%), peso Filipina (-9.6%), dolar Singapura (-3.7%), Won Korea (-10.3%), dan baht Thailand (-9.3%) turut menyusut dengan kadar di antara -3.7% hingga -10.3% berbanding dolar AS.

Kelemahan mata wang utama dan serantau ini kebanyakannya disebabkan oleh faktor luaran, terutamanya peningkatan nilai dolar AS didorong oleh kenaikan kadar faedah AS yang pantas bagi membendung inflasi yang tinggi di AS. Menurut unjuran penganalisis ekonomi dan kewangan, *Federal Reserve* AS dijangka meningkatkan kadar faedah sebanyak 325 mata asas bagi keseluruhan tahun 2022 ke tahap 3.50%. Hal ini menyebabkan pengurus portfolio global mengalih semula pelaburan portfolio mereka ke dalam aset selamat (*safe haven*) yang mempunyai kadar hasil yang lebih tinggi di AS. Faktor luaran lain yang turut menyebabkan sentimen pelabur global bertambah merosot adalah konflik ketenteraan di Ukraine yang berterusan serta keimbangan terhadap unjuran pertumbuhan ekonomi global yang lebih perlahan terutamanya ekonomi negara China susulan pelaksanaan semula sekatan yang ketat kerana peningkatan semula kes COVID-19.

Namun begitu, secara purata, kadar pertukaran ringgit berbanding mata wang rakan perdagangan Malaysia tidak terlalu terkesan. Kadar pertukaran efektif ringgit secara nominal (*nominal effective exchange rate*, NEER) telah meningkat sebanyak 0.4% bagi tempoh Januari sehingga Julai tahun ini. Dalam tempoh yang sama, ringgit telah meningkat berbanding dengan yen Jepun (+13.4%), paun sterling (+7.1%), won Korea (+4.3%), baht Thailand (+3.1%) dan dolar Australia (+1.0%). Sementara itu, nilai ringgit menyusut berbanding dengan dolar Singapura (-2.5%) dan rupiah Indonesia (-1.3%).

Tuan Yang di-Pertua,

Kadar pertukaran ringgit yang fleksibel akan terus memainkan peranan yang penting sebagai penyerap kejutan luaran tanpa menjelaskan aktiviti ekonomi domestik meskipun sedang berdepan dengan keadaan pasaran kewangan dan kadar pertumbuhan ekonomi global yang tidak menentu.

Sebagai contoh, walaupun ringgit bukan pendorong utama kepada prestasi eksport, susut nilai ringgit pada tahun 2022 mempunyai kesan positif terhadap pendapatan eksport (melalui keuntungan kadar pertukaran). Adalah penting juga untuk diambil perhatian bahawa 42% daripada pendapatan pekerja di Malaysia adalah daripada sektor berorientasi eksport. Ringgit yang lebih rendah mendorong pengguna mengalih permintaan mereka kepada barang dan perkhidmatan yang dikeluarkan dalam negara, yang secara tidak langsung membantu menyokong aktiviti ekonomi tempatan. Namun begitu, harus ditekankan bahawa walaupun keadaan ini dapat membantu pengeksport dan pengeluar dalam jangka masa pendek, industri perlu bersaing berdasarkan kualiti produk yang baik serta produktiviti yang tinggi, bukan berdasarkan faktor nilai ringgit. Keutamaan hendaklah terus diberikan kepada usaha memperkuuh modal insan dan meningkatkan nilai tambah pada barang dan perkhidmatan keluaran Malaysia, bukannya memfokuskan kepada memanfaatkan nilai ringgit semata-mata.

Oleh yang demikian, walaupun pasaran kewangan global dijangka tidak menentu dalam tempoh mendatang, keadaan ini masih terkawal,

disokong oleh prospek pemulihan ekonomi Malaysia yang baik dan eksport negara yang pelbagai. Harga komoditi semasa yang tinggi juga membantu mengurangkan tekanan penurunan nilai ringgit daripada faktor luaran lain.

Bagi menjawab pertanyaan berkenaan langkah-langkah Kerajaan untuk mengatasi kemerosotan nilai ringgit, Kerajaan menerusi Bank Negara Malaysia (BNM) akan terus menguruskan risiko-risiko yang wujud dalam pasaran pertukaran asing menerusi tiga (3) langkah berikut:

- i. **Langkah Pertama: Menggunakan instrumen dasar operasi bagi memastikan keadaan yang teratur dalam pasaran pertukaran asing.**

Walaupun BNM tidak menyasarkan sebarang paras kadar pertukaran, BNM akan memastikan tiada perubahan secara drastik atau melampau dalam nilai ringgit. Tindakan ini akan membantu perniagaan merancang dan melaksanakan keputusan dan pelaburan dengan lebih baik;

- ii. **Langkah Kedua: Memastikan institusi perbankan dan syarikat korporat di Malaysia mengambil langkah-langkah kehematan dalam menghadapi risiko pertukaran asing dan melindungi ringgit daripada aktiviti spekulatif.**

Langkah ini dapat mengurangkan risiko perubahan kadar ringgit yang berlebihan. Sebagai contoh, BNM memperkenalkan instrumen pelindung nilai seperti *dynamic hedging* bagi menyediakan fleksibiliti agar peserta pasaran kewangan dan sektor perniagaan boleh melaksanakan pengurusan risiko pendedahan mata wang asing dengan lebih baik; dan

- iii. **Langkah Ketiga: Melaksanakan beberapa inisiatif untuk meningkatkan akses dan menarik pelabur asing dalam pasaran bon domestik, termasuk usaha menambah baik mudah tunai bon pasaran sekunder serta memperkuuh struktur dan mudah tunai pasaran pertukaran asing.**

Inisiatif tersebut telah membantu mengekalkan Malaysia dalam senarai Indeks Bon Kerajaan Dunia (*World Government Bond Index*, WGBI) FTSE Russell.

Kerajaan juga akan menggiatkan usaha untuk mengukuhkan sentimen pelabur asing terhadap Malaysia menerusi pelaksanaan dasar-dasar yang berupaya meningkatkan daya tarikan Malaysia sebagai destinasi pelaburan yang menarik. Usaha ini dijangka dapat meningkatkan kemasukan Pelaburan langsung asing (FDI) dan portfolio kepada Malaysia seterusnya berpotensi untuk mengukuhkan ringgit dengan cara yang mampan.

Kementerian Kewangan juga telah mengeluarkan Pekeliling Perbendaharaan 3.1 pada 14 Julai 2022 mengenai langkah penjimatan untuk dilaksanakan di peringkat semua Kementerian dan agensi Kerajaan. Langkah ini adalah untuk mengenal pasti penjimatan perbelanjaan bagi menampung sebahagian daripada keperluan subsidi tambahan. Antara langkah kawalan perbelanjaan yang diperkenalkan termasuk kawalan ke atas lawatan ke luar dan perolehan barang import. Di samping itu, sebarang pelaburan yang melibatkan aliran wang ke luar negara perlu mendapat kelulusan Kementerian Kewangan terlebih dahulu.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
**DARIPADA : DATUK SERI PANGLIMA HAJAH AZIZAH
BINTI DATUK SERI PANGLIMA HAJI
MOHD DUN [BEAUFORT]**
TARIKH : 26 JULAI 2022 (SELASA)

SOALAN

DATUK SERI PANGLIMA HAJAH AZIZAH BINTI DATUK SERI PANGLIMA HAJI MOHD DUN [BEAUFORT] minta **MENTERI KEWANGAN** menyatakan adakah Kerajaan bercadang untuk menaikkan kadar cukai ke atas produk tembakau.

JAWAPAN

Tuan Yang di-Pertua,

Produk yang dikategorikan sebagai *demerit goods* dengan izin, seperti rokok dan produk tembakau dikenakan cukai yang tinggi meliputi duti import, duti eksais dan cukai jualan. Pengenaan cukai yang tinggi adalah sebagai salah satu mekanisme kawalan harga bagi mengekang kebolehdapatan produk di pasaran terutamanya dalam kalangan remaja dan kanak-kanak, di samping untuk mengimbangi kesan-kesan negatif yang wujud daripada pengambilan dan penggunaan produk yang tidak digalakkan.

Kadar duti eksais bagi rokok telah dikaji semula pada tahun 2015 dengan ditukar daripada bentuk hibrid sebanyak 28 sen sebatang dan 20% ad valorem kepada kadar spesifik sebanyak 40 sen sebatang. Berdasarkan *SEATCA Tobacco Tax Index* yang dikeluarkan pada tahun 2021 oleh Southeast Asia Tobacco Control Alliance (SEATCA), kadar duti

eksais berbanding harga jualan rokok di Malaysia adalah antara yang tertinggi iaitu 58.6 peratus. Kadar duti eksais berbanding harga jualan di Thailand dan Singapura masing-masing adalah 78.6 peratus dan 67.5 peratus. Selain itu, dengan pelaksanaan GST mulai 1 September 2018, cukai jualan bagi produk rokok juga telah dikenakan pada kadar 10 peratus di mana ia adalah lebih tinggi berbanding cukai jualan pada kadar 5 peratus yang dikenakan semasa era SST.

Kerajaan akan terus menjalankan kajian dari semasa ke semasa berhubung kadar cukai rokok dan produk tembakau, selaras dengan amalan di peringkat antarabangsa untuk tidak menggalakkan penggunaan produk yang mendatangkan kemudarat kepada pengguna. Produk tersebut perlu dikenakan cukai yang tinggi bagi mengurangkan kebolehdapatan di pasaran. Namun sebarang kajian ke atas kenaikan kadar cukai rokok pada masa ini perlu turut mengambil kira kesan perubahan harga rokok terhadap isu penyeludupan rokok tidak sah di pasaran yang masih sukar ditangani sepenuhnya dan menyebabkan ketirisan hasil cukai negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN SIVAKUMAR VARATHARAJU
NAIDU [BATU GAJAH]
TARIKH : 26 JULAI 2022 (SELASA)

SOALAN

TUAN SIVAKUMAR VARATHARAJU NAIDU [BATU GAJAH] minta **MENTERI KEWANGAN** menyatakan sama ada Kerajaan berhasrat untuk mengembalikan semula Cukai Barang dan Perkhidmatan (GST). Jika ya, berapa peningkatan pendapatan yang dijangka hasil daripada pelaksanaan GST tersebut.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan masih mengkaji kesesuaian melaksanakan Cukai Barang dan Perkhidmatan (atau GST) dan model-model cukai kepenggunaan yang lain dengan mengambil kira semua aspek. Ini termasuklah kelemahan sistem cukai jualan dan cukai perkhidmatan sedia ada serta kelemahan sistem GST yang dilaksanakan pada tahun 2015. Kajian yang dijalankan turut meliputi kesan ke atas ekonomi, kos sara hidup, kesan cukai ke atas harga barang serta keupayaan menangani kegiatan ekonomi gelap. Cukai baharu tersebut, jika dilaksanakan, juga perlu bersifat mudah ditadbir dan tidak meningkatkan kos perniagaan di samping dapat mengukuhkan kedudukan fiskal negara.

Dalam menetapkan kadar GST yang bersesuaian, Kerajaan perlu menyeimbangkan di antara keperluan untuk tidak terlalu membebangkan rakyat, dengan keperluan Kerajaan untuk mempunyai ruang fiskal yang

memadai bagi memastikan kedudukan ekonomi negara terus stabil. Contohnya, Kerajaan perlu mengambil kira kadar inflasi semasa yang menggambarkan kenaikan harga barang pengguna secara umum yang menyumbang kepada cabaran kos sara hidup rakyat. Namun, dalam masa yang sama, peningkatan harga minyak di pasaran dunia dan nilai matawang negara yang tidak menentu telah menyebabkan tanggungan perbelanjaan negara kian meningkat untuk memastikan bantuan yang bersesuaian dapat terus diberikan kepada rakyat. Kesemua faktor ini perlu diambil kira sebelum kadar yang sesuai bagi pelaksanaan GST dapat ditetapkan.

Sepertimana Ahli Yang Berhormat sedia maklum, ekonomi negara sedang dalam fasa pemulihan. Kerajaan memahami bahawa pengenalan sebarang bentuk cukai baharu dalam keadaan ekonomi sedemikian bukan sahaja akan membebankan rakyat, malah berisiko untuk merencatkan momentum pemulihan ekonomi yang sedang berlangsung. Untuk itu, pelaksanaan sebarang bentuk cukai kepenggunaan perlu mengambil kira senario semasa. Di samping itu, ia juga memberi ruang bagi persiapan dan persediaan yang rapi di kedua-dua pihak Kerajaan dan pembayar cukai.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL YANG KELIMA
PARLIMEN KEEMPAT BELAS, TAHUN 2022**

PERTANYAAN : LISAN

**DARIPADA : YB KASTHURIRAANI A/P PATTO
(BATU KAWAN)**

TARIKH : 26 JULAI 2022

SOALAN

PUAN KHASTURIRAANI A/P PATTO (BATU KAWAN) minta **MENTERI PEMBANGUNAN WANITA, KELUARGA DAN MASYARAKAT** menyatakan bilangan kanak-kanak (di bawah umur 18 tahun) yang telah berkahwin dari tahun 2018 sehingga kini mengikut pecahan umur pengantin lelaki dan perempuan, bilangan pendaftaran di mahkamah sivil dan syariah dan Mahkamah Anak Negeri Sarawak dan “native courts” di Sabah dan pecahan negeri serta nyatakan mengapa masih wujud tentangan dari sistem dalaman Kerajaan untuk melaksanakan Pelan Strategi Kebangsaan Bagi Menangani Punca Perkahwinan Bawah Umur walaupun Malaysia telah meratifikasi Konvensyen Hak Kanak-Kanak serta kewujudan undang-undang jenayah “*statutory rape*” bagi mangsa di bawah 16 tahun dan adakah Kerajaan akan berusaha untuk mengharamkan perkahwinan bawah umur. Jika ya, nyatakan bagaimana dan jika tidak, mengapa.

JAWAPAN

Tuan Yang di-Pertua,

Jabatan Perangkaan Malaysia, telah merekodkan pada tahun 2020 bahawa bilangan perkahwinan bawah umur 18 tahun adalah sebanyak 1,124 orang. Angka ini menunjukkan penurunan sebanyak 39.4 peratus jika dibandingkan dengan 1,856 orang pada tahun 2018. Berdasarkan

keseluruhan bilangan perkahwinan ini, bilangan tertinggi perkahwinan adalah pada kumpulan umur 15 hingga 17 tahun bagi kedua-dua jantina lelaki dan perempuan.

Pada tahun 2018, bilangan kanak-kanak Islam yang direkodkan telah berkahwin adalah 1,542 orang. Daripada keseluruhan jumlah ini, sebanyak 170 orang adalah lelaki dan 1,372 orang perempuan. Manakala bagi kanak-kanak bukan Islam pula, bilangan perkahwinan yang telah direkodkan adalah sebanyak 314 orang, iaitu dengan pecahan sebanyak 21 orang lelaki dan 293 orang perempuan.

Negeri yang mencatatkan bilangan tertinggi perkahwinan kanak-kanak Islam adalah Sabah iaitu sebanyak 334 orang. Ini diikuti oleh Pahang dengan 177 orang dan seterusnya Johor sebanyak 167 orang.

Manakala, negeri yang telah mencatatkan bilangan tertinggi bagi perkahwinan kanak-kanak bukan Islam ialah Pahang iaitu sebanyak 102 orang, diikuti oleh Sarawak sebanyak 55 orang, seterusnya Johor dan Perak masing-masing sebanyak 35 orang.

Bagi tahun 2020 pula, bilangan kanak-kanak Islam yang direkodkan telah berkahwin adalah sebanyak 1,038 orang. Daripada keseluruhan jumlah ini, sebanyak 105 orang adalah lelaki dan 933 orang perempuan. Manakala bagi kanak-kanak bukan Islam, bilangan perkahwinan yang telah direkodkan adalah sebanyak 86 orang, dengan pecahan seorang lelaki dan 85 orang perempuan.

Negeri yang mencatatkan bilangan tertinggi bagi perkahwinan kanak-kanak Islam ialah Sabah iaitu sebanyak 190 orang, diikuti oleh Pahang sebanyak 160 orang, dan seterusnya Perak dengan 143 orang.

Manakala, negeri-negeri yang mencatatkan bilangan tertinggi bagi perkahwinan kanak-kanak bukan Islam pula ialah Sarawak sebanyak 19 orang, diikuti oleh Johor sebanyak 16 orang dan seterusnya Selangor sebanyak 12 orang.

Tuan Yang Di-Pertua,

KPWKM sentiasa komited dalam melaksana dan memantau pelaksanaan program dan tindakan di bawah Pelan Strategi Kebangsaan Bagi Menangani Punca Perkahwinan Bawah Umur (Pelan).

Namun, pelaksanaan pelan memerlukan pendekatan secara holistik bukan sahaja melalui perubahan perundangan, tetapi melalui pendidikan, advokasi, kesihatan, pengukuhan institusi keluarga dan juga sokongan sosioekonomi masyarakat. Ini termasuklah juga program yang bertujuan untuk meningkatkan kesedaran serta mengubah stigma dan norma sosial masyarakat.

Memandangkan Malaysia adalah terdiri daripada masyarakat yang berbilang kaum dan mempunyai adat, budaya dan agama yang berlainan, maka perundingan dan sesi libat urus bersama pakar kanak-kanak, pakar budaya dan syari'e juga hendaklah dilaksanakan secara berterusan dan berperingkat bagi memastikan supaya pandangan daripada semua pihak dapat diambil kira dalam penetapan had minimum umur perkahwinan kepada 18 tahun.

Bukan itu sahaja, hal ehwal perundangan berhubung perkahwinan bagi orang Islam, termasuk kanak-kanak merupakan bidang kuasa Negeri sebagaimana yang telah diperuntukkan dalam Senarai II, Senarai Negeri, Jadual ke Sembilan, Perlembagaan Persekutuan. Justeru itu, dasar dan keputusan yang berkaitan dengan hal ehwal agama Islam termasuklah penetapan had umur minimum perkahwinan kepada 18 tahun di Negeri-Negeri diputuskan dan ditetapkan oleh Majlis Agama Negeri-Negeri.
Tuan Yang Di-Pertua,

Kementerian ini menyedari bahawa pelan ini merupakan satu pelan yang dinamik, maka saranan dan pandangan daripada semua pihak amat saya alu-alukan. Saya menyeru semua ahli parlimen untuk turut sama-sama menyokong usaha murni ini demi kepentingan terbaik kanak-kanak.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : TUAN WONG CHEN [SUBANG]

TARIKH : 26 JULAI 2022 (SELASA)

SOALAN

TUAN WONG CHEN [SUBANG] minta **MENTERI KEWANGAN** menyatakan adakah Kerajaan telah mengkaji dan menerima maklum balas daripada penerima bantuan tunai Bantuan Keluarga Malaysia (BKM) tentang keberkesanannya sebagai cara untuk mengurangkan inflasi makanan.

JAWAPAN

Tuan Yang di-Pertua,

Berdasarkan tinjauan Kementerian Kewangan, **keperluan semasa golongan rentan adalah untuk bantuan tunai** bagi membantu membiaya kos sara hidup semasa. Selain itu, dalam konteks memacu pemulihian ekonomi dan merancakkan aktiviti perbelanjaan, adalah lebih baik disediakan bantuan tunai daripada kaedah bantuan yang lain.

Untuk makluman Yang Berhormat, **Bantuan Keluarga Malaysia (atau BKM)** merupakan inisiatif **bantuan tunai langsung** yang diumumkan di dalam Bajet 2022 bagi membantu mereka yang memerlukan untuk bangun semula pasca-pandemik dan meringankan beban kos sara hidup. Setakat ini, **8.6 juta penerima BKM** telah diluluskan dengan isi rumah bakal menerima sehingga 2,600 ringgit sekeluarga pada tahun 2022. Seperti mana diumumkan YAB Perdana Menteri baru-baru ini, **BKM Fasa 2 telah ditambah baik dengan Bantuan Tunai Tambahan bernilai 630 juta ringgit, dengan jumlah peruntukan keseluruhan BKM sebanyak 8 bilion ringgit.**

Ini menunjukkan keprihatinan Kerajaan untuk membantu golongan yang memerlukan menangani cabaran kenaikan kos sara hidup. Walaupun BKM yang disalurkan kepada golongan B40 membantu mereka menghadapi isu kenaikan harga, pemberian bantuan tunai tidak akan membantu mengurangkan inflasi makanan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN HASSAN BIN ABDUL KARIM
[PASIR GUDANG]
TARIKH : 26 JULAI 2022 (SELASA)

SOALAN

TUAN HASSAN BIN ABDUL KARIM [PASIR GUDANG] minta **MENTERI KEWANGAN** menyatakan adakah Kerajaan bersetuju untuk membentangkan dan membahaskan di Parlimen, laporan tahunan syarikat-syarikat berkaitan Kerajaan (GLC) dan (GLIC) seperti Petronas, Khanazah Nasional dan Permodalan Nasional Berhad (PNB).

JAWAPAN

Tuan Yang di-Pertua,

Untuk makluman Yang Berhormat, syarikat yang dimaksudkan adalah tertakluk kepada Akta Syarikat 2016 yang mengkehendaki supaya laporan Kewangan yang telah diaudit dikemukakan kepada Suruhanjaya Syarikat Malaysia (SSM) setiap tahun.

Sebelum dikemukakan kepada SSM, laporan beraudit tersebut perlu dibentangkan kepada Lembaga Pengarah sebelum diluluskan di dalam Mesyuarat Agung Tahunan (*Annual General Meeting-AGM*).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : PUAN ALICE LAU KIONG YIENG [LANANG]

TARIKH : 26 JULAI 2022 (SELASA)

SOALAN

PUAN ALICE LAU KIONG YIENG [LANANG] minta **MENTERI KANAN PENDIDIKAN** menyatakan bilangan pelajar Sarawak yang berhenti sekolah sejak pandemik COVID-19 iaitu pada tahun 2020, 2021 dan 2022 dan nyatakan sebab/alasan pelajar berhenti sekolah termasuk mereka yang terpaksa berhenti kerana tidak dapat menyertai kelas atas talian (Pengajaran dan Pembelajaran Di Rumah - PdPR).

JAWAPAN

Tuan Yang di-Pertua,

Untuk makluman Ahli Yang Berhormat, berdasarkan rekod dalam Sistem Aplikasi Pengkalan Data Murid (APDM), jumlah murid di negeri Sarawak yang berhenti sekolah bagi tempoh 2020 hingga 2022 adalah seramai 9,134 orang. Daripada jumlah tersebut, seramai 4,303 murid telah berhenti pada tahun 2020, 2,432 murid pada tahun 2021 dan 2,399 murid pada tahun 2022. Antara faktor utama murid berhenti sekolah adalah kerana masalah keluarga dan tidak berminat ke sekolah.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SRI HAJAH ROHANI BINTI
HAJI ABDUL KARIM [BATANG LUPAR]**

TARIKH : 26 JULAI 2022 (SELASA)

SOALAN

DATO' SRI HAJAH ROHANI BINTI HAJI ABDUL KARIM [BATANG LUPAR] minta **MENTERI PELANCONGAN, SENI DAN BUDAYA** menyatakan apakah usaha Kementerian untuk menjalankan kajian di kawasan-kawasan bersejarah di Sarawak yang kurang mendapat perhatian bagi tujuan dokumentasi seperti Makam Dang Isah di Pusa, Sarawak.

JAWAPAN

Tuan Yang di-Pertua,

1. Pihak Kementerian Pelancongan, Seni dan Budaya (MOTAC) menerusi agensinya iaitu Jabatan Warisan Negara (JWN) sentiasa menjalankan usaha-usaha penyelidikan dan pendokumentasian berkaitan tapak, bangunan, warisan kebudayaan tidak ketara yang turut meliputi warisan di Sarawak. Pihak JWN sentiasa bekerjasama dan memberi perhatian serta mengalu-alukan sekiranya terdapat cadangan mana-mana pihak bagi tujuan penyelidikan dan pendokumentasian. Proses penyelidikan dan pendokumentasian adalah merupakan proses berterusan yang akan dilaksanakan oleh JWN.
2. Bagi Makam Dang Isah, kajian awal telah dijalankan oleh pihak Jabatan Warisan Negara. Ia kini sedia dipertimbangkan untuk dilaksanakan kajian lanjut. Untuk makluman, setiap pewartaan warisan oleh JWN adalah berdasarkan peruntukan di bawah Akta Warisan Kebangsaan 2005 [Akta 645]. Pewartaan ini dilakukan setelah kajian, justifikasi serta kriterianya dipersetujui oleh Pesuruhjaya Warisan melalui syor jawatankuasa pakar. Selain itu, antara perkara paling utama yang adalah ia perlu mendapat keizinan Pihak Berkuasa Negeri, selaras dengan Seksyen 30 Akta 645.
3. Sehubungan dengan itu, pendokumentasian bagi Makam Dang Isah di Pusa atau tapak-tapak warisan yang lain di Sarawak juga boleh dirujuk melalui Jabatan Muzium Sarawak yang turut bertanggungjawab dalam pemuliharaan dan pemeliharaan warisan di negeri tersebut berdasarkan Ordinan Warisan Sarawak 2019 yang mula berkuatkuasa pada 1 Mac 2022. Seksyen 32, Ordinan Warisan Sarawak 2019 menyediakan peruntukan berkenaan dengan pengisytiharan bangunan, monumen, dan tapak sebagai warisan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN SHAHARIZUKIRNAIN BIN ABD. KADIR
[SETIU]**

TARIKH : 26 JULAI 2022 (SELASA)

SOALAN

TUAN SHAHARIZUKIRNAIN BIN ABD. KADIR [SETIU] minta MENTERI PELANCONGAN, SENI DAN BUDAYA menyatakan status terkini projek pembesaran jeti pelancongan Pulau Redang.

JAWAPAN

1. Untuk makluman, cadangan Projek Membina dan Menyiapkan Jeti Tambahan Kepada Jeti Pulau Redang Sedia Ada dan Kerja-Kerja Berkaitan dengan anggaran kos sebanyak RM9 juta telah dikemukakan oleh Majlis Bandaraya Kuala Terengganu kepada Kementerian Pelancongan, Seni dan Budaya (MOTAC) di bawah *Rolling Plan 2 (RP2)*, Rancangan Malaysia ke 12 (RMKe-12). Walau bagaimanapun, projek ini tidak diluluskan oleh Unit Perancang Ekonomi (UPE), Jabatan Perdana Menteri atas beberapa faktor.
2. Antara faktor utama adalah cadangan projek ini memerlukan pelaksanaan beberapa skop kajian awalan meliputi *Marine Risk Assessment*, *Environmental Impact Assessment*, *Marine Survey* dan kajian hidraulik oleh pihak Kerajaan Negeri Terengganu. Oleh yang demikian, cadangan projek ini disyorkan untuk diangkat semula permohonannya kepada MOTAC selepas Kerajaan Negeri menyelesaikan kajian-kajian yang diperlukan tersebut.
3. MOTAC secara prinsipnya menyokong cadangan projek ini memandangkan projek tersebut mempunyai potensi besar dalam memacu industri pelancongan negara khususnya di Negeri Terengganu untuk jangka masa panjang selain berupaya menyumbang kepada peningkatan taraf ekonomi penduduk setempat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : PUAN WONG SHU QI [KLUANG]
TARIKH : 26 JULAI 2022 (SELASA)

SOALAN

PUAN WONG SHU QI [KLUANG] minta **MENTERI KEWANGAN** menyatakan sama ada Kerajaan akan meminda Akta Rumah Perjudian Terbuka 1953 serta Akta Pertaruhan 1953 supaya aktiviti perjudian atas talian dapat dikawalkan.

JAWAPAN

Tuan Yang di-Pertua,

Terima kasih Yang Berhormat Puan Wong Shu Qi [PH DAP Kluang] di atas soalan yang telah dikemukakan.

Tuan Yang di-Pertua,

Untuk makluman Ahli-Ahli Yang Berhormat, Kementerian Kewangan hanya memantau semua aktiviti perjudian berlesen sahaja manakala aktiviti perjudian haram adalah di bawah bidang kuasa Kementerian Dalam Negeri (KDN) iaitu pihak Polis Diraja Malaysia (PDRM) yang ditugaskan untuk melaksanakan tugas-tugas penyiasatan dan pencegahan seperti yang diperuntukkan dalam undang-undang.

Untuk makluman Ahli-Ahli Yang Berhormat juga, buat masa ini tiada sebarang akta khusus untuk mengawal selia aktiviti perjudian atas talian di negara ini. Namun demikian, Kementerian Kewangan cakna dan kini sedang dalam proses semakan untuk meminda akta-akta perjudian sedia ada iaitu Akta Rumah Perjudian Terbuka 1953, Akta Pertaruhan Wang Terkumpul 1967, Akta Loteri 1952 dan Akta Pertaruhan 1953.

Dengan adanya perundangan yang baharu ini kelak diharapkan Kerajaan akan dapat menguatkuasa dan mengawal selia aktiviti perjudian berlesen dan perjudian atas talian secara lebih menyeluruh.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN SIM CHEE KEONG
[BUKIT MERTAJAM]
TARIKH : 26 JULAI 2022 (SELASA)

SOALAN

TUAN SIM CHEE KEONG [BUKIT MERTAJAM] minta **MENTERI KEWANGAN** menyatakan senarai nama beserta gaji, elaun, imbuhan bagi semua pengurus syarikat berkaitan Kerajaan dan badan-badan berkanun Kerajaan Persekutuan.

JAWAPAN

Tuan Yang di-Pertua

Untuk makluman Yang Berhormat, penetapan gaji dan elaun di dalam syarikat berkaitan Kerajaan adalah berdasarkan beberapa kriteria utama seperti saiz syarikat, jenis perniagaan, status syarikat (tersenarai atau tidak tersenarai), kompleksiti tugas dan tanggungjawab serta lain-lain kriteria lagi. Selain itu, Kerajaan turut mengambil kira faktor kajian pasaran bagi memastikan gaji dan elaun yang ditetapkan berpadanan atau *mark-to-market*. Perkara ini penting bagi memastikan syarikat-syarikat berkenaan dapat mengekalkan bakat dan kemahiran kakitangan (*right talent and skill set*) selain dapat menarik bakat yang terbaik daripada pasaran untuk menyertai syarikat. Perkara ini penting bagi memastikan syarikat-syarikat berkaitan Kerajaan kekal berdaya saing terutamanya dalam mengharungi keadaan ekonomi ketika ini.

Sekian, terima kasih.